


ଶୁଦ୍ଧ ଶାସ୍ତ୍ରିକାର ଧ୍ୟାନ ଜ୍ଞାନମୋ

କୁରାତୁଲ-ଆଇନ-ତାହମିନା
ଫାରହାନା ଆଫରୋଜ

ক্ষুদ্র জাতিসম্মতির খবর জানানো



কুরুক্ষেত্র-আইন-তাহ্মিনা
ফারহানা আফরোজ

© ম্যানেজমেন্ট অ্যান্ড রিসোর্সেস ডেভেলপমেন্ট ইনিশিয়েটিভ (এমআরডিআই)

প্রকাশকাল : ২০০৯

ডিজাইন : গোলাম মোস্তফা কিরণ

মুদ্রণ : ট্রাঙ্কপারেন্ট

ISBN : 978-984-33-0620-8

বাংলাদেশে মুদ্রিত



ম্যানেজমেন্ট অ্যান্ড রিসোর্সেস ডেভেলপমেন্ট ইনিশিয়েটিভ

২/৯ স্যার সৈয়দ রোড (৪র্থ তলা), ঢাকা-১২০৭

ফোন : +৮৮-০২-৯১৩৪৭১৭, +৮৮-০২-৯১৩৭১৮৭

ই-মেইল : info@mrdibd.org

ওয়েবসাইট : www.mrdibd.org

বিষয়সূচি

ভূমিকা

১

সাংবাদিকদের জন্য

১.বৈচিত্র্য সম্বলন, সম্বলনে বৈচিত্র্য	৩
২.অঙ্গুষ্ঠা, সমস্যা, বক্ষণা : জানা এবং জানানোর কেন্দ্রবিন্দু	৫
৩.কুন্দু জাতিসভার খবরাখবর প্রতিফলনে ঘাটতি	৮
৪.পথের ঝোঁজ ভালো সাংবাদিকতায়	১২
৫.প্রতিবেদন করার সুযোগ	১৮
৬.সতর্কতার কয়েকটি ক্ষেত্র ও কৌশল	২৩

আদিবাসী সংস্থা-সংগঠনের জন্য

১.আদিবাসী প্রতিনিধিদের করণীয়	২৯
২.বোৰাপড়া, সম্পর্ক গড়া	৩০
৩.সাংবাদিকের চোখ দিয়ে দেখা, দেখানো	৩৪
৪.সাংবাদিককে তাঁর কাজে সহায়তা করা	৩৭
৫.সংবাদমাধ্যমের সঙ্গে যোগাযোগের পরিকল্পনা	৪০
৬.প্রেস কনফারেন্স বা সংবাদ-সম্মেলন	৫১

তথ্যকণিকা

বাংলাদেশের কুন্দু জাতিসভা	৫৫
সাংস্কৃতিক বর্ষপঞ্জি	৬৮
আদিবাসী-সংশ্লিষ্ট কিছু আইন	৭৪
ওয়েবসাইটে কুন্দু জাতিসভা	৭৭
প্রাথমিক যোগাযোগের জন্য	৮০
সহায়ক অঙ্গপঞ্জি	৮৪

ভূমিকা

এ বইয়ের উদ্দেশ্য, ক্ষুদ্র জাতিসমাদের সঙ্গে সংবাদমাধ্যমের দূরত্ব দূর করার উপায়গুলো খতিয়ে দেখা। বইটি তিনটি অংশে ভাগ করা হয়েছে। প্রথম অংশ বিষয়টিকে দেখছে সাংবাদিকতার দৃষ্টিকোণ থেকে। এ অংশটিতে সাংবাদিকদের ভাবার জন্য কিছু বিষয় এবং কাজের সুবিধার জন্য কিছু পরামর্শ আছে। দ্বিতীয় অংশটি ক্ষুদ্র জাতিসমাদের বিভিন্ন সংস্থা-সংগঠন ও প্রতিনিধিদের জন্য। সেখানে তাঁদের ভাবার জন্য কিছু বিষয় এবং সংবাদমাধ্যমের সঙ্গে কার্যকরভাবে যোগাযোগ রক্ষা করার জন্য কিছু পরামর্শ আছে। এ দুই অংশ যাদের জন্য, তারা দুই পক্ষ মিলে দূরত্ব ঘোঁচানোর কঠিন কাজটি সম্পাদন করবে, এটাই আশা।

তৃতীয় বা শেষ অংশটিতে পাবেন কিছু তথ্যকণিকা : বাংলাদেশের ক্ষুদ্র জাতিসমা পরিচিতি; কয়েকটি জাতিসমার সাংস্কৃতিক অনুষ্ঠান, বড় পরব ও আচার-অনুষ্ঠানের তালিকা; আদিবাসীদের জন্য প্রাসঙ্গিক কিছু আন্তর্জাতিক ও জাতীয় আইন; প্রাসঙ্গিক কিছু ওয়েবসাইটের ঠিকানা; তিনটি বড় আদিবাসী এলাকার প্রধান কিছু সংস্থা-সংগঠন এবং সাংবাদিকদের নাম ও পরিচিতি। যেসব বইপত্র থেকে তথ্য-উপাস্ত নেওয়া হয়েছে, সেগুলোর একটি তালিকা ও তৃতীয় অংশে পাবেন। এ গ্রন্থপঞ্জি আদিবাসী বিষয়ে তথ্যের কিছু ভালো উৎসের হিসেব দেবে।

এ বইটি লিখবার সময় জরুরি কিছু অংশ খুঁটিয়ে পড়ে মূল্যবান পরামর্শ দিয়েছেন নৃবিজ্ঞানী ও উন্নয়নকর্মী প্রশান্ত ত্রিপুরা এবং চট্টগ্রাম বিশ্ববিদ্যালয়ের আইন বিভাগের অধ্যাপক আব্দুল্লাহ আল ফারুক। বাজারে দুষ্প্রাপ্য একটি বই পাঠিয়ে বিশেষ সাহায্য করেছেন বইটির লেখক মণিপুরি ললিতকলা একাডেমীর পরিচালক রামকান্ত সিংহ। তাঁদের বিশেষ ধন্যবাদ।

এ ছাড়া, এ বইয়ের পরামর্শের অনেকগুলো এসেছে ম্যানেজমেন্ট অ্যান্ড রিসোর্সেস ডেভেলপমেন্ট ইনিশিয়েটিভ—এমআরডিআইয়ের একটি প্রকল্পের আওতায় অনুষ্ঠিত তিনটি কর্মশালা, সংবাদমাধ্যম জরিপ এবং বিভিন্ন প্রশিক্ষণের অভিজ্ঞতা থেকে। এ প্রকল্পের নাম ছিল ‘ব্রিজিং মিডিয়া অ্যান্ড এথনিসিটি’—সংবাদমাধ্যম ও ক্ষুদ্র জাতিসমার মধ্যকার দূরত্ব দূর করা। ২০০৮-০৯ সালের এ প্রকল্পটিতে অর্থায়ন করেছে বাংলাদেশে ইউরোপীয়ান কমিশনের ডেলিগেশন। সার্বিক সহায়তার জন্য প্রকল্পটির সঙ্গে জড়িত সকলকে ধন্যবাদ।

সাংবাদিকদের জন্য



১

বৈচিত্র্যে সম্মিলন, সম্মিলনে বৈচিত্র্য

ক্ষুদ্র জাতিসম্পত্তি বলতে সেসব সংখ্যালঘু জনগোষ্ঠীকে বোঝায় যাদের নিজস্ব স্বতন্ত্র ভাষা, সংস্কৃতি, সমাজব্যবস্থা, অর্থনৈতিক ধারা, ধর্ম বা বিশ্বাস ও আচার-অনুষ্ঠান এবং ঐতিহ্য রয়েছে। বাংলাদেশে বাঙালিদের পাশাপাশি এমন অনেকগুলো জাতির মানুষ বসবাস করে। এসব ক্ষুদ্র জাতিসম্পত্তির মানুষের মোট জনসংখ্যা বাঙালি জনগোষ্ঠীর তুলনায় অনেক ছোট। আবার, এমন স্বতন্ত্র জাতিদের বেশির ভাগের জনসংখ্যা একেবারেই কম।

প্রান্তিক অবস্থানের এ মানুষদের সমস্যা ও সংকটগুলো কিন্তু ছোট নয়। তাদের জাতিগত ও অবস্থানগত স্বাতন্ত্র্যের কারণে বাঙালি প্রান্তিক মানুষের চেয়েও তাদের সমস্যা এবং অবহেলা-বন্ধননার মাত্রাগুলো জটিল; আছে জীবিকার সংকট ও অর্থনৈতিক শোষণ এবং রাজনৈতিক ও ক্ষমতাশালী স্বার্থের সঙ্গে দ্বন্দ্ব; আছে স্বতন্ত্র সাংস্কৃতিক ও সামাজিক অস্তিত্ব টিকে থাকার সংকট; ওঠে নিজেদের মতো করে বেঁচে থাকার অধিকারের মৌলিক প্রশ্ন।

নৃবিজ্ঞানীরা বলেন, বাঙালি জাতির উৎপত্তি ও গঠনে মিশে আছে এ অঞ্চলের ক্ষুদ্র জাতিসম্পত্তির অনেকের পূর্বসূরিরা। বাংলা ভাষা ও বাঙালি সংস্কৃতির ক্রমবিকাশের ধারায় এসে মিশেছে তাদের ভাষাগত ও সাংস্কৃতিক ঐতিহ্য। বিভিন্ন সময়ে জমিদারি ও ব্রিটিশ ঔপনিবেশিক শাসনবিরোধী সংগ্রাম এবং পরে বাংলাদেশের মুক্তির আন্দোলনে তারাও শরিক ছিল। এ জাতিদের সম্পর্কে জানা তাই এ অঞ্চলের ইতিহাস-ঐতিহ্যকে পূর্ণাঙ্গ করে জানা।

তাদের ঐতিহ্য, মর্যাদা, স্বার্থ বা অধিকারের প্রশ্নগুলো তাই কেবল তাদের জন্য জরুরি নয়, বাঙালি জনগোষ্ঠীর জন্যও তা জরুরি বিষয়। ইতিহাসবিদ ও নৃবিজ্ঞানীরা যেমন অতীত ও ক্রমবিকাশে নজর দেন, সাংবাদিক দেখবেন এদের নিকট অতীত ও চলতি বর্তমানের ধারা—অবস্থা ও অবস্থান।

ক্ষুদ্র জাতিসম্পত্তির খবর জানানো কেন জরুরি

- সাংবাদিক মানুষের জীবন, প্রয়োজন ও আগ্রহের সঙ্গে জড়ানো ঘটনা ও বিষয়ের সত্যচিত্র যথাযথ তুলে ধরবেন। নিত্যনতুন নানা রকম ঘটনা মানুষের জীবনকে প্রভাবিত করে। সাংবাদিক মানুষের জন্য জরুরি সেসব ঘটনা বা প্রবণতার কথা এমনভাবে জানাবেন, যাতে মানুষ বিষয়গুলোর তাৎপর্য সঠিক বুঝতে পারে এবং কার্যকরভাবে সেগুলোর মোকাবিলা করতে পারে।
- ✓ সমাজের নানা অংশ, তাদের নানা রকম জীবন; সেসব জীবনের নানা রকম প্রয়োজন ও আগ্রহ।
সাংবাদিক যার জরুরি খবর জানান না, সে এ সুযোগ থেকে বন্ধিত হয়।

- আবার, একের জীবন অন্যের জীবনের সঙ্গে সম্পর্কিত। সাংবাদিকের কাজের মাধ্যমে মানুষ ঘটনার তৎপর্যের সে ঘোগসূত্র বুঝতে পারে।
 - ✓ প্রত্যেকে ভালো না থাকলে সবার ভালো থাকা সম্ভব নয়। সাংবাদিক যখন কোনো ঘটনা বা প্রবণতার হানিকর বা খারাপ দিকগুলো দেখান, তখন তার প্রতিকারের প্রয়োজনীয়তা চিহ্নিত হয়। ভালোর জন্য পরিবর্তনের প্রক্রিয়া সূচিত হওয়ার সম্ভাবনা তৈরি হয়।
 - ✓ সাংবাদিক যেসব ঘটনা বা বিষয়ের কথা তুলে ধরেন, সেগুলো সমাজের মানুষের নজরে ও বিবেচনায় আসার সুযোগ পায়। যাদের তিনি উপেক্ষা করেন, তাদের কথা বেশির ভাগ মানুষের অজানা রয়ে যাওয়ার সম্ভাবনা প্রবল হয়। তারা এবং তাদের সমস্যাগুলো সমাজের মনোযোগ পাওয়ার সুযোগ হারায়। কার কোন কথা, কোন ঘটনা বা বিষয় কীভাবে তিনি তুলে ধরছেন সেদিকটাও সমান গুরুত্বপূর্ণ।
- সুতরাং সাংবাদিকের কাজ ব্যক্তির এবং সমাজের ভালো জীবনের জন্য জরুরি। জনজীবনের কল্যাণের ব্রহ্ম সাংবাদিকের নেতৃত্বে ও মূল্যবোধের অত্যাবশ্যিক ভিত্তি।
 - ✓ এরই যুক্তিতে সাংবাদিকের তথ্য সংগ্রহ ও প্রকাশের স্বাধীনতা এবং সুযোগগুলো জায়েজ হয়।
 - ✓ এরই যুক্তিতে সাংবাদিক যেকোনো ক্ষমতাকেন্দ্রের নজরদারি করেন, জনমানুষের চোখ-কান-মুখ হয়ে সরকারের সঙ্গে তথ্য-মতামত আদান-প্রদান ও যোগাযোগের সেতু গড়েন। গণতন্ত্র যথার্থ প্রতিষ্ঠিত হওয়ার সুযোগ পায়।

নেতৃত্ব, ন্যায্য—সাংবাদিকতার নেতৃত্বের তাই দুটি বড় দাবি :

- জনজীবনের কল্যাণের লক্ষ্যে সংবাদমাধ্যমে সমাজের সব অংশের ন্যায্য প্রতিফলন নিশ্চিত করা।
- যারা দুর্বল, সুযোগ-সুবিধায় যারা পিছিয়ে আছে, যারা কোনো অন্যায়, বৈষম্য বা বঞ্চনার শিকার তাদের প্রতি বিশেষ মনোযোগ।

ওপরের দুটি বিবেচনাতেই ক্ষুদ্র জাতিসম্ভাবনা মানুষের জন্য জরুরি বিষয়গুলো সাংবাদিকের বিশেষ মনোযোগ দাবি করে।

- ✓ সরকারসহ ক্ষমতার বিভিন্ন কেন্দ্রকে এসব জানানো জরুরি।
- ✓ এসব সমস্যা ক্ষমতাকেন্দ্রের সৃষ্টি হলে সব মানুষকে তা জানানো জরুরি।
- ✓ এসবের প্রতিকার যার দায়িত্ব, তাকে চিহ্নিত করা জরুরি। আড়াল পেলে দায় এড়ানো বা অবহেলার সুযোগ হয়।

সাংবাদিক সচেতন ও সচেষ্ট না থাকলে মূলধারার খবরের প্রবল উপস্থিতির চাপে ক্ষুদ্র জাতিসম্ভাবনার কথা হারিয়ে যাবে।

অবহেলা, অঙ্গিতশীলতা—ব্যক্তি বা ছোট গোষ্ঠী যখন সমস্যার মধ্যে থাকে বা কোনো অন্যায়ের শিকার হয়, সেটা বৃহত্তর সমাজ, রাষ্ট্র বা জনজীবনের জন্যও ক্ষতি ডেকে আনে।

- ✓ যেকোনো সমস্যা বা অন্যায্যতা জিইয়ে থাকলে ক্ষোভ ও অসন্তোষ জমা হয়। অবহেলা ছোট ও প্রান্তিক গোষ্ঠীকে কোণঠাসা করে, বিচ্ছিন্ন করে। এসব ক্রমে বড় সমস্যার সূত্রপাত করে এবং জনজীবনের জন্য অস্থিতিশীলতার ঝুঁকি বাড়ে।

বোঝাপড়া, সহমর্মিতা—সমাজের বিভিন্ন অংশগুলোর পরম্পরাকে জানা ও বোঝা সম্পর্কিত জনজীবনের স্বাস্থ্যের জন্য জরুরি।

- ✓ সংখ্যাগুরু জনগোষ্ঠীর ধারা থেকে যা কিছু ভিন্ন, তার সম্পর্কে ভুল বোঝাবুঝি বা অবজ্ঞার সূত্রপাত হয় না-জানা বা ভ্রান্ত ধারণা থেকে।
- ✓ মানুষের বড় পরিচয় কিন্তু সহমর্মিতা। সেখানে পৌছানোর প্রথম সোপান, অন্যকে যথাযথ জানা ও চেনা। সাংবাদিক ক্ষুদ্র জাতিসম্ভাব মানুষের জীবনের কথা যথাযথ জানিয়ে সেই সহমর্মিতা ও সংহতির ক্ষেত্র তৈরি করতে পারেন।

২

অস্তিত্ব, সমস্যা, বঞ্চনা : জানা এবং জানানোর কেন্দ্রবিন্দু

বাংলাদেশের ক্ষুদ্র জাতিসম্ভাবের সরকার আলাদা করে চিহ্নিত করেছিল ১৯৯১ সালের আদমশুমারিতে। সে হিসাব গুচ্ছিয়ে নিলে সরকারি হিসাবে এমন জাতিসম্ভাব সংখ্যা দাঁড়ায় ২৬টি। দেশের দক্ষিণ-পূর্ব, মধ্যভাগ, উত্তর-পশ্চিম ও উত্তর-পূর্বের কয়েকটি অঞ্চলে এদের বেশি সংখ্যায় দেখা যায়। পাহাড়, বন, গড়াঞ্চলে যেমন, তেমনি সমতলেও ঘনবসতি-এলাকা আছে। এ ছাড়া, আদমশুমারি বলছে, ৬৪ জেলার প্রতিটিতেই কোনো না কোনো ক্ষুদ্র জাতিসম্ভাব বাস আছে। এদিকে, জাতীয় আদিবাসী ফোরাম ও বিভিন্ন সূত্রে ৪৫টির মতো জাতির উল্লেখ পাওয়া যায় (দেখুন তথ্যকণিকা ‘বাংলাদেশের ক্ষুদ্র জাতিসম্ভাব’)।

বাংলাদেশের এসব ক্ষুদ্র জাতিসম্ভাব মানুষের একটি প্রধান দাবি, তাদের স্বতন্ত্র পরিচয় ও অধিকারের সাংবিধানিক স্বীকৃতি ও সুরক্ষা। এ দাবি উঠছে গুরুতর সমস্যা ও বঞ্চনার প্রেক্ষাপটে। আমরা দেখেছি, এই একই প্রেক্ষাপটে এদের প্রতি সংবাদমাধ্যমের বিশেষ মনোযোগের প্রয়োজনীয়তা আসছে। একই কারণে প্রান্তিক যে ক্ষুদ্র জাতিগোষ্ঠীগুলো নিজেদের স্বতন্ত্র ভাষা বা সংস্কৃতি হারিয়ে বাঙালি সমাজের প্রান্তে মিশে গেছে, তারাও বিবেচনা দাবি করে।

বাংলাদেশের ইতিহাসচর্চার সাধারণ ধারায় বাঙালি জাতীয়তাবাদ ও বাঙালি জাতিকে প্রধান করে দেখা হয়। রাষ্ট্র ও সমাজের মানসেও এ প্রবণতা প্রবল। ক্ষুদ্র জাতিগোষ্ঠীদের বঞ্চনা, বঞ্চনার অনুভূতি ও ক্ষোভের শেকড় তাই একেবারে মৌলিক জায়গায়। এদের কী নামে ডাকা হবে, সে বিতর্ক দেখলে বিষয়গুলো পরিষ্কার হয়।

‘আদিবাসী’ বনাম উপজাতি

- সরকার তাদের বলে ‘উপজাতি’। নৃবিজ্ঞানে ‘উপজাতি’ ও ‘উপজাতিগোষ্ঠী’—ট্রাইব বা ট্রাইবাল এন্প বলতে রাষ্ট্রের উভবের আগেকার জাতিসম্পর্কভিত্তিক বিশেষ সমাজকে বোঝায়। এখন যেহেতু সব জনগোষ্ঠীই কোনো না কোনো রাষ্ট্রের অন্তর্ভুক্ত, তাই ‘উপজাতি’ শব্দটি আর থাটে না। এর নেতৃত্বাচক অবজ্ঞাসূচক ব্যঙ্গনাও আছে। ‘আদিম’, ‘অসভ্য’, ‘বর্বর’—এসব ধারণা শব্দটির মধ্যে মিশে আছে; তা ছাড়া, এ নামে ডাকলে জাতির চেয়ে নিচে অবস্থান দেওয়া হয়।
- নিজস্ব ভাষা-সংস্কৃতি-সমাজব্যবস্থাসহ এদের প্রত্যেকের স্বতন্ত্র জাতিগত পরিচয় বা ঐতিহ্য আছে। অধিকাংশ নৃবিজ্ঞানী তাই এদের নৃগোষ্ঠী, জাতিসম্প্রদায়, জাতিগোষ্ঠী বা জাতিসভা—এখনিক কমিউনিটি বা এখনিক এন্প হিসেবে চিহ্নিত করছেন। নৃবিজ্ঞানীরা আদিবাসী শব্দটিও ব্যবহার করছেন। সংখ্যালঘুত্বের বিবেচনায় ‘ক্ষুদ্র জাতিসভা’ বা ‘এখনিক মাইনরিটি’ শব্দটি প্রচলিত আছে; তবে মনে রাখা ভালো, এদের সমস্যা বা বংশনা কেবল সংখ্যায় কম হওয়ার জন্যই নয়।
- ক্ষুদ্র জাতিসভার অধিকাংশ মানুষজন পছন্দ করছেন ‘আদিবাসী’ পরিচিতি। কিন্তু বাংলাদেশে ক্ষুদ্র জাতিসভা প্রসঙ্গে যেকোনো আলোচনা এই ‘আদিবাসী’ বলা ও না বলার প্রশ্নে এসে তর্ক-বিতর্কের স্রোতে হারিয়ে যেতে বসে। প্রশ্ন ওঠে, আদি বাসিন্দা কারা? বাঙালিরাও এ ভূখণের দীর্ঘকালের বাসিন্দা। কোন জনগোষ্ঠী আগে এসেছে আর কে পরে অভিবাসী (সাঁওতাল বা চা-শ্রমিকেরা) তা নিয়ে গোল বাধে; অনেক ক্ষেত্রে তা প্রমাণ করা কঠিন হয়। তবে এ ব্যাপারে সতর্কতার সঙ্গে সঙ্গে সংবেদনশীলতা এবং গভীরে তলিয়ে বোঝা দরকার।
 - ✓ বন-পাহাড়ের দুর্গম অঞ্চলে অধিকাংশ ক্ষেত্রে ক্ষুদ্র জাতগোষ্ঠীগুলোই প্রথম বসতি স্থাপন করেছিল। সমতলে এবং অন্যত্র কোনো নির্দিষ্ট ভূখণে হয়তো বাঙালিরা আগে গিয়েছিল। কালের বিচারে বাংলাদেশ তথা অনেক রাষ্ট্রেই জন্ম সেদিনের ঘটনা মাত্র। আর অঞ্চলে অঞ্চলে বা পুরো পৃথিবীতেই ইতিহাসের গোড়া থেকে মানুষের অভিবাসন-বসতিস্থাপন একটি সদা চলমান প্রক্রিয়া। কে আগে বা কে পরে, সে বিতর্ক এক অর্থে অপ্রাসঙ্গিক হয়ে যায়; কিন্তু প্রশ্নটি গুরুত্বপূর্ণ অধিকার ও সুরক্ষার প্রসঙ্গে।
 - ✓ আন্তর্জাতিকভাবে ‘আদিবাসী’ বা ‘ইনডিজেনাস পিপল’ শব্দটি ব্যবহৃত হচ্ছে নিকট-অতীতের কয়েক শতকের ইউরোপীয় ঔপনিবেশিক প্রেক্ষাপটে। শব্দটি এসেছে উভর ও দক্ষিণ আমেরিকা, আফ্রিকা বা অস্ট্রেলিয়ার মতো অঞ্চলে ঔপনিবেশিকতার ফলে ছিন্ন-বিছিন্ন-নির্মূল হতে বসা আদি-বাসিন্দাদের বোঝাতে। এ পরিচিতি এদের ঐতিহাসিক বংশনা ও শোষণের প্রতিকারে আইনগত অধিকার নিশ্চিত করার উদ্যোগের সঙ্গে ওতপ্রোত জড়িত।
 - ✓ বাংলাদেশসহ বিশ্বের বিভিন্ন অঞ্চলের ক্ষুদ্র জাতিসভাগুলো এই একই প্রেক্ষাপটের রকমফেরের ভূজ্ঞভোগী। এ ভূখণে ঔপনিবেশিক শাসনের সময় এরা প্রান্তিক অবস্থানেই ছিল। আধুনিক রাষ্ট্রের জাতীয়তাবাদী ধারণাও কিন্তু সব জনগোষ্ঠীর অন্তিত্বের পরিচয় দেয় না। সুতরাং এসব প্রান্তিক গোষ্ঠী আন্তর্জাতিকভাবে স্বীকৃত ‘আদিবাসী’ ধারণায় অন্তর্ভুক্ত দাবি করে।
 - ✓ রাষ্ট্রসহ সংখ্যাগুরু চাপে ক্ষুদ্র জাতিসভারা অন্তিত্বের সংকট বা নিরাপত্তাহীনতায় ভোগে। তারা যখন নিজেদেরকে ‘আদিবাসী’ বলে, তার মধ্যে মিশে থাকে অন্তিত্ব আর অধিকারের দাবি—নিজেদের স্বাতন্ত্র্য এবং নাগরিকত্বের অধিকার নিয়ে বেঁচে থাকার আশা ও দাবি।

- ✓ একসময় ‘আদিবাসী’ শব্দটিরও একটি নেতৃত্বাচক ব্যঙ্গনা ছিল ‘আদিম’ অর্থে। এখন সেটা কেটে গেছে বলে মনে হয়। তবে ক্ষুদ্র জাতিসভার কেউ কেউ ‘আদিবাসী’ নামটি পছন্দ করেন না; তাঁরা ‘উপজাতি’ ও ‘আদিবাসী’—এ দুই ভাগে দেখার পক্ষপাতী। এঁদের সংখ্যা অবশ্য খুব কম।
- **সাংবাদিক কী বলবেন :** সংবাদমাধ্যম কর্তৃপক্ষের যদি আপত্তি না থাকে, ‘আদিবাসী’ শব্দটির ব্যবহার ভুল হবে না, বরং অনেক ভুল-বোৰার অবসান ঘটাবে। আর সংবাদমাধ্যমের যদি আপত্তি থাকে, ‘উপজাতি’ না বলে বরং ‘ক্ষুদ্র জাতিসভা’ গ্রহণযোগ্য বিকল্প হবে। ‘উপজাতি’ বললে ওই জনগোষ্ঠীর অনেকেই মনে কষ্ট পান, এটা সম্পাদকদের বুবিয়ে বলা প্রতিবেদকের দায়িত্ব। গণমাধ্যমের সঙ্গে ক্ষুদ্র জনগোষ্ঠীর দূরত্ব দূর করার জন্য এটা একটা ছোট কিন্তু বড় প্রসঙ্গ। এদিকে কোনো ক্ষুদ্র জাতিসভার প্রতিনিধি যদি ‘আদিবাসী’ পরিচয়ে আপত্তি করেন, আপনি ‘ক্ষুদ্র জাতিসভা’ বলবেন—‘উপজাতি’ নয়।

মোটা দাগে সমস্যা-বৃক্ষনা ও জরুরি বিষয়াবলি

আদিবাসীদের সমস্যা ও তাদের জন্য জরুরি বিষয়গুলোর দীর্ঘ ইতিহাস আছে। সমসাময়িক ঘটনাবলির তাৎপর্য বুঝতে হয় সেই প্রেক্ষাপটে। মোটা দাগে এমন প্রধান কয়েকটি সমস্যা ও বিষয় :

- ✓ প্রথাগতসহ ভূমির অধিকার বা বন-পাহাড় ব্যবহারের অধিকারের অস্তীকৃতি, হরণ, লজ্জন বা বৃক্ষনা। এটা শুরু হয়েছিল ব্রিটিশ আমলে, পরে ব্যাপক হয়েছে। কখনো রাষ্ট্রীয় নীতি-সিদ্ধান্ত, কখনো অ-আদিবাসী অভিবাসন এ প্রক্রিয়া ত্বরান্বিত করেছে।
- ✓ মানবসম্পদ উন্নয়ন বা বিকাশে সমস্যা, সুযোগের অভাব; জীবিকা বা অর্থনৈতিক কর্মকাণ্ডে সম্পৃক্ত হওয়ার সীমিত সুযোগ; শিক্ষা-স্বাস্থ্যসেবার সুযোগে ঘাটতি, আদিতে প্রাক্তিক কৃষিজীবী এসব মানুষ সংখ্যাগুরু জনগোষ্ঠী ও বাজার-অর্থনীতির প্রবেশের চাপে ত্রামেই আরও প্রাক্তিক অবস্থানে চলে গেছে। সব জাতিসভার মধ্যে শিক্ষিত মধ্যবিত্ত শ্রেণীর বিকাশ সমান হয়নি, সার্বিকভাবেও শ্রেণীটি ছোট। দারিদ্র্য এবং নিঃস্বকরণ বেশির ভাগের সাধারণ সমস্যা। জুমচাষের ওপর বিধিনিষেধ এবং নিজেদের জনসংখ্যা বৃদ্ধি পাহাড় অঞ্চলে অনেক মানুষের জীবিকাকে সংকটে ফেলেছে, কার্যকর বিকল্প মেলেনি। দুর্গম অঞ্চলের গোষ্ঠীগুলোর সুযোগের অভাব আরও বেশি।
- ✓ তাদের বসবাসের এলাকায় ইকোপার্ক, বাণিজ্যিক বনায়ন, গ্যাস-কয়লা আহরণ বা শক্তি-উৎপাদন প্রকল্পসহ বিভিন্ন ‘উন্নয়ন’ প্রকল্পের নেতৃত্বাচক প্রভাব। ১৯৬০-এর দশকে কাঞ্চাই জলবিদ্যুৎ প্রকল্প যেমন রাঙামাটি জেলায় আদিবাসীদের সেরা আবাদি জমির ৪০ শতাংশ হৃদের পানিতে ডুবিয়ে দেয়। এর জেরে সমস্যা আজও গড়াচ্ছে।
- ✓ সরকারের বিভিন্ন কর্তৃপক্ষ বা সংখ্যাগুরু জনগোষ্ঠীর ক্ষমতাবানদের পক্ষ থেকে স্বার্থতাড়িত সংঘাত-সহিংসতা বা নিপীড়ন; প্রশাসন/কর্তৃপক্ষের হাতে বা যোগসাজশে মানবাধিকার লজ্জন। পার্বত্য চট্টগ্রামে এর চিত্র প্রকট। ব্যক্তি বা গোষ্ঠী ধরে ঘটনার নজির অন্যান্য জায়গাতেও আছে।
- ✓ রাষ্ট্রের তরফ থেকে নানা মাত্রায় নিয়ন্ত্রণের চাপ। সরকারি বিভিন্ন নীতি নিয়ে বিভিন্ন ক্ষুদ্র জাতিসভার অনেক ক্ষেত্রে আছে। অনেকেই মনে করেন, এগুলো অর্থনৈতিক ও রাজনৈতিক দমনমূলক এবং সংখ্যাগুরু জনগোষ্ঠীর তুলনায় তাদের প্রতি বৈষম্য করার চেষ্টা। আদমশুমারিতে ক্ষুদ্র জাতিসভার মানুষের সংখ্যা কম গণনা করার বড় অভিযোগ ওঠে।

- ✓ সামাজিক-সাংস্কৃতিক প্রথা-রীতি-ঐতিহ্যের স্বাতন্ত্র্য হারিয়ে যাওয়ার প্রক্রিয়া; ভাষা হারিয়ে যাওয়ার হুমকি। অনেক দাবিদাওয়ার পরও সরকার আদিবাসী শিশুদের মাতৃভাষায় প্রাথমিক শিক্ষার ব্যবস্থা করেনি। সামাজিক ব্যবস্থা, রাজনৈতিক নিয়ন্ত্রণ, অর্থনৈতি, প্রশাসন, যোগাযোগ ও শিক্ষার মাধ্যম ভাষা—সব দিক দিয়েই তাদের বিদ্যমান প্রবল ধারার সঙ্গে খাপ খাওয়াতে হয়েছে। কখনো এটা হয়েছে চাপে পড়ে, জোরের ওপর; কখনো বাঞ্ছালিদের সঙ্গে পরম্পরানির্ভর মেলামেশা-লেনদেনের প্রক্রিয়া। অনেকখানেই তাদের নিজেদের প্রথাগত রীতি-পদ্ধতি টানাপোড়েনের মধ্যে আছে।
- ✓ ক্ষুদ্র জাতিসভা হিসেবে সাংবিধানিক সুরক্ষা ও স্বীকৃতির দাবি। এটাকে তাদের নেতৃত্বে নিজেদের স্বাতন্ত্র্য রক্ষা করে জাতীয় জীবনে সম্পৃক্ত হওয়ার উপায় হিসেবে দেখছেন।
- ✓ বিভিন্ন ক্ষুদ্র জাতিসভার মধ্যে বৈষম্যের পরিস্থিতি ও প্রেক্ষাপট। অন্যদিকে, পার্বত্য চট্টগ্রামে শান্তিচুক্তির (দেখুন ‘তথ্যকণিকা’) পরিপ্রেক্ষিতে আলাদা মন্ত্রণালয়সহ অন্তত কাগজে-কলমে বিশেষ প্রশাসনিক কাঠামো ও আইন হয়েছে। সেটা দেশের অন্যান্য অঞ্চলের আদিবাসীদের মনে বহুনা ও ক্ষোভ তৈরি করতে পারে। বিভিন্ন ক্ষেত্রে সংরক্ষিত সুযোগ-সুবিধা লাভেও অপেক্ষাকৃত বড় সুযোগসম্পন্ন জাতিগোষ্ঠীদের তুলনায় ক্ষুদ্রতর জাতিরা পিছিয়ে পড়ে। সাক্ষরতা, শিক্ষা, অর্থনৈতিক নিরাপত্তা—সব দিক থেকেই গোষ্ঠীগুলোর অবস্থার মধ্যে তুলনামূলক পার্থক্য আছে।

৩

ক্ষুদ্র জাতিসভার খবরাখবর প্রতিফলনে ঘাটতি

একটি বড় হেঁয়ালি : ক্ষুদ্র জাতিসভার জন্য জরুরি বিষয়গুলো এবং তাদের খবরাখবর গুরুত্ব দিয়ে প্রকাশ করা সাংবাদিকতার নৈতিক দায়িত্বের মধ্যে পড়ে। কিন্তু সংবাদমাধ্যমে এসব বিষয় এবং খবরাখবর উঠে আসায় ঘাটতি আছে। প্রতিফলনের এ ঘাটতির ধরন এবং কারণ বোঝা দরকার।

ঘাটতির ধরন : সংবাদমাধ্যমে ক্ষুদ্র জাতিসভার প্রতিফলনের ঘাটতি দিমুখী।

১. প্রতিফলনই কম : সংবাদমাধ্যমে সাধারণভাবে জায়গা বরাদ্দ কম। কখনো কখনো বড় কোনো ঘটনা বা উপলক্ষ থাকলে কিছু মাধ্যমে বিক্ষিণ্ডভাবে বড় জায়গা দেওয়া হতে পারে। তবে সেটা কোনো নিয়মিত প্রবণতা নয়। তা ছাড়া, প্রতিবেদনের বিষয়গুলো দেখলে প্রতিফলনের ধরনে ঘাটতির বিষয়টি সামনে চলে আসে। যেমন, প্রথম সারির ১১টি জাতীয় ও আঞ্চলিক দৈনিক পত্রিকার ২০০৭ সালের সেপ্টেম্বর মাসের সংখ্যাগুলো জরিপ করে এমআরডিআই আদিবাসী-সংক্রান্ত ১৯৯টি খবর পেয়েছে। এর বড় অংশটি ছিল সংস্কৃতিবিষয়ক এবং প্রকৃতি-পরিবেশের খবর ও ছবি।

২. প্রতিফলনের ধরন ন্যায্য নয় : জরুরি বড় বিষয়গুলো যথাযথ গুরুত্ব দিয়ে সঠিক প্রেক্ষাপটে তুলে ধরতে সংবাদমাধ্যম সচেষ্ট হয় না। ক্ষুদ্র জাতিসভাদের সম্পর্কে খবরাখবরের বড় অংশটি আসে সংবাদমাধ্যমের আধিক্যিক প্রতিনিধি/প্রতিবেদকদের কাছ থেকে। এমআরডিআইয়ের জরিপভুক্ত দৈনিকগুলোর সিদ্ধান্তগ্রহীতা সম্পাদক পর্যায়ের সংবাদকর্মী বা গেটকিপারদের অধিকাংশই বলেছেন, ক্ষুদ্র জাতিসভা প্রসঙ্গে তাঁরা তাঁদের জেলা-উপজেলা প্রতিনিধিদের দুই ধরনের খবর করতে সবচেয়ে বেশি বিশেষ নির্দেশনা দেন। এগুলো হচ্ছে :

- ✓ রাজনৈতিকসহ দাঙ্গা-হাঙ্গামা, বড় সংঘাত-সংঘর্ষ, সহিংসতা বা অপরাধ, যেটা দিনের খবর হিসেবেই গুরুত্ব পায়
- ✓ সাংস্কৃতিক অনুষ্ঠান-উৎসবের খবর

সংবাদমাধ্যমে এ ছাড়া বিক্ষিণ্ডভাবে আসে—দিনের বড় কোনো দুর্ঘটনা বা অনুষ্ঠানের খবর, আদিবাসী দিবসে গৃবাঁধা প্রতিবেদন বা আদিবাসী সমাজ-সংস্কৃতি নিয়ে ফিচার। এ ছাড়া, হয়তো বিশেষ দিবস উপলক্ষে হাতেগোনা কিছু পত্রিকায় ক্ষুদ্র জাতিসভার স্বার্থ-অধিকার নিয়ে সম্পাদকীয় ও উপ-সম্পাদকীয় দেখা যায়।

ক্ষুদ্র জাতিসভাদের বিষয়ে যে খবরগুলো আসে, সেগুলোতেও ঘাটতি থাকে :

- ✓ খবরগুলো প্রায়ই হয় ওপরভাসা ধারাবিবরণী ধাঁচের; অন্তর্দৃষ্টি বা দিকনির্দেশনা কম মেলে; সঠিক প্রেক্ষাপট মেলে না। কখনো ভুল তথ্য থাকে। এভাবে সংঘাত-সংঘর্ষের মতো জরুরি বিষয় প্রকাশিত হলেও অনেক সময় গুরুতর ঘাটতি থাকে।
- ✓ স্পর্শকাতর ও স্বার্থের দ্বন্দ্বমুখর খবর ঢাকা-চাপা দেওয়া বা বিকৃত করার মতো নেতৃত্বাচক প্রতিফলন দেখা যায়।
- ✓ ক্ষুদ্র জাতিসভার জীবনধারা, জীবিকা, সমাজ ও সংস্কৃতি সম্পর্কে ছাঁচে-ঢালা (স্টেরিওটাইপ/প্রেজুডিস করা) ঢালাও কিছু অযৌক্তিক ধারণা বা সুর উঠে আসে। যেমন—আদিবাসীরা সহজ সরল, বোকাসোকা; তারা অনগ্রসর, ‘অশিক্ষিত’; তারা সর্বভুক; আদিবাসীদের রীতিনীতি ‘অ-সভ্য’; তাদের জীবনযাপন ‘আদিম’...।
- ✓ কিছু কিছু সংবাদমাধ্যমে প্রত্যক্ষ বা পরোক্ষ ঢালাও নেতৃত্বাচক খবর দেখা যায়। যেমন, আদিবাসীরা বনের জমি দখল করছে।
- ✓ উল্টোদিকে ঢালাও কিছু ‘ইতিবাচক’ প্রতিফলনও দেখা যায়। যেমন, আদিবাসীরা যা-কিছুই করে তা সব ভালো। কখনো আবার ক্ষুদ্র জাতিসভার পক্ষে কোনো কিছু বাড়িয়ে বলা হতে পারে। সেটা সমান ক্ষতিকর-বিশ্বাসযোগ্যতা চলে যায়।

ঘাটতির কারণ : সংবাদমাধ্যমে ক্ষুদ্র জাতিসভার প্রতিফলনের এসব ঘাটতি দূর করতে হলে এর কারণগুলো বুঝতে হবে। এর কিছু কারণ নিহিত আছে সংবাদমাধ্যমের প্রাতিষ্ঠানিক চরিত্রে, মালিক-সম্পাদকীয় নীতিতে এবং ক্ষুদ্র জাতিসভার জন্য জরুরি বিষয়গুলোর অন্তর্গত ঝুঁকির মধ্যে :

- **গণমাধ্যম, গণপাঠক :** অধিকাংশ দৈনিক পত্রিকা বা গণমাধ্যম বিজ্ঞাপনের আয়ের ওপর নির্ভরশীল। বিজ্ঞাপনদাতা খোজেন পাঠক-কাটতি। গণমাধ্যমও সংখ্যাগরিষ্ঠ মানুষের গড়পড়তা চাহিদা ধারণা করে নিশ্চিত সাধারণ আগ্রহের বিষয়গুলোকে প্রাধান্য দেয়।
 - ✓ এভাবে খবরের প্রচলিত ধারণায় রাজনীতি আর বড় ব্যবসার খবর শুরুত্ব পায়, মানুষ গৌণ হয়ে যায়। তা ছাড়া এ দেশে সংখ্যাগুরু জনগোষ্ঠীর মানুষেরই সাধারণ সমস্যা অনেক। সংবাদমাধ্যমের সীমিত পরিসরে সেগুলো অগ্রাধিকার পায়।
 - ✓ ফলে সম্পাদকীয় সচেতন দৃঢ় নীতি-সিদ্ধান্ত না থাকলে ক্ষুদ্র জাতিসম্ভাব মতো বিশেষ কোনো গোষ্ঠীকে শুরুত্ব দেওয়া হয়ে ওঠে না। প্রতিফলনে একই ধারার কমবেশি ঘাটতি যেমন দেখি সার্বিকভাবে নারী, প্রতিবন্ধী বা প্রান্তিক ও সংখ্যালঘু যেকোনো গোষ্ঠীর ক্ষেত্রে।
 - ✓ এদিকে সংখ্যাগুরু গড়পড়তা জনগোষ্ঠীর মধ্যে ক্ষুদ্র জাতিসম্ভাব মতো ‘ভিন্ন’ সম্পর্কে নেতৃত্বাচক ছাঁচে-ঢালা ধারণা বা স্টিরিওটাইপ কাজ করে। ‘আমরা’ ও ‘তারা’—এভাবে বিভাজন থাকে। স্বার্থের দ্বন্দ্বও চলে আসে। পাঠক-কাটতির কথা মাথায় রেখে গণমাধ্যম নিরাপদ মধ্যপদ্ধা নেয়; সমাজের প্রবলতর মূল্যবোধ, স্বার্থচিন্তা বা ধারণায় তারা নাড়া দিতে চায় না।
- **ক্ষমতাশালীদের সঙ্গে টুকর :** বৈষম্যের শিকার ও সুযোগবঞ্চিত গোষ্ঠীর সমস্যা-সংকট জানাতে গেলে প্রায়ই তা রাষ্ট্রসহ বিভিন্ন ক্ষমতাকেন্দ্রের বিরুদ্ধে যায়। ক্ষুদ্র জাতিসম্ভাব বড় যেসব সমস্যা আগে চিহ্নিত করা হয়েছে, সেগুলোর অধিকাংশের ক্ষেত্রে এ কথা বিশেষভাবে খেটে যায়।
 - ✓ রাষ্ট্রের সঙ্গে ক্ষুদ্র জাতিসম্ভাব স্বার্থ-অধিকারের বিষয়গুলো নিয়ে জোরালো দ্বন্দ্ব যে আছে, তার আভাস পাই আদমশুমারিতে ক্ষুদ্র জাতিসম্ভাব সংখ্যা কম দেখানোর অভিযোগ থেকে এবং ‘আদিবাসী’ বনাম ‘উপজাতীয়’ নামের প্রশ্নে।
 - ✓ এসব স্বার্থ-অধিকারের বিষয়ে খবর করতে গেলে রুট প্রতিপক্ষ হয়ে দাঁড়ায় স্থানীয় দখলকামী-ক্ষমতাবান ও মান্তান থেকে শুরু করে বিজ্ঞাপনদাতা, পুলিশ-প্রশাসন ও সামরিক বাহিনীসহ রাষ্ট্রের বিভিন্ন প্রতিষ্ঠান, এমনকি বিদেশি দাতাগোষ্ঠীও।

সুতরাং সংবাদমাধ্যম কর্তৃপক্ষ পিছিয়ে যেতে পারে। সম্পাদকীয় নীতি ইতিবাচক থাকলেও হিসাবনিকাশ করে চলার নজির আছে। কখনো নিজেদের স্বার্থের প্রশ্ন চলে আসে।
- **নীতি, স্বার্থ, রাজনীতি :** সংখ্যাগুরু জনগোষ্ঠীর স্বার্থ ও বিশ্বাস-মূল্যবোধ এবং রাজনীতির প্রশ্ন ক্ষুদ্র জাতিসম্ভাব স্বার্থ-অধিকারের ব্যাপারে সম্পাদকীয় নীতিকে নেতৃত্বাচক করে। সংবাদ-প্রতিষ্ঠানের মালিকের স্বার্থ এমন প্রভাব ফেলতে পারে। সংখ্যালঘু ও সংখ্যাগুরু ধর্মকেন্দ্রিক দ্বন্দ্বের প্রভাবও পড়তে পারে—ক্ষুদ্র জাতিগোষ্ঠীর সদস্যরা মূলত বৌদ্ধ, খ্রিস্টান, হিন্দু বা সর্বপ্রাণবাদী আদি-ধর্ম অনুসারী।
 - ✓ ক্ষমতাশালীর সঙ্গে টুকরের বিবেচনা এবং নীতি-স্বার্থ-রাজনীতির দ্বন্দ্ব দুটোই বিশেষ প্রভাব ফেলতে পারে পত্রিকায় ক্ষুদ্র জাতিসম্ভাব প্রতি সহিংসতা ও মানবাধিকার লঙ্ঘনের খবরের ওপর। পত্রিকার নীতি নেতৃত্বাচক হলে এসব খবর চাপা দেওয়া থেকে শুরু করে কমিয়ে বা পক্ষ টেনে খবরকে রঞ্জিত বা

প্রভাবিত করার প্রবণতা থাকে। সংবাদমাধ্যমভেদে পার্বত্য চট্টগ্রামের বিভিন্ন ঘটনা উপস্থাপনে তারতম্য এর বড় উদাহরণ। সহিংসতার খবরে সাবধানতা নিতে গিয়েও এমন হতে পারে।

- ✓ নীতি ইতিবাচক হলেও নানা বিবেচনায় কখনো রাখাক আসে।
- **নীতি প্রয়োগে অবহেলা :** মালিক-সম্পাদকের নীতি ইতিবাচক হলেও প্রয়োগে তারতম্য হতে পারে। রোজকার সিদ্ধান্ত যে সংবাদকমীরা নেন, তাদের নিজস্ব নেতিবাচক মনোভাব থাকতে পারে। অথবা নিছক হেলাফেলা করা হতে পারে। এর প্রভাব পড়ে প্রতিবেদককে প্রাতিষ্ঠানিক সহযোগিতা-সমর্থন দেওয়ার ওপর।

ওপরে বলা কারণগুলো ব্যক্তি-সাংবাদিকদের কাজ ও চিন্তাভাবনাকে প্রভাবিত করে। ঘাটতির কারণ হিসেবে ব্যক্তি-সাংবাদিকের কিছু সীমাবদ্ধতার কথাও চলে আসে :

- **মনোভাব—অধিকাংশ প্রতিবেদক এবং খবরের সিদ্ধান্তগ্রহীতারা সংখ্যাগুরু জাতিগোষ্ঠীর সদস্য।** নিজের মনের মধ্যে লুকিয়ে থাকে ‘ভিন্ন’ সম্পর্কে নেতিবাচক বা বন্ধমূল ধারণা। হয়তো নিজের অগোচরে কাজে প্রভাব পড়ে।
- **ভয়, চাপ, প্রলোভন—নিজের ঝুঁকির বাস্তব ভয়, পুলিশ-সেনাবাহিনী-প্রশাসনসহ প্রতিপক্ষের চাপ এবং প্রলোভনের টোপ থাকে।** স্ব-আরোপিত নিয়ন্ত্রণ বা সেলফ-সেঙ্গরশিপ চলে আসে।
- **তথ্যের ঘাটতি—ক্ষুদ্র জাতিসম্প্রদায় ও তাদের জন্য জরুরি বিষয়গুলো সম্পর্কে জানা-বোঝায় ঘাটতি থাকে।** ভিত্তিজ্ঞান না থাকায় অনেক বিষয় যেমন নজরে পড়ে না, তেমনি প্রতিবেদন করতেও অনীহা আসে। অনেক সময় ক্ষুদ্র জাতিগোষ্ঠীর সঙ্গে যোগাযোগের অভাব থাকে, তাদের মধ্যে ভালো সূত্র থাকে না। স্পর্শকাতর বিষয়ে কর্তৃপক্ষ তথ্য ক্ষমতাকেন্দ্র তথ্য দেয় না, খোজাখুজিতে বাধাও দেয়। পুলিশ-গোয়েন্দা, সেনা কর্তৃপক্ষ খবর খাওয়াতে চায়। ভুক্তভোগীসহ সাধারণ মানুষ সংগত কারণেই মুখ খুলতে ভয় পায়।
- **প্রতিবেদকের উদ্যম-উদ্যোগে ঘাটতি—ক্ষুদ্র জাতিসম্প্রদায়ের সম্পর্কে খবরের খোঁজ পেতে এবং ভালো প্রতিবেদন করতে হলে গভীরে তলিয়ে কাজ করতে হয়।** এ কাজ সময় ও কষ্টসাপেক্ষ। উদ্যোগী হয়ে উপরিতলের নিচে খবর না খোঁজার প্রবণতা থাকে।
- **প্রতিষ্ঠানের সহযোগিতার অভাব—সংবাদমাধ্যম-কর্তৃপক্ষের নীতি নেতিবাচক হোক বা ইতিবাচক হোক,** প্রতিবেদককে এসব খবর করার জন্য প্রয়োজনীয় সময় দিতে চাওয়া হয় না। অনেক সময় কোনো ঘটনাস্থলে যাওয়া কঠিন ও খরচসাপেক্ষ। প্রতিষ্ঠান সব ক্ষেত্রে ঘোরাঘুরির খরচ দিতে চায় না। সবচেয়ে বড় কথা, প্রতিষ্ঠান নিরাপত্তার দায়িত্ব নিতে চায় না। প্রতিষ্ঠানের জোরালো সহযোগিতা ও সমর্থন না থাকলে ব্যক্তি-সাংবাদিক ঝুঁকি নিতে পারেন না।

করণীয় ও উপায় খোঁজা : প্রশ্ন হচ্ছে, সংবাদমাধ্যমে ক্ষুদ্র জাতিসম্প্রদায় ন্যায্য প্রতিফলন নিশ্চিত করতে ব্যক্তি-সাংবাদিক কী করতে পারেন। প্রথম সোপান, কঠিন এ কাজ করতে চাওয়া এবং বাধা বা সমস্যাগুলো দূর করার উপায় ভাবা। নিজের সীমাবদ্ধতাগুলো চিহ্নিত করুন, তলিয়ে ভাবুন, কাটিয়ে উঠুন। সর্বোচ্চ সাধ্যমতো সবটুকু চেষ্টা করবেন—এই লক্ষ্যে একাগ্র থাকুন। আন্তরিক সদিচ্ছা থাকলে পরিস্থিতিভেদে করণীয় ভেবে বের করতে পারবেন। সাংবাদিকতা পেশার দাবি, নীতি-নৈতিকতা এবং বুনিয়াদি করণীয়গুলো পথ দেখাবে।

পথের খোঝ ভালো সাংবাদিকতায়

সংবাদমাধ্যমে ক্ষুদ্র জাতিগোষ্ঠীর খবরাখবর প্রতিফলনের ঘাটতি দূর করা মানে কিন্তু ভালো ও নৈতিক (এথিক্যাল) সাংবাদিকতা বা ভালো প্রতিবেদন করা। মানবাধিকারসহ ক্ষুদ্র জাতিসভার জন্য জরুরি বিষয়গুলো এভাবে সাংবাদিকতার মূল আঙ্গিকের মধ্যে চলে আসবে।

প্রাতিষ্ঠানিক সমস্যাসহ প্রতিফলনে ঘাটতির কারণগুলো ছেট করে দেখার কোনো সুযোগ নেই। কিন্তু ব্যক্তি-প্রতিবেদকের নিজস্ব একটা দায় এবং তাগিদ থাকে।

- নিজের নিরাপত্তা যথাসম্ভব নিশ্চিত করা প্রথম কথা। তার পরও কিছু বুঁকি নিতে হয়। চাপ-প্রলোভন জয় করতে হয়। পত্রিকা-কর্তৃপক্ষকে বোৰানোর চেষ্টা করতে হয়। মন খোলা রেখে জানা ও বোৰা বাঢ়াতে হয়। ঘটনা ও মানুষের প্রতি সংবেদনশীল থাকতে হয়। এবং উদ্যমী হয়ে ভালো প্রতিবেদন করতে হয়।
- সাংবাদিকতার লক্ষ্য মানুষের কাজে লাগা এবং নিজের সাধ্যমতো চেষ্টা করলে সাংবাদিকতা ভালো ফল আনবে। এই লক্ষ্যে বিশ্বাস করুন এবং মানুষের ওপরে আস্থা রাখুন।
- সংবাদমাধ্যমের সবচেয়ে বড় শক্তি পাঠক বা শ্রোতা-দর্শকের সমর্থন। সংখ্যাগরিষ্ঠ মানুষের গড়পড়তা আগ্রহের বাঁধা ধারণাই শেষ কথা নয়। খবরের গ্রাহকেরা সংবেদনশীল। তবে তাদের আগ্রহ ও যুক্তির কাছে সাড়া জাগাতে পারতে হয়; তাদের সজাগ করতে হয়। ক্ষুদ্র জাতিসভার মানুষের খবরাখবর যদি ভালো সাংবাদিকতার চাহিদাগুলো পূরণ করে উপস্থাপিত হয়, অনেক মানুষই তাতে আগ্রহী হবে। খবরের যথেষ্টসংখ্যক গ্রাহক যা চাইবে বা গ্রহণ করবে, সংবাদমাধ্যমও তা চাইতে বাধ্য হবে।
- যার সমস্যা, যার কথা, তার তাগিদ সবচেয়ে বেশি। ক্ষুদ্র জাতিসভার মধ্য থেকে যিনি সাংবাদিকতায় আসবেন, তাঁর আন্তরিকতা ও চেষ্টার তাই একটি স্বতন্ত্র মাত্রা থাকবে। কিন্তু তাঁকে খুব সতর্ক থাকতে হবে, তিনি যেন নিজেকে ‘আদিবাসী সাংবাদিক’ জাতীয় কোনো খোপে আটকে না ফেলেন। ভালো সাংবাদিকতা এবং কেবলমাত্র ভালো সাংবাদিকতার প্রতি একনিষ্ঠ থাকলেই তিনি তাঁর অন্তর্গত তাগিদ সবচেয়ে ভালোভাবে পূরণ করতে পারবেন।

ভালো সাংবাদিকতা, ভালো প্রতিবেদন

- ঘটনা ঘটার জন্য বসে থাকবেন না। গভীরে তলিয়ে দেখে প্রতিবেদনের বিষয় ভাবুন।
- উপরিতলের নিচের খবর খুঁজতেই হবে। অনেক ঘোৱাঘুরিও করতে হবে। তথ্য পাওয়া কঠিন কিন্তু হাল ছাড়া চলবে না। ঘটনার কারণ-ফলাফল-তাৎপর্য জানতে হবে এবং সেগুলো তথ্য-প্রমাণসহ মানবজমিনে দেখাতে, জানাতে ও বোৰাতে হবে।

- নিজে অনুসন্ধানের পরিকল্পনা করুন। ছোটখাটো জরিপ বা গবেষণাও করে ফেলতে পারেন।
- নজর রাখুন, কোথায় ক্ষোভ-অসন্তোষ জমছে। প্রতিবেদক যদি সজাগ ও ওয়াকিবহাল থাকেন, তবে তিনি ঘটনা-প্রবণতার ধারা সঠিকভাবে তুলে ধরে অনেক সংঘাত-সংঘর্ষ, সহিংসতা বা মানবিক বিপর্যয়ের পূর্বাভাস দিতে পারেন।
- ক্ষুদ্র জাতিগোষ্ঠীদের সম্পর্কে মানুষ অনেক কিছুই জানে না বা ভুল জানে। সঠিক তথ্য দিয়ে সেগুলো দূর করা জরুরি।

প্রস্তুতিপর্ব

প্রস্তুতি ভালো না হলে যেকোনো বিষয়েই ভালো প্রতিবেদন করা কঠিন। এ ক্ষেত্রে প্রস্তুতির কয়েকটি গুরুত্বপূর্ণ দিক :

- **মন তৈরি করা :** ক্ষুদ্র জাতিসম্পর্কে ভালো প্রতিবেদন করার জন্য নিজের মনের প্রস্তুতি দরকার। দুটি মূল কথা—
 - ✓ নিজের ছাঁচে-ঢালা ধারণাগুলো বা স্টিরিওটাইপ/প্রেজুডিস সম্পর্কে সজাগ থাকা, সাবধান থাকা চাই। দেখা এবং লেখায় যেন এর প্রভাব না পড়ে।
 - ✓ অন্যদিকে, সংযম অত্যাবশ্যক। সুযোগবৃক্ষিত বা অন্যায়-অত্যাচারের শিকার গোষ্ঠীর প্রতি সংবেদনশীলতা বা সেনসিটিভিটি ও প্রয়োজনীয় সহমর্মিতা থাকবে, কিন্তু সেটা অযৌক্তিক বা প্রচারণাধর্মী যেন না হয়। আবেগের বশে ‘আহা বেচারা’ দৃষ্টিভঙ্গও বাঞ্ছনীয় নয়।
- **ভিত্তিজ্ঞান :** ভালো ভিত্তিজ্ঞান বা ব্যাকগ্রাউন্ড তথ্য জানা থাকা দরকার। এ জ্ঞান নিয়মিত হালনাগাদ করা দরকার। বাংলাদেশের ক্ষুদ্র জাতিসম্পর্কে, তাদের সমস্যা ও বৈশিষ্ট্য সম্পর্কে সাধারণ ধারণা রাখুন। ভূমি, বন, পরিবেশ ও আদিবাসী এলাকায় উন্নয়ন প্রকল্পগুলো সম্পর্কে ওয়াকিবহাল থাকুন। আন্তর্জাতিক ও জাতীয় আইন, বিধিবিধান, তাদের অধিকারের স্বীকৃতি ও বড় ঘটনাগুলো জানুন।
 - ✓ বাংলাদেশের ক্ষুদ্র জাতিসম্পর্কে গবেষণা ও বইপত্রের ক্রমতি আছে। অতীতের তথ্য জানার জন্য সরকারের জেলা গেজেটিয়ারগুলো দেখতে পারেন। বইপত্র থেকে তথ্য নিতে গেলে দেখবেন, সেগুলো নৃবিজ্ঞানীদের লেখা কি না এবং যথাযথ গবেষণা কি না। শখের লেখকের লেখায় অনেক ভুল থাকতে পারে। বাংলাপিডিয়ার কিছু তথ্যও ভুল, বিআন্তিকর ও আপত্তিকর বলে নজির ও জোরালো অভিযোগ আছে।
 - ✓ ক্ষুদ্র জাতিসম্পর্কের নিজস্ব সংগঠন ও সংস্থার কাছ থেকে তথ্য নেবেন, তবে সেগুলো অন্যান্য সূত্রেও যাচাই করবেন। বিভিন্ন এনজিওর বেশকিছু প্রকাশনা আছে। তার কিছুতে ছাঁকা তথ্য থাকলেও আদিবাসী প্রশ্নে সাধারণভাবে এমন যেকোনো সংস্থার অবস্থান বিচার করে দেখবেন এবং অবশ্যই পাল্টাপাল্টি যাচাই করবেন।

- ✓ এডিবি, ইউএনডিপি, বিশ্বব্যাংক, ডিএফআইডি-ইত্যাদি দাতারা বা অন্য এনজিওগুলো ক্ষুদ্র জাতিসম্ভা-সংশ্লিষ্ট বিষয়ে বিভিন্ন সময়ে যেসব সমীক্ষা ও প্রকল্প করেছে সেগুলোর কাগজপত্র হাতে রাখুন, হালনাগাদ করুন। সরকারি সংস্থা বা প্রশাসনের কাছ থেকে যেসব কাগজপত্র পাওয়া কঠিন, বেসরকারি সংস্থা-প্রতিষ্ঠানগুলো থেকে তার অনেকগুলো সহজে পাওয়া যেতে পারে। ক্ষুদ্র জাতিসম্ভা নিয়ে কাজ করা এনজিও/সিবিওগুলোর কাছে এমন কাগজপত্র মিলতে পারে। তাদের নেতাদের কাছেও থাকতে পারে।
- ✓ নথিপত্র, প্রকাশিত পর্যোচনা-সমালোচনা-মূল্যায়ন দেখবেন। যথোপযুক্ত বিশেষজ্ঞদের কাছে বুঝে নেবেন; মতপার্থক্য থাকা স্বাভাবিক, তাই সবগুলো মত সম্পর্কে জানবেন। সরেজমিন নিজে দেখবেন।
- ✓ মাঝেমধ্যেই সরেজমিনে ঘুরে নিজের এলাকার সবগুলো ছেটবড় ক্ষুদ্র জাতিসম্ভার পরিস্থিতি দেখবেন। জানা-বোঝা হালনাগাদ করবেন।
- **সূত্র গড়া ও রক্ষা করা :** সংশ্লিষ্ট বিভিন্ন মহলে সূত্র গড়বেন। সূত্র গড়া ও রক্ষা করার ভিত্তি হচ্ছে আস্থার সম্পর্ক তৈরি করা। আস্থা পেতে হবে সব পক্ষের।
 - ✓ আপনি সত্যনিষ্ঠ এবং কারও পক্ষ হয়ে কাজ করছেন না, কিন্তু আপনার অবস্থান নেতৃত্ব এবং সংবেদনশীল—নিজের কাজের মধ্য দিয়ে এ সুনাম ও বিশ্বাস তৈরি করবেন। সব মহলে সূত্র গড়ার সাহায্য হবে।
 - ✓ কারও বক্তব্য বা কথার যেন বিকৃত উপস্থাপন না হয়, সে ব্যাপারে বিশেষ সতর্ক থাকবেন। এমনটা হলে আপনার নিজের ঝুঁকি এবং কাজের সমস্যা বাঢ়বে।
 - ✓ আদিবাসীদের নেতা, তাদের বিভিন্ন সংগঠন ও মোর্চা এবং এনজিও/সিবিওর সঙ্গে যেমন যোগাযোগ রাখবেন, তেমনি সাধারণ মানুষের পর্যায়ে সূত্র রাখুন। আদিবাসী এলাকায় বসবাসকারী নানা স্তরের এবং নানা মতধারার বাঙালিদের মধ্যেও সূত্র রাখুন।
 - ✓ সূত্র গড়বেন প্রশাসন, পুলিশ ও সামরিক কর্তৃপক্ষের মধ্যে, প্রাসঙ্গিক তেল-গ্যাস কোম্পানিগুলোয়, চার্চ বা ধর্মীয় প্রতিষ্ঠানে, উন্নয়নকর্মীদের মধ্যে। ক্ষুদ্র জাতিসম্ভা নিয়ে যাঁরা সমীক্ষা-গবেষণা করেন, তাঁদের সঙ্গে নিয়মিত যোগাযোগ রাখুন।
 - ✓ নানা পর্যায়ের এবং নানা পক্ষের সূত্রের সঙ্গে নিয়মিত আলাপ জারি রাখলে অনেক নতুন প্রতিবেদনের ধারণা পাবেন। এসব সূত্র তথ্য পাল্টাপাল্টি যাচাইয়ের জন্য বিশেষ কাজে আসবে।
- **ইন্টারনেট :** ইন্টারনেট ব্যবহারের সুবিধা থাকলে তার পুরো সম্বুদ্ধ করুন। কিন্তু সাবধান। ইন্টারনেটের তথ্যে নিজের পর্যবেক্ষণ এবং অন্য সূত্রে পাল্টাপাল্টি যাচাই করবেন। আদিবাসী-সংগ্রাম বা আদিবাসীদের নিয়ে কাজ করা সংস্থা-সংগঠন-আন্দোলনের ওয়েবসাইটে অধিকারবন্ধনা, মানবাধিকার লজ্জন নিয়ে আন্দোলনের ভাষ্য ভালো থাকে। কিন্তু সেটাকে এক পক্ষের বক্তব্য হিসেবেই নেবেন। এসব ওয়েবসাইটের তথ্য যাচাই করা অত্যাবশ্যক হবে।

- **তথ্য-প্রমাণ হাতে রাখা, নোট দেওয়া :** পরিষ্কার তারিখ দিয়ে খাতায় ধারাবাহিকতা রেখে নোট দেবেন। তবে সূত্রের নিরাপত্তার প্রশ্ন থাকলে বা গোপনীয়তার শর্তে রাজি হয়ে কারও সঙ্গে কথা বললে তার নাম-ঠিকানা নোট খাতায় রাখবেন না। নিজে কী দেখছেন সেটাও নোট করুন। কাগজ-প্রমাণপত্র চাইবেন এবং হাতে রাখবেন।

অত্যাশ্যক বুনিয়াদি করণীয়

যেকোনো প্রতিবেদন তথা সার্বিকভাবে সাংবাদিকতায় কিছু বিষয় নিশ্চিত করতে হয়। এ বুনিয়াদি কাজ বা উপাদানগুলো ছাড়া ভালো প্রতিবেদন হয় না।

- ✓ **সঠিক ও সত্য তথ্য দেওয়া।** তথ্য ভুল বা মিথ্যা হলে স্কুল জাতিসংগঠন খবর প্রকাশে হিতে বিপরীত হয়ে যাবে। স্পর্শকাতর এই বিষয়ে সংবাদের আপামর গ্রাহকের আস্থা ও সমর্থন চট করে নষ্ট হয়ে যাওয়ার ভয় থাকে।
- ✓ **যাচাই করা।** জটিল বিষয়, বিতর্ক আছে, স্বার্থান্বেষী পক্ষ আছে অনেক। স্কুল জাতিসংগঠন প্রতিনিধিরাসহ যে-কেউ নিজের পক্ষ টেনে আংশিক বা ভুল তথ্য দিতে পারে। উদ্দেশ্যপ্রণোদিতভাবেও এটা করা হতে পারে। যা কিছুই নিজে নিশ্চিত জানেন না, তালিয়ে পাল্টাপাল্টি যাচাই বা ক্রস-চেক করবেন।
- ✓ **সূত্র উল্লেখ বা বরাত দেওয়া।** কোন তথ্য কার কাছ থেকে/কোন উৎস থেকে পেয়েছেন অথবা কোন বক্তব্য কার—সেটা অবশ্যই জানাতে হয়। স্কুল জাতিসংগঠন সম্পর্কে খবরাখবরে যেহেতু নানা রকম বুঁকি ও নিরাপত্তার ভয় থাকে, ঘটনায় জড়িত মানুষজন বা তথ্যসূত্র প্রায়ই গোপনীয়তা চান। আপনাকেও তাঁর/তাঁদের নিরাপত্তার কথা ভাবতে হয়। এ ক্ষেত্রে তাই আপনাকে বেশিসংখ্যক সূত্রের কাছ থেকে তথ্য নিয়ে কোনো একটি উল্লেখ করার সুযোগ খুঁজতে হবে। তথ্যের সূত্র বা উৎস যথাসম্ভব সুনির্দিষ্ট করতে কৌশলী হতে হবে। যথাসম্ভব নিজে সরেজমিন দেখলে যাচাই ও তথ্যসূত্র উল্লেখ নিয়ে ঝাঁঝাট কর হবে।
- ✓ **বক্তৃনির্ণয়তা ও সত্যনির্ণয়তা নিশ্চিত করা।** প্রতিবেদন বা যেকোনো লেখা হতে হবে তথ্য-প্রমাণভিত্তিক, যথাযথ প্রেক্ষাপটে পূর্ণাঙ্গ বিবরণ।
- ✓ **পক্ষপাতশূন্যতা ও ন্যায্যতা (ইমপার্শিয়ালিটি ও ফেয়ারনেস)** এবং ভারসাম্য নিশ্চিত করা। ঘটনায় অত্যাবশ্যকভাবে জড়িত সবগুলো পক্ষের বক্তব্য এবং সবগুলো দিক তুলে ধরতে হবে। একপেশে হলে চলবে না। সাংবাদিকের ব্যক্তিগত পক্ষপাত, মতামত বা মূল্যায়ন বাস্তুনীয় নয়। তবে ভারসাম্য মানে সমান-সমান উপস্থাপন না; পক্ষপাতশূন্যতা মানেও ন্যায়-অন্যায় নিরপেক্ষতা নয়। এসব নিশ্চিত করতে হবে তথ্য-প্রমাণের ভিত্তিতে বাস্তবানুগ অনুপাতে।
- ✓ **মানবিক প্রেক্ষাপট।** ঘটনা মানুষকে কেন্দ্র করে ঘটে, ঘটনার দাম মানুষের প্রয়োজন ও আগ্রহের জন্য। সে জায়গা থেকে ঘটনা দেখতে হয়; সে দিকগুলো এবং ঘটনার সঙ্গীব আবহ ফুটিয়ে তুলতে হয়। জড়িত মানুষজন, তাদের অভিজ্ঞতা, প্রয়োজন—এসব প্রত্যক্ষ করে তুললে সংবাদের গ্রাহক ঘটনার সঙ্গে অন্যায়সে সম্পৃক্ষ হতে পারবেন। বাস্তবতা এবং তার তাৎপর্যও এভাবে সহজে বুঝিয়ে দেওয়া সম্ভব।

- ✓ সুস্পষ্ট, সংক্ষিপ্ত, সুলিখিত। যেকোনো লেখায় এ গুণগুলো না থাকলে তা সুপার্শ্য হয় না। ভুল বোঝার অবকাশও থাকে। ক্ষুদ্র জাতিসভার খবরের গ্রহণযোগ্যতা ও বোধগম্যতা অনেকখানি নির্ভর করবে সুচারু উপস্থাপনের ওপর।
- ✓ দায়িত্বশীলতা—সাংবাদিকের দায়িত্বশীলতার প্রশ্নটি তাঁর সব কাজের সঙ্গে ওতপ্রোত জড়ানো। তাঁর কাজের ফলাফল বা প্রতিক্রিয়া ব্যাপক ও গভীর হতে পারে। ক্ষুদ্র জাতিসভার প্রসঙ্গে এ দায়িত্ব বহুগুণ বাড়ে। জড়িত সব পক্ষের প্রতি ন্যায্যতার দায়িত্বও এখানে বড়।

মনে রাখুন : কয়েকটি কথা আলাদা করে মনে রাখতে বলব।

- ✓ ঢালাও না : সুনির্দিষ্ট তথ্য-বক্তব্য চাই। ঢালাওভাবে কিছু বলা যাবে না।
- ✓ অতি-সরল করা নয় : একইভাবে, অতি-সরল বা অতি-সাধারণী (ওভার-সিম্পলিফিকেশন বা ওভার-জেনারেলাইজেশন) করে কোনো বিষয় বা সমস্যা উপস্থাপন করা যাবে না। ছাঁচে-ঢালা ধারণা বা স্টিরিওটাইপ থেকে এমন হতে পারে। আবার ভাবালুতা থেকেও এটা ঘটা সম্ভব। বুঝতে হবে যে সংবেদনশীলতা আর ভাবাবেগে আপুত হওয়া এক জিনিস না।
- ✓ সম্পাদনায় সাবধানতা : সম্পাদনা পর্যায়ে প্রতিবেদনে কিছু রদবদল হয়। সম্পাদনাকারী এবং খবরের গেটকিপারদের দায়িত্ব, সেই পর্যায়েও প্রতিবেদনের অবশ্যকরণীয়গুলো নিশ্চিত করা। বিশেষ সতর্কতা দরকার, কেননা সম্পাদনা পর্যায়ে ভুল-ক্রটি-বিভ্রান্তি হলে তার ঝাপটা এসে পড়ে মাঠের প্রতিবেদকের ওপর।
- ✓ ভুল স্বীকার, প্রতিবাদ ছাপানো : তথ্যগত বা যেকোনো ভুল প্রকাশিত হলে পরদিন বা যথাসম্ভব দ্রুত তা স্বীকার করে পাঠক-শ্রোতা-দর্শকের নজরে পড়ার মতো জায়গায় বা সময়ে সঠিক জিনিসটি গুরুত্ব দিয়ে প্রকাশ করতে হবে। প্রকাশিত বিবরণে কেউ আপত্তি জানালে, এর প্রতিবাদ করলে বা কোনো ব্যাখ্যা দিলে সেটাও এভাবে গুরুত্ব দিয়ে প্রকাশ করতে হবে। প্রতিবাদ যদি ভুল বা মিথ্যা হয়, তবু এটা করতে হবে; তবে সে ক্ষেত্রে অবশ্যই পাল্টা উভর ও তথ্য-প্রমাণ তুলে ধরতে হবে।

সবগুলো উপায় ব্যবহার : সংবাদমাধ্যমে কোনো বিষয় তুলে ধরার যতগুলো উপায় আছে, সবগুলোর সম্বয়বহার করা জরুরি।

- ✓ সংবাদ প্রতিবেদন, বিশেষত গভীরতাধর্মী অনুসন্ধানী ও ব্যাখ্যামূলক ‘বিশেষ’ প্রতিবেদন, সাক্ষাৎকারভিত্তিক প্রতিবেদন, ধারাবাহিক প্রতিবেদন
- ✓ ফিচার, ছবি-ফিচার
- ✓ উপ-সম্পাদকীয় ও নিবন্ধ
- ✓ রেডিও-টিভির ক্ষেত্রে রুটিন সংবাদ আর ফিচার ছাড়াও পর্যালোচনা ও আলোচনার অনুষ্ঠান বা টক-শো

- ফলো-আপ : খুব জরুরি, একটা বিষয়ে লেগে থাকা এবং প্রয়োজনীয় পরবর্তী-প্রতিবেদন বা ফলো-আপ প্রতিবেদন করা।
- পেগ বা উপলক্ষ : দিবস বা উপলক্ষ খেয়াল রাখুন। সেগুলো লক্ষ্য করে সময় থাকতে প্রাসঙ্গিক প্রতিবেদনের প্রস্তাব দিন, সম্পাদকেরা গ্রহণ করবেন। একটু বড় জায়গা পাওয়ার সুযোগ পাবেন। এমন দিবস বা উপলক্ষ যে কেবল আদিবাসী-সংশ্লিষ্ট হতে হবে তা নয়।
 - ✓ ২১ ফেব্রুয়ারি উপলক্ষে আপনি কোনো জাতিসভার ভাষাসংক্রান্ত পরিস্থিতি খতিয়ে দেখতে পারেন। ১৬ ডিসেম্বরের আগে থেকে মুক্তিযুদ্ধে আদিবাসী কোনো জনগোষ্ঠীর ভূমিকার তথ্য জানাতে পারেন।
 - ✓ আদমশুমারির আগে দিয়ে আদিবাসী জনসংখ্যা নিয়ে খবরাখবর করতে পারেন। অতীতে ভোটার নিবন্ধনে ক্রতি থাকলে নির্বাচনের আগে সেটার কথা জানান দিতে পারেন। জাতীয় বাজেট ঘোষণার আগে বা পরে কোনো ক্ষুদ্র জাতিসভাদের উন্নয়নের জন্য বরাদ্দ ও প্রয়োজনের বিষয় নিয়ে লিখতে পারেন।

এভাবে সময়োপযোগী কোনো ঘটনার সূত্র ধরে অথবা চলতি আগ্রহের যেকোনো প্রেক্ষাপটে ক্ষুদ্র জাতিসভার জন্য জরুরি বিষয়গুলো প্রাসঙ্গিক হয় কি না, তা খেয়াল রাখুন। তবে গৎবাঁধা প্রতিবেদন করবেন না।

সম্পাদকীয় নীতি ও সাংবাদিকের ভূমিকা : ক্ষুদ্র জাতিসভার বিষয়ে সম্পাদকীয় নীতি যা-ই হোক, প্রতিবেদকের নিজের চেষ্টা ও লেগে থাকা বিশেষ গুরুত্বপূর্ণ।

- ধরা যাক, ক্ষুদ্র জাতিসভার খবরাখবর সম্পর্কে আপনার প্রতিষ্ঠানের সম্পাদকীয় নীতি নেতৃত্বাচক। তখন আপনাকে কৌশলী হতে হবে। আমরা দেখেছি, সাধারণভাবে সংবাদমাধ্যম ক্ষুদ্র জাতিসভা সম্পর্কে সংঘাত-সংঘর্ষ-সহিংসতা, সাংস্কৃতিক খবরাখবর, কিছু জীবনধারাভিত্তিক ফিচার, দিনের বড় ঘটনা, বড় কোনো বিপর্যয়ের খবর প্রকাশ করতে আগ্রহী থাকে। এই খবরগুলোতেই আপনাকে জরুরি বাস্তবতা তুলে ধরতে হবে, গভীরে যেতে হবে। সম্পাদকীয় নীতি নেতৃত্বাচক হলে সেটাই হয়তো আপনার একমাত্র উপায়।
- এমনও হতে পারে যে, সম্পাদকীয় নীতি ইতিবাচক কিন্তু তা অনুসরণে হেলাফেলা আছে। আপনাকে তখন ডেক্স, মফস্বল সম্পাদক, বার্তা-সম্পাদক বা সুযোগ থাকলে স্বয়ং সম্পাদককে বুঝিয়ে মানাতে হবে। এভাবে নিজের যুক্তি বুঝিয়ে কোনো বিষয়ে প্রয়োজনীয় সিদ্ধান্ত নিশ্চিত করা ব্যক্তি-সাংবাদিকের দায়িত্বের মধ্যে পড়ে। টাঙ্গাইলের মধুপুরে ইন্ডেফাক প্রতিনিধি যেমন বলেছেন, আগে প্রতিবেদনে তিনি ‘আদিবাসী’ শব্দটি লিখলেও সম্পাদনার সময় তা বাদ পড়ে যেত; এ নিয়ে এলাকার আদিবাসী নেতৃত্ব মনে কষ্ট পেতেন। সুযোগমতো তিনি খোদ সম্পাদককে বুঝিয়ে বলে এ শব্দটির ব্যবহার নিশ্চিত করেন।
- প্রতিবেদক তথা সাংবাদিকের দিক থেকে তাগিদ না থাকলে অনেক সময় স্বেচ্ছ বেখেয়ালেই খবর করা হয় না। একইভাবে তিনি যদি নিজে থেকে পিছিয়ে যান বা নিয়ন্ত্রণ আরোপ করেন, তা হলে কোনো কিছু প্রকাশের সম্ভাবনা অঙ্কুরেই নষ্ট হয়। আপনার বিবেচনায় প্রকাশ করা জরুরি মনে হলে সম্পাদক/প্রযোজককে জানাবেন। সেটা যেন প্রকাশিত হয় সেজন্য সচেষ্ট থাকবেন, নিজের যুক্তিগুলো বোঝাবেন, লেগে থাকবেন।

সংবাদমাধ্যমের প্রাতিষ্ঠানিক ভূমিকা : ক্ষুদ্র জাতিসভার সঙ্গে সংবাদমাধ্যমের দূরত্ব দূর করার জন্য সম্পাদকীয় নীতি-সিদ্ধান্ত গুরুত্বপূর্ণ বিষয়।

- নৈতিকতার ভিত্তিতে পরিষ্কার নীতিগত অবস্থান দরকার; সেটা কাজে প্রয়োগ হচ্ছে কি না সেদিকেও সজাগ দৃষ্টি চাই।
- নীতি ভিন্ন হলেও সংবাদে সত্যনিষ্ঠ থাকা দরকার। সংবাদকে প্রভাবিত বা বিকৃত করলে কিন্তু বৃহস্তর পাঠক-শ্রেণী-দর্শকের আস্থা মিলবে না।
- বিশেষ মনোযোগ দরকার সহিংসতা, সংঘাত-সংঘর্ষের খবরে। এগুলো যেন উসকানিমূলক না হয় এবং সঠিক প্রেক্ষাপটে যথাযথ সত্য যেন জানানো হয়।
- মাঠের প্রতিবেদককে গুরুত্ব দেওয়া এবং প্রয়োজনীয় সব রকম সহযোগিতা দেওয়া দরকার। মাঠের প্রতিবেদকের জন্য কোনো বিশেষ খবর করা বুঁকিপূর্ণ হলে তাঁর সঙ্গে পরামর্শ করে জেলা বা ঢাকার সাংবাদিককে পাঠিয়ে খবরটি করানো যায়।
- প্রতিবেদক এবং সম্পাদনাকারীদের ক্ষুদ্র জাতিসভা বিষয়ে প্রশিক্ষণের ব্যবস্থা করা জরুরি। ক্ষুদ্র জাতিসভার প্রতিনিধি এবং তাদের বিষয়ে গবেষক বা উন্নয়নকর্মীদের সঙ্গে সময় সময় পত্রিকার বিভিন্ন বিভাগের সাংবাদিকদের আলাপ-আলোচনার সুযোগ করে দেওয়া যায়।
- খুবই জরুরি হচ্ছে, ক্ষুদ্র জাতিসভার সাংবাদিকদের যোগ্যতার ভিত্তিতে বা গড়েপিটে নেওয়ার সুযোগ রেখে নিয়োগ দেওয়া।

৫

প্রতিবেদন করার সুযোগ

এর আগে আমরা ক্ষুদ্র জাতিসভার জন্য জরুরি বিষয়গুলো মোটা দাগে দেখেছি। সেগুলো ধরে বৈচিত্র্যপূর্ণ অনেক খবর করার সুযোগ আছে; সাংবাদিকের দেখা দরকার, এমন বিষয়ের থই মিলবে না।

- আছে ভূমির অধিকার থেকে শুরু করে সরকারি নীতির সঙ্গে দ্বন্দ্ব, সংঘাত-সংঘর্ষ, আইনগত সুরক্ষার প্রশ্ন।
- দারিদ্র্য, জীবিকার অভাব বা সংকটের সঙ্গে অনেকগুলো বিষয় জড়িয়ে আছে। জুমচাষের মতো পেশাগত জীবিকা নিয়ে যে বিতর্ক চলে, তার গভীরে খতিয়ে দেখার গুরুত্ব আছে। দুর্গমতার কারণে সৃষ্টি প্রাতিকতার সমস্যাগুলো দেখার আছে।
- আছে সমাজ-সংস্কৃতি ও জীবনাধারার নানা দিক। এর সমস্যা ও সংকট যেমন আছে, তেমনি রয়েছে আকর্ষণীয় বর্ণাল্য দিক। অঞ্চলে অঞ্চলে আদিবাসীদের ঐতিহ্যিক বুনন ও হস্তশিল্প দেখার আছে।

- কোনো জনজীবনই কেবল সমস্যা-সংকটের নয়। লোকায়ত জ্ঞানের গভীরে নজর দিলে আকর্ষণীয় প্রতিবেদন ও ফিচার হবে। ব্যক্তি ও গোষ্ঠীগত সাফল্য, উন্নয়ন ও বিজয়ের খবরের আলাদা আকর্ষণ আছে। এগুলো খবর হিসেবেও গুরুত্বপূর্ণ। তবে বাস্তবে সমস্যা ও আশাব্যঙ্গক খবরের যে অনুপাত আছে, সংবাদমাধ্যমে প্রতিফলনের সময় সেটা অনুসরণ করতে হবে। কেবল ইতিবাচক খবর প্রকাশ করে চললে মনে হবে এদের কোনো সমস্যা নেই; সেটা মিথ্যা দেখানো হবে।

মনে রাখুন

আদিবাসীদের মধ্যেও দুটি অংশ বিশেষভাবে উপেক্ষিত : ক্ষুদ্রতর জাতিসভারা ও সমতলের আদিবাসীরা। এদের উপেক্ষা করলে প্রতিফলনে বড় রকম ঘাটতি থাকবে।

ক্ষুদ্রতর জাতিসভা

পার্বত্য চট্টগ্রামের চাকমা, মারমা বা ত্রিপুরা, টাঙ্গাইল-ময়মনসিংহের গারো, সিলেটের মণিপুরি বা খাসিয়া—এমন বড় কিছু জাতির খবর কিছুটা হলেও সংবাদমাধ্যমে আসে। এদের ঘিরে রাজনৈতিক বা অন্যান্য বড় ঘটনার দ্বন্দ্ব থাকে এবং এদের সাংস্কৃতিক বর্ণাচ্যতা চট করে চোখে পড়ে। ক্ষুদ্র জাতিসভাদের মধ্যে যারা ক্ষুদ্রতর, সংবাদ-মাধ্যমে তাদের কথা কিন্তু খুব কম আসে।

যত দুর্গম বা প্রত্যন্ত এলাকা, যত ছোট গোষ্ঠী, তত ফাঁকে পড়ে যাওয়ার সম্ভাবনা। আবার যাতায়াতের নাগালের মধ্যে থাকলেও ক্ষুদ্রতর জাতিরা উপেক্ষিত হয়। এদের প্রতি নজর দিতে সাংবাদিককে বিশেষ যত্নবান ও সজাগ হতে হবে। এরাই কিন্তু প্রশাসন ও উন্নয়নকর্তাদের কাছেও অবহেলিত থাকে।

এদের কথা না এলে সংবাদমাধ্যমে ক্ষুদ্র জাতিসভার প্রতিফলনে বড় ঘাটতি রয়ে যাবে। এমন ক্ষুদ্রতর জাতিগোষ্ঠী আছে প্রায় সব অঞ্চলে। টাঙ্গাইলে যেমন কোচ আর হাজৎ; সিলেটে পাত্র; পার্বত্য চট্টগ্রামে চাকমা, মারমা বা ত্রিপুরা বাদে অন্য জাতিগোষ্ঠীগুলো। সিলেট অঞ্চলের চা-শ্রমিক জনগোষ্ঠীরাও এ বিবেচনার দাবিদার।

সমতলের আদিবাসী

একই রকম উপেক্ষার শিকার সমতলের আদিবাসীরা। রাজনৈতিক ঘটনাবলির পরিপ্রেক্ষিতে, বৈচিত্র্যের আকর্ষণে, পার্বত্য চট্টগ্রামের অপেক্ষাকৃত ছোট দু-একটি গোষ্ঠী তবু হয়তো মনোযোগ পায়। কিন্তু সমতলের বড় গোষ্ঠীও সাংবাদিকের নজরের আড়ালে রয়ে যায়। সাঁওতালেরা যেমন বাংলাদেশের দ্বিতীয় বৃহত্তম আদিবাসী জাতি। সে তুলনায় তাদের খবর চোখে পড়ে কই?

ভুইমালী, বর্মণ বা মালোর মতো বাঙালি হিন্দুসমাজের কোনায় স্থান পাওয়া অনেকগুলো গোষ্ঠী একইসঙ্গে সমতলবাসী এবং ক্ষুদ্রতর। ভাষা, সংস্কৃতি ও ঐতিহ্য হারিয়ে বাঙালিসমাজ ও সংস্কৃতিতে মিশে যাওয়া এসব সাবেক-গোষ্ঠীকে সব সময় ক্ষুদ্র জাতিসভা হিসেবে আলাদা করে দেখা হয় না। ভাম্যমাণ বেদে বা সিলেট-মৌলভীবাজারের চা-শ্রমিক জনগোষ্ঠীর তো ক্ষুদ্র জাতিসভা হিসেবে স্বীকৃতি পাওয়াটুকুও দুষ্কর।

বিশেষ কিছু বিষয় ও কৌশল

নজর দেব বিশেষ কিছু বিষয়ে প্রতিবেদন করার জরুরি কয়েকটি দিক এবং কৌশলের দিকে।

১. সংঘাত-সংঘর্ষ-সহিংসতা : আপনাকে সম্ভবত এমন ঘটনার প্রতিবেদনই সবচেয়ে বেশি করতে হবে। এ কাজটিই সবচেয়ে কঠিন এবং ঝুঁকিপূর্ণ। কিছু করণীয় ও পরামর্শ :

- ক্ষুদ্র জাতিসভার মানুষকে জড়িয়ে সংঘাত-সংঘর্ষ বা তাদের প্রতি সহিংসতার মূলে প্রায়ই থাকে জমি নিয়ে দ্বন্দ্ব; তাদের বনে থাকা বা বন ব্যবহারের অধিকারের দাবি; এবং তাদেরকে উৎখাতের চেষ্টা। তাদের প্রথাগত অধিকার এবং সংশ্লিষ্ট আইনগুলোসহ সার্বিক ভিত্তিজ্ঞান দরকার।
- অনেক সন্ত্রাস-সংঘর্ষ জটিল হয়, সহিংসতার দীর্ঘ ইতিহাস বা প্রেক্ষাপট থাকে। জানা থাকতে হবে। প্রামাণ্য দলিলপত্র দেখতে হবে। অনেকগুলো পক্ষ, তাদের অনেক কথা। মূল বিষয়বস্তুগুলো অর্থাৎ সংঘর্ষ-সহিংসতার মূল কারণ বা ক্ষেত্রের প্রধান উৎস চিহ্নিত করতে হবে। সচরাচর নানামুখী ছোট ছোট কারণ ও স্বার্থের দ্বন্দ্ব থাকে। সবগুলো দেখতে হবে, বুঝতে হবে।
- দুর্বল বা অন্যায়ের শিকারপক্ষের প্রতি বিশেষ মনোযোগ দেবেন, তবে একপেশে হলে চলবে না। যথাসম্ভব পূর্ণাঙ্গ তথ্য দেবেন। প্রমাণ হাতে রাখবেন।
- সব তথ্য পাল্টাপাল্টি যাচাই অত্যাবশ্যক। এসব সময়ে যে যার মতো করে ব্যাখ্যা দেয়, অতিরঞ্জন হয়, ইচ্ছা করে বিভাস্ত করার লোক আছে অনেক। ছেঁকে সত্য বের করতে হয়। প্রেক্ষাপটে সঠিক অবস্থানে উপস্থাপন করবেন—বাড়িয়ে বা কমিয়ে বলা থেকে সাবধান।
- সতর্ক থাকুন—রং চড়ানো, উসকানিমূলক উপস্থাপন, ঢালাও কথা বলা বা নাটকীয় করে দেখানো একেবারেই চলবে না। সংঘাত-সংঘর্ষে নাটকীয়তা থাকে, কিন্তু বিষয়বস্তু গুরুতর। এবং অনেকের জন্য এটা জীবন-মরণের প্রশ্ন। দায়িত্বজ্ঞানহীন লেখা বা ছবি সংঘাত আরও বাড়িয়ে দেবে।
- সংঘর্ষ-সহিংসতার ভূতভোগীদের পরিস্থিতি, ক্ষয়ক্ষতি, বিপর্যয় গুরুত্ব দিয়ে বলা দরকার। এভাবে প্রতিবেদনে মানবিক প্রেক্ষাপট আসবে। ঘটনাগুলোর তাৎপর্যের এটি একটি বড় দিক।
- ঘটনা আপাতদৃষ্টিতে বাঙালি জনগোষ্ঠী ও আদিবাসী জনগোষ্ঠীর দ্বন্দ্বে রূপ নিতে পারে। কিন্তু পেছনে প্রায়ই থাকে ক্ষমতাবানের স্বার্থ। রাষ্ট্রীয় বিভিন্ন প্রতিষ্ঠান—বন বিভাগ, প্রশাসন, পুলিশ, সামরিক শক্তি—ক্ষুদ্র জাতিসভার মানুষের বিরুদ্ধে অবস্থান নিতে পারে। কার কী ভূমিকা এবং স্বার্থের দ্বন্দ্ব ঠিক কী, সেটা পরিষ্কার করতে হবে। নিছক বাঙালি-আদিবাসী দ্বন্দ্ব হিসেবে দেখানো অতি-সরল ও ভুল হবে।
- এসব ঘটনায় নিপীড়ন-নির্যাতন ও মানবাধিকার লঙ্ঘনের অভিযোগ এবং নজির থাকে। অনুষঙ্গী থাকে নারীর ঘোন হয়রানি বা নির্যাতন। অভিযোগগুলো সরেজমিন খতিয়ে দেখতে হবে এবং তথ্য-প্রমাণের ভিত্তিতে বিষয়টিকে প্রতিবেদনে গুরুত্ব দিতে হবে। পক্ষ নেবেন না, কিন্তু দায়িত্ব কার বলে প্রমাণ মিলছে বা জোরালো অভিযোগ উঠছে সেটা বলবেন।
- যত বেশি মানুষের সঙ্গে কথা বলবেন, ঘটনা তত পরিষ্কার হবে। একেকজন একেকভাবে দেখে, বর্ণনার মধ্যে তার মতামত-আবেগ-মূল্যায়ন ঢুকে যায়। খুব জটিল ঘটনা হলে এবং পরস্পরবিরোধী বক্তব্য

আসতে থাকলে যথাসন্তুর বেশিজনের কাছ থেকে আদ্যোপান্ত পুরো বিবরণ শুনবেন। তাতে মিলিয়ে দেখে যাচাই করতে পারবেন এবং বিভিন্ন দৃষ্টিকোণ পরিষ্কার হবে। এক সূত্র থেকে অন্য সূত্রের হাদিস পাবেন।

- নারী এবং শিশুদের সঙ্গেও কথা বলুন। নতুন ও গভীর দৃষ্টিকোণ পাবেন।
- অভিযুক্ত পক্ষের সঙ্গে কথা বলতেই হবে, তবে ক্ষতিগ্রস্ত পক্ষ যেন তাতে ভুল না বোঝে সেটা নিশ্চিত করবেন। অভিযুক্ত পক্ষ এবং প্রশাসন/কর্তৃপক্ষের সঙ্গে কথা বলবেন সবার শেষে।
- সব পক্ষের সঙ্গে কথা বলে প্রতিবেদন করার উদ্দেশ্য ন্যায্যতা আনা—তথ্য-প্রমাণের ভিত্তিতে পূর্ণাঙ্গ সত্য তুলে ধরে জরুরি দিকনির্দেশনা দেওয়া। সবার বক্তব্য সঠিক, অবিকৃত ও যথাযথভাবে তুলে ধরতে সজাগ থাকবেন। এভাবে আপনার প্রতিবেদন পক্ষগুলোর মধ্যে পরোক্ষ আদান-প্রদানের মাধ্যম হতে পারে এবং দ্বন্দ্ব মীমাংসায় সহায়তা করতে পারে। আপনার নিজের নিরাপত্তার জন্যও সব পক্ষের বক্তব্য তুলে ধরা জরুরি।
- যাদের কাছ থেকে তথ্য পাচ্ছেন তাদের নিরাপত্তার কথা মাথায় রাখতে হবে। তাদের নাম-পরিচয় গোপন রাখতে হতে পারে। নিপীড়নের শিকার দুর্বল পক্ষের ব্যাপারে বিশেষ সতর্কতা দরকার।
- সংঘাত-সংঘর্ষ বা সহিংসতার পর জাতীয় ও আন্তর্জাতিক পর্যায়ের পর্যবেক্ষকেরা এলাকায় যান। তাঁদের সঙ্গে কথা বলবেন। তবে অন্যান্য সূত্রে এবং নিজের পর্যবেক্ষণের সঙ্গে তথ্য পাল্টাপাল্টি যাচাই করতে হবে। এমন পর্যবেক্ষকদের সঙ্গে কথা বলার একটি সুবিধা : অন্য কোনো সূত্র নাম প্রকাশ করে তথ্য দিতে না পারলে, এঁদেরকে আপনি উদ্ভৃত করতে পারেন। স্পর্শকাতর বিষয়ে অনেক কথা এঁদের মুখ দিয়ে চলে আসতে পারে।

২. মানবাধিকার লজ্জন : সন্ত্রাস-সহিংসতা ছাড়াও ক্ষুদ্র জাতিসম্ভাব মানুষদের মানবাধিকার লজ্জন হতে পারে। যেমন :

- ✓ নাগরিক অধিকার হিসেবে প্রাপ্য কোনো সুযোগ থেকে বন্ধিত হওয়া।
- ✓ জীবিকার সুযোগ না পাওয়া।
- ✓ সরকারের অবহেলা বা বৈষম্য।
- ✓ নিজেদের প্রথা-রীতি চর্চা করতে না পারা।
- ✓ সুবিচার না পাওয়া।
- এমন যেকোনো ঘটনা গুরুত্বপূর্ণ, তা যতই ছোট হোক। ছোট ছোট ক্ষেত্র বা বঞ্চনা থেকে গঢ়িয়ে অনেক বড় ঘটনা হয়ে যেতে পারে।
- প্রতিবেদনে কোনো পক্ষ না নিয়ে স্বতন্ত্র অবস্থান বজায় রাখবেন। তবে মনে রাখবেন, নিরপেক্ষতা কখনোই ন্যায়-অন্যায় নিরপেক্ষ না। আপনাকে সংবেদনশীল ও ন্যায্য হতে হবে।

৩. পরিবেশ এবং উন্নয়ন : এর দুটি দিক আছে—

- ক্ষুদ্র জাতিসভার মানুষদের মানবাধিকার লজ্জন, জীবন-জীবিকা-আবাস থেকে উচ্ছেদ-উৎখাতের মতো অনেক ঘটনা ঘটে পরিবেশ রক্ষা ও উন্নয়নের দোহাই দিয়ে। যেমন, রাঙামাটিতে কাঞ্চাই জলবিদ্যুৎ প্রকল্প বা টাঙ্গাইলের মধুপুর বনে বিদেশি গাছের জালানি বন। এ থেকেই অনেক সংঘাত-সহিংসতার সূত্রপাত হয়। টাঙ্গাইল ও মৌলভীবাজারে ইকোপার্ক নিয়ে যেমনটা ঘটেছে। আদিবাসী এলাকায় পরিবেশ ও উন্নয়ন নিয়ে যেকোনো প্রসঙ্গে ব্যাপকতর এই প্রেক্ষাপট এবং ঘাত-প্রতিঘাতের মাত্রাটি মাথায় থাকা দরকার। প্রতিবেদনেও সেটা আসতে হবে।
- অন্যদিকে, যেসব কাজ যথার্থই পরিবেশের ক্ষতি করে সেগুলো যথাযথ চিহ্নিত করে প্রতিবেদন করতে হবে। অর্থাৎ ক্ষুদ্র জাতিসভার মানুষজন যদি বন ধ্বংস করে আবাদ করে, সেটা নিয়ে প্রতিবেদন করতে হবে; তবে সঠিক ও সুনির্দিষ্ট এবং পূর্ণাঙ্গভাবে, সব দিকের তথ্য-প্রমাণসহ। এমন ঘটনার জরুরি দিক, ওই মানুষদের বিকল্প জীবিকার প্রয়োজনীয়তা—প্রতিবেদনে সে দিকটি গুরুত্ব পাবে।
- ক্ষুদ্র জাতিসভার জন্য কোনো উন্নয়নমূলক কাজ যদি অন্য কারও অন্যায্য ক্ষতি করে বা অযৌক্তিক বৈষম্য সৃষ্টি করে, সেটা চিহ্নিত করতে হবে। তবে এমন বিষয়কে দেখতে হবে তাদের সুযোগবৃত্তিনার বৃহত্তর প্রেক্ষাপটে। দুর্বল ও সুযোগবৃত্তিজনের জন্য ইতিবাচক পদক্ষেপ বা পজিটিভ অ্যাকশন ন্যায়।

৪. সংস্কৃতি-জীবনধারা : সবকিছু মিলিয়ে ক্ষুদ্র জাতিসভাদের সমাজ-সংস্কৃতি নিয়ে গভীরসংগ্রহী প্রতিবেদন করার সুযোগ ও প্রয়োজন ব্যাপক। আপনি হয়তো ক্ষুদ্র কোনো জাতিসভার সমাজ-সংস্কৃতি নিয়ে ফিচার করছেন বা ছোট কোনো বর্ণাত্য প্রতিবেদন। মনে রাখুন—

- এসব প্রতিবেদনের মধ্য দিয়ে আদিবাসী জীবনের চিত্রটি পাঠক-শ্রোতা-দর্শকের সামনে স্পষ্ট করে তুলতে পারেন। উৎসব, সামাজিক অনুষ্ঠান, প্রথা, প্রথার কারণ, পেছনের গল্প, ভালো-মন্দ দিক, জীবনধারার বাঁক—এসব একটি জাতি সম্পর্কে পাঠককে সহজে আকর্ষণীয় করে জানানোর খুব ভালো সুযোগ।
- ভাষার দাবিতেই ছিল বাংলাদেশের অঙ্কুর। জীবনধারা, ভাষা ও সংস্কৃতি যেকোনো জাতির অন্তিমের সঙ্গে জড়ানো বিষয়। সে বিষয়ের খবর সব সময় জরুরি, তবে গভীরে যাওয়া চাই।
- আদিবাসী সংস্কৃতি ও জীবনধারার মধ্যে পাঠক-দর্শক-শ্রোতার জন্য আছে বৈচিত্র্যের আকর্ষণ। আবার ক্ষুদ্র জাতিসভার চলতি জীবনের প্রেক্ষাপটে জরুরি অনেক প্রসঙ্গও উঠে আসতে পারে। যেমন, বাংলাদেশের সবগুলো ক্ষুদ্র নৃতাত্ত্বিক জাতিগোষ্ঠীর মধ্যে কেবল গারো ও খাসিয়ারাই মাতৃসূত্রীয় বা মাতৃবৎশীয়। অর্থাৎ তাদের উত্তরাধিকার এবং বৎশপরিচয় মায়ের ধারা অনুসরণ করে হয়। বিয়ের পর স্বামী বাস করে স্ত্রীর বাড়িতে। সম্পত্তি হয় মায়ের, পায় মেয়েরা। এ সম্পর্কে জানতে বাঙালিরা স্বভাবতই আগ্রহী হবে। আবার, গারো বা খাসিয়াদের মধ্যেও নারীর অবস্থান আসলেই কেমন তা খতিয়ে প্রশ্ন করার সুযোগ আছে।
- এদিকে বিভিন্ন ক্ষুদ্র জাতিসভার সংস্কৃতি-সমাজ দ্রুত পাল্টে যাচ্ছে। জমিসহ সম্পদের ওপর গোষ্ঠীর মালিকানা থেকে ব্যক্তি মালিকানায় বদল হয়েছে। টাকা, বিনিয়োগ, মুনাফা—এ ধারণাগুলো এসেছে। বাঙালি সমাজের অনেক রীতি-রেওয়াজ ধারা তারা গ্রহণ করে নিয়েছে। বাইরের দুনিয়ার সঙ্গে পরিচয় ও আধুনিক শিক্ষার প্রভাব মূল্যবোধ ও জীবনদর্শনে বদল আনছে। ঐতিহ্য হারিয়ে যাচ্ছে বা তার সঙ্গে সংঘাত হচ্ছে। আদিবাসী ও বাঙালি ছেলেমেয়ের বিয়ে হচ্ছে।

- অন্যদিকে, আছে ধর্ম ও ধর্মীয় প্রতিষ্ঠানের ভূমিকা। উত্তর ও উত্তর-পূর্বাঞ্চলীয় সীমান্তের গোষ্ঠীদের ওপর হিন্দুধর্মের এবং পার্বত্য চট্টগ্রামের গোষ্ঠীদের ওপর বৌদ্ধধর্মের প্রভাব অনেক আগে থেকেই ছিল। ব্রিটিশ আমল থেকেই তাদের খ্রিস্টধর্মে ধর্মান্তরিত হওয়া চলেছে; মুসলমান হওয়ার নজরও আছে। এসব বিষয়ে নানা রকম প্রতিবেদন হতে পারে।
- এমন হতে পারে যে, নিরাপত্তার ঝুঁকি বা বাধাবিষ্ণুর কারণে (যেমন, জরুরি আইন) স্পর্শকাতর কোনো বিষয়ে লিখতে পারছেন না, অথচ জানানো দরকার। তখন কিন্তু জীবনধারার মোড়কে অনেক গুরুত্বপূর্ণ বিষয় নির্দোষভাবে বলে ফেলা যায়। সমস্যা-সংকটের চিত্র খুব ভালোভাবেই তুলে ধরা সম্ভব।

৬

সতর্কতার কয়েকটি ক্ষেত্র ও কৌশল

- নিরাপত্তা-নিজের এবং সূত্রের : সাংবাদিককে কিছু ঝুঁকি তো নিতেই হয়, কিন্তু অহেতুক বা অযৌক্তিক ঝুঁকি নেবেন না। কাজটা অ্যাডভেঞ্চার নয়।
 - ✓ প্রত্যেকটি কাজের ঝুঁকিগুলো আগে পরিষ্কার ভাবেন, প্রতিবেদনের জন্য কাজটা করা অত্যাবশ্যক কি না তা ভাববেন; করা জরুরি হলে সেইমতো ব্যবস্থা নিয়ে এগোবেন। অফিসে সিদ্ধান্তগ্রহীতাদের মধ্যে বিশ্বস্ত কাউকে সব খুলে বলবেন, তবে টেল পেটাবেন না।
 - ✓ কখনো কয়েকজন প্রতিবেদক মিলে ঘটনাছলে যেতে পারেন, তাতে ঝুঁকি করে। এলাকায় নিজের বিশ্বস্ত কাউকে আগে জানিয়ে প্রয়োজনীয় সতর্কতা নেবেন।
 - ✓ দূরের জায়গা হলে এমনভাবে পরিকল্পনা করবেন যেন দিন থাকতে ফিরতে পারেন। নয়তো রাতে নিরাপদ আশ্রয়ের বন্দোবস্ত করবেন।
 - ✓ আপনার উপস্থিতি যত কম নজরে পড়ে তত ভালো। অহেতুক শোর তুলবেন না। তবে যদি মনে করেন, জানান দিয়ে গেলেই নিরাপদ হবে, সেটা করবেন।
 - ✓ প্রতিটি পরিস্থিতি আলাদা বিচার করে দেখতে হবে। খুব ঝুঁকিপূর্ণ মনে হলে আঞ্চলিক প্রতিবেদক কেন্দ্রীয় অফিসের কাউকে আনিয়ে তাঁর আড়ালে কাজ করবেন বা তাঁকেই কাজটা করতে দেবেন।

একইভাবে সূত্রের এবং ঘটনায় জড়িত মানুষদের নিরাপত্তা নিয়ে ভাবুন।

- ✓ প্রয়োজনে প্রতিবেদনে নাম-পরিচয় দেবেন না। প্রতিবেদনে সূত্র উল্লেখ করতে হয়, তবে সেটা কৌশলেও করা যায়।

- ✓ প্রতিবেদন প্রকাশের পর প্রয়োজনীয় সময় পর্যন্ত সূত্রের খোঁজখবর নিন।
- ✓ বিশেষভাবে সতর্ক থাকবেন ক্ষুদ্র জাতিসম্ভাব মানুষজনসহ দুর্বল অবস্থানের সাধারণ মানুষদের বেলায়।

- সব পক্ষের আস্থা : আবারও মনে করিয়ে দিই—আস্থা পেতে হবে সব পক্ষের। সতর্ক থাকুন—
 - ✓ কোনো পক্ষের প্রচারযন্ত্রে পরিণত হবেন না।
 - ✓ কোনো পক্ষের লোক বলে চিহ্নিত হবেন না; হলে ভালোভাবে কাজ করতে পারবেন না; আপনার নিরাপত্তার ঝুঁকিও বাঢ়বে।
 - ✓ সব পক্ষই যেন এ আস্থা পায় যে সাংবাদিক সত্য লিখবেন। তাতে আপনার সূত্র এবং তথ্য পেতেও সুবিধা হবে। আদিবাসী প্রশ্নে এত রকম স্বার্থ ও রাজনীতি এবং অন্যায় জড়িত যে স্বতন্ত্র অবস্থান রাখা কঠিন; কিন্তু রাখতেই হবে।
 - ✓ সাংবাদিকের চিন্তাভাবনা যেন জাতিগত বিভাজনের ফাঁদে পড়ে না যায়। ক্ষুদ্র জাতিসম্ভাব সদস্য যখন সাংবাদিক হবেন, তাঁকেও নিজের মনের ছাঁচে-চালা ধারণাগুলো সম্পর্কে এবং স্বতন্ত্র অবস্থানের বিষয়ে সজাগ থাকতে হবে।

- পুলিশ-সেনা-প্রশাসন : ক্ষুদ্র জাতিসম্ভাবের জন্য জরুরি বিষয়গুলোতে এরা গুরুত্বপূর্ণ ভূমিকায় থাকে। কখনো বা প্রায়ই এরা ঘটনায় বিশেষভাবে জড়িত পক্ষ হয়। ক্ষুদ্র জাতিসম্ভাব মানুষদের পক্ষ থেকে এদের বিরুদ্ধে অনেক অভিযোগ উঠে।
 - ✓ এদের সঙ্গে সবার শেষে কথা বলতে চেষ্টা করবেন। তাতে অভিযোগগুলো সব জিজ্ঞাসা করতে পারবেন। আবার, এরা আপনার কাজে কোনো বাধা সৃষ্টি করতে পারবে না।
 - ✓ এদের কাছ থেকে তথ্য আদায়ে দৃঢ় হবেন। তথ্য-অধিকার আইন কাজে লাগাবেন। এরা যা বলবে তার সমর্থনে কাগজপত্র তথ্য-প্রমাণ অবশ্যই চাইবেন। একাধিক সূত্রে যাচাই করবেন।
 - ✓ ক্ষমতাকেন্দ্র হিসেবে এদের কার্যকলাপের ওপর নজর রাখবেন। প্রয়োজনে জবাবদিহি চাইতে দ্বিধা বা ভয় করবেন না।
 - ✓ এরা অনেক সময় আপনার প্রতিবেদন আগাম দেখিয়ে নিতে বলতে পারে; দৃঢ়ভাবে তা ঠেকাবেন।
 - ✓ এ সূত্রগুলো এবং গোয়েন্দাসূত্র নিজেদের মতো করে তথ্য দিতে চায়। সেটা না নিলে হ্যাকি আসে বা পরে আপনি চিহ্নিত হয়ে যান। পার্বত্য চট্টগ্রামে এটা নিত্যদিনের বাস্তবতা। পত্রিকার সমর্থন বা জোর না থাকলে প্রতিবেদক একা ঠেকাতে পারেন না।

- **ঢন্দ স্বার্থের :** ক্ষুদ্র জাতিসম্মতির জনগোষ্ঠীর সঙ্গে সংঘাত-সংঘর্ষ বা তাদের প্রতি সহিংসতার ঘটনা আদিবাসী-বাঙালি ঢন্দের চরিত্র পাওয়ার বিষয়টি একটু ভালো করে বোঝা দরকার।
 - ✓ বিভিন্ন ক্ষমতাকেন্দ্র উদ্দেশ্যপ্রণোদিতভাবে বিষয়টিকে সেদিকে নিতে সচেষ্ট থাকে। কিন্তু ঢন্দটি আসলে স্বার্থের। সে স্বার্থ প্রায় সময় হয় প্রবল কোনো পক্ষের বা বাইরের বড় কোনো মহলের। পার্বত্য চট্টগ্রামে সরকারি উদ্যোগে বাঙালি অভিবাসন এবং সেটা থেকে সৃষ্টি দীর্ঘস্থায়ী সমস্যাটি এর সবচেয়ে ভালো উদাহরণ।
 - ✓ প্রতিবেদককে স্বার্থের ঢন্দের মাত্রাটি মনে রাখতে হবে, খুঁজতে হবে, বুঝতে হবে। বাস্তবে যা দেখছেন তা আপনাকে বলতেই হবে। মানবাধিকার লজ্জন যার ক্ষেত্রেই, হোক সেটা পরিষ্কার জানাতে হবে। কিন্তু প্রতিবেদনে স্বার্থের ঢন্দের সঠিক প্রেক্ষাপট থাকা চাই।
 - ✓ বিবরণ যেন এমন ঢন্দকে জাতিগত বিভেদ হিসেবে না দেখায়। দেখালে তা প্রায় কখনোই পুরোপুরি সত্য হবে না। পক্ষান্তরে এমন প্রতিবেদন জাতিগতভাবে বিভেদকে উসকে দেবে। পার্বত্য চট্টগ্রামের সাংবাদিকদের এ বিষয়ে বিশেষ সতর্ক থাকা দরকার।
- **প্রত্যেকে আলাদা :** সতর্ক থাকুন, ক্ষুদ্র জাতিসম্মাদের সাধারণী করে বা অতি-সরল করে দেখানো ভুল হবে। প্রতিটি ক্ষুদ্র জাতিসম্মার নিজস্ব বৈশিষ্ট্য আছে। আবার, সব মানুষ বা জনগোষ্ঠীর মতো একই জাতিসম্মার মধ্যেও বৈপরীত্য-বৈচিত্র্য বা টানাপোড়েন আছে।
 - ✓ যেমন ধরুন, সব ক্ষুদ্র জাতিগোষ্ঠী বৌদ্ধ বা খ্রিস্টান নয়। হিন্দু, মুসলিম বা সর্বপ্রাণবাদী আদিধর্মের অনুসারী জাতি আছে। একই জাতির মধ্যে ধর্মের পার্থক্য আছে। সামাজিক রীতিনীতি, সংস্কৃতি, জীবনচরণে পার্থক্য আছে। আছে পরিবর্তনের প্রবণতা ও তাতে পার্থক্য।
 - ✓ আমাদের সাধারণ একটা ধারণা আছে যে আদিবাসী জাতিগোষ্ঠীগুলো মাতৃতাত্ত্বিক। সবাই কি আসলেই তাই? সব জাতিগোষ্ঠীতে নারীর অবস্থান বা গুরুত্ব সমান নয়।
 - ✓ প্রতিটি পরিস্থিতিও আলাদা। যেমন, পার্বত্য চট্টগ্রামে সব বাঙালি-আদিবাসী পরিস্থিতি এক নয়। একই ধরনের হলেও কোনো সমস্যা বা ঢন্দ এক নয়।
- **পার্বত্য চট্টগ্রাম :** পার্বত্য চট্টগ্রামে সহিংসতা, সংঘাত-সংঘর্ষ এবং আদিবাসী ও বাঙালি জনগোষ্ঠীর মধ্যকার ঢন্দ জটিল একটি পরিস্থিতি। এর সবগুলো মাত্রা নিজে আগে ভালো বোঝা দরকার।
 - ✓ কারণগুলোর দীর্ঘ ইতিহাস জানতে হবে। যেমন, দুই দশকের ওপরে চলা গৃহযুদ্ধ, সরকারি উদ্যোগে ব্যাপক বাঙালি অভিবাসন এবং আদিবাসীদের বড় দলটির সঙ্গে সরকারের শান্তিচুক্তি ও এর প্রতিক্রিয়া।
 - ✓ এর রাজনৈতিক মাত্রাগুলো বুঝতে হবে।

- ✓ ভৌগোলিক কারণে পার্বত্য চট্টগ্রামে সরেজমিনে তথ্য সংগ্রহ সময় ও ব্যয়সাধ্য। সংবাদমাধ্যমের সহযোগিতা অত্যাবশ্যক। সেনা উপস্থিতির কারণে সেখানে তথ্য সংগ্রহ বা কাজ করা কঠিন এবং ঝুঁকিপূর্ণ। সংবাদমাধ্যমের জোরালো সমর্থন থাকলেও প্রতিবেদক সব সময় ঝুঁকি নিতে পারেন না।
- ✓ প্রতিবেদকের দিক থেকে সঠিক ও প্রামাণ্য তথ্য দেওয়া, সব পক্ষের সঙ্গে কথা বলা এবং নিজের স্বতন্ত্র অবস্থানের জানান দেওয়া অপরিহার্য। অবস্থা বুঝে কৌশল কাজেরই অঙ্গ হয়ে যায়।
- ✓ খুব জরুরি, যেন আপনি কোনো একটি পক্ষের বলে চিহ্নিত না হয়ে যান। কিন্তু সব পক্ষের আস্থা পাওয়া কঠিন।
- ✓ অভিবাসী বাঙালিদের কারণে সেখানে জাতিগত বিভাজনের মনস্তন্ত্র প্রবল। অভিবাসী বাঙালিরা ক্ষুদ্র জাতিসম্প্রদার প্রতিবেদককে বিশ্বাস করেন না; উল্টোও সমান সত্য।
- ✓ সেখানকার বাস্তবতায় একটা বিষয় মনে রাখা দরকার—অভিবাসী বাঙালিরাও এক অর্থে সরকারের নীতির শিকার। প্রতিবেদক যদি তাদের দুগ্ধতির কথা প্রকাশ করেন, তাতে সত্য প্রকাশই হয়। বিষয়টি জটিল। তবে প্রসঙ্গটি এড়িয়ে সেখানে সাংবাদিকতা করার সুযোগ নেই।

- **প্রতিবেদন গোছানো ও লেখা :** বিষয়গুলো বড়, জটিল এবং স্পর্শকাতর। প্রতিবেদনের বিন্যাস গোছালো এবং লেখা সঠিক ও সাবলীল হওয়া খুব জরুরি। কয়েকটি দিকে নজর চাই:

 - ✓ সবার আগে নিজেকে খুব ভালো করে প্রতিবেদনের বিষয়বস্তুগুলো বুঝতে হবে; না হলে বুবিয়ে লিখতে পারবেন না।
 - ✓ অধিকাংশ পাঠকের জন্য বিষয়গুলো অচেনা হবে। প্রেক্ষাপট ও পশ্চা�ৎপট দিতে আলাদা যত্ন চাই। বিশেষ বিশেষ শব্দ, ধারণা বা বিষয়ের প্রয়োজনীয় ব্যাখ্যা লাগবে। সেসব ব্যাখ্যা উপরুক্ত সূত্র উল্লেখ করে উপস্থাপন করতে হবে। শব্দসংক্ষেপ একবার ভেঙে লিখতে হবে।
 - ✓ প্রতিবেদনে প্রসঙ্গগুলো পরিষ্কার ঘোষিতভাবে উপস্থাপন করা চাই। তালগোল পাকিয়ে গেলে, এলোমেলো হলে, জটিল বিষয় বোঝা কঠিন। প্রতিবেদনের ফোকাস যেন ঠিক থাকে, বিষয়বস্তু ছড়িয়ে গেলে চলবে না।
 - ✓ তথ্য-প্রামাণিকভিত্তিক বিশ্লেষণ জায়েজ এবং দরকার, তবে প্রতিবেদনে নিজের মূল্যায়ন থাকবে না। মূল্যায়নধর্মী শব্দ, বিশেষণ একেবারে বাদ। প্রসঙ্গ বা বিষয়গুলো উপস্থাপনের পারম্পর্যে বা ধরনেও যেন মূল্যায়ন চলে না আসে।
 - ✓ সতর্ক থাকুন, লেখার যেন একপেশে বোঁক না আসে বা কোনো কিছুর আংশিক উপস্থাপনা না হয়। প্রতিবেদন ছোট রাখার তাগিদ থাকে, তবে জরুরি জিনিসগুলো সঠিক প্রেক্ষাপটসমেত পূর্ণাঙ্গ আসা চাই। বিশেষ সতর্ক থাকুন, কারও বক্তব্য যেন খণ্ডিত বা বিকৃত হয়ে না যায়।
 - ✓ ঢালাওভাবে কোনো কিছু উপস্থাপন করবেন না। তথ্য ও উপস্থাপন সুনির্দিষ্ট হতে হবে। একপেশে এবং

ঢালাও কথাবার্তা পুরো প্রতিবেদন মাটি করে দেওয়ার জন্য যথেষ্ট। বিশেষ সতর্কতা চাই অভিযোগ উপস্থাপনের বেলায়। ঢালাও অভিযোগ ভুল এবং অন্যান্য।

- ✓ লেখা যেন সহজে বোঝা যায়, পড়তে ভালো লাগে; স্বচ্ছন্দ ও আকর্ষণীয় হতে হবে; তবে চমক, চটক বা সেনসেশন তৈরি করা যাবে না।
- ✓ ক্ষুদ্র জাতিসম্ভাবনার মানুষের নামের সঠিক বানান জেনে নেবেন। প্রতিবেদক বাঙালি হলে অপরিচিত নামে ভুল হয়ে যায়।
- ✓ সমাজ-সংস্কৃতি বিষয়ের প্রতিবেদনে আদিবাসী ভাষার অনেক শব্দ চলে আসে। সঠিক শব্দ ও বানান জেনে নিন।

সাংবাদিক তথা সংবাদমাধ্যমের সঙ্গে ক্ষুদ্র জাতিসম্ভাবনার দূরত্ব দূর হলে সংবাদে তাদের ন্যায্য হিস্যা নিশ্চিত হতে পারে। এর ফলে পাঠকের কাছে, মানুষের কাছে, ক্ষুদ্র জাতিসম্ভাবনার অবস্থা ও অবস্থানের সত্য চিত্রটি পৌছানোর সুযোগ হবে। অন্যদিকে, সংবাদমাধ্যম ও সাংবাদিক হয়ে উঠতে পারে ঘটনা ও বিষয়গুলোর জড়িত সব পক্ষের মধ্যে পরোক্ষ যোগাযোগের মাধ্যম।

আদিবাসী সংস্থা-সংগঠনের জন্য



১

আদিবাসী প্রতিনিধিদের করণীয়

সংবাদমাধ্যমের সঙ্গে ক্ষুদ্র জাতিসভার দূরত্ব দূর করার উপায় খুঁজতে টাঙ্গাইল, মৌলভীবাজার ও রাঙামাটিতে ২০০৮ সালে এমআরডিআই তিনটি গোলটেবিল বৈঠকের আয়োজন করে। সেগুলোয় আদিবাসী প্রতিনিধিরা কিছু সাধারণ ক্ষেত্রের কথা জানান। বড় দুটি ক্ষেত্র :

- ✓ সংবাদমাধ্যম আদিবাসী জনগোষ্ঠীগুলোর জন্য জরুরি বিষয়গুলোর বেশির ভাগই উপেক্ষা করে।
- ✓ বিভিন্ন বিষয়ে ভুল বা মিথ্যা তথ্য প্রকাশিত হতেও দেখা যায়। এর প্রতিবাদ জানালে সেটা প্রকাশের নিশ্চয়তা থাকে না।

অর্থাৎ তাঁদের মূল ক্ষেত্র সংবাদমাধ্যমে ক্ষুদ্র জাতিসভার খবরাখবর প্রতিফলনে ঘাটতি নিয়ে।

পক্ষান্তরে তিনটি গোলটেবিলেই স্থানীয় সাংবাদিকেরা তথ্য না-পাওয়ার সমস্যার কথা বলেন। তাঁরা বলেন :

- ✓ ক্ষুদ্র জাতিসভার প্রতিনিধিরা নানা কারণে দায়িত্ব নিয়ে তথ্য দিতে ভয় করেন, পিছিয়ে যান।

এভাবে দুই পক্ষের কথাবার্তা থেকে বাস্তব কিছু সমস্যা ও বাধার যেমন ইঙ্গিত পাওয়া যায়, তেমনি সার্বিকভাবে সংবাদমাধ্যমের সঙ্গে আদিবাসী প্রতিনিধিদের দূরত্বের প্রেক্ষাপটও স্পষ্ট হয়ে ওঠে। দূরত্ব দূর না হলে প্রতিফলনের ঘাটতিও কমবে না বা দূর হবে না।

বোঝাপড়া ও করণীয় : দূরত্ব পারস্পরিক ব্যাপার। তা কাটিয়ে উঠতে এবং সাংবাদিকের কিছু সমস্যা কমিয়ে আনতে আদিবাসীদের স্বার্থসংরক্ষণে কর্মরত এনজিও/সিবিও/সংগঠন/নেতা-প্রতিনিধিদেরও সচেতন চেষ্টা একান্ত দরকার।

প্রথম কথা, এ ঘাটতি কেন হয় সেটা তাঁদের বুঝতে হবে। অর্থাৎ বুঝতে হবে :

- ✓ গণসংবাদমাধ্যমের চরিত্র
- ✓ সাংবাদিকের বাধ্যবাধকতাগুলো; তাঁর পেশাগত দাবি, চাহিদা এবং কাজের প্রক্রিয়া ও গতি-প্রকৃতি
- ✓ সংবাদমাধ্যম ও সাংবাদিকের সীমাবদ্ধতাগুলো

অর্থাৎ এ বইয়ের প্রথম অংশে সাংবাদিকদের উদ্দেশে এসব বিষয়ে যা কিছু বলা হয়েছে, সেগুলো আদিবাসী প্রতিনিধিদেরও তলিয়ে ভাবতে হবে। সেই অনুযায়ী দূরত্ব তথা ঘাটতি ও সমস্যাগুলো দূর করার সঠিক উপায় এবং কৌশল ঠিক করতে হবে। পারস্পরিক আঙ্গ ও বিশ্বাস এবং সহায়তার ভিত্তি তৈরি করা জরুরি। সুচিত্তি তৎপরতা চাই।

মোটা দাগে দরকার :

- নিজের চিন্তা ও দৃষ্টিভঙ্গির জায়গায় কিছু মৌলিক বোৰাপড়া
- সংবাদমাধ্যমের বিভিন্ন পর্যায়ে আন্তরিক সম্পর্ক তৈরি করা
- সাংবাদিককে ভালো ও জরুরি প্রতিবেদনের হিসেব দেওয়া এবং সেগুলো করতে তাঁকে প্রয়োজনীয় সহায়তা জোগানো
- সংবাদমাধ্যমের সঙ্গে যোগাযোগের গোছালো ও সুনির্দিষ্ট পরিকল্পনা করা
- সংবাদ-বিজ্ঞপ্তি ও নিজেদের বক্তব্য নিজেদের মতো করে লিখে প্রকাশের লক্ষ্যে কার্যকর দক্ষতা ও কৌশল অর্জন
- কার্যকর সংবাদ-সম্মেলন করার কৌশল

একে একে বিষয়গুলো দেখে কিছু চুম্বক পরামর্শ ওছিয়ে তোলার চেষ্টা করব।

২

বোৰাপড়া, সম্পর্ক গড়া

দূরত্ব দূর করার কাজ শুরু হতে হয় নিজের মনের মধ্যে। কিছু বিষয় বোৰাপড়া করা দরকার। তার ভিত্তিতে নিজের প্রত্যাশা ও করণীয়র মৌলিক গান্ডি চিহ্নিত করতে হবে।

- মনোভাব : আদিবাসী প্রতিনিধিদের মনে মূলধারার সাংবাদিক বা সংবাদমাধ্যম সম্পর্কে ঢালা ও নেতৃত্বাচক ছাঁচে-ঢালা ধারণা অর্থাৎ স্টিরিওটাইপজাত চিন্তাভাবনা বা প্রেজুডিস থাকতে পারে। এ থেকে আসে অবিশ্বাস, সন্দেহ ও হাল ছেড়ে দেওয়ার মনোভাব। বিরূপ কোনো কিছু ঘটলে, মতপার্থক্য দেখা দিলে, চট করে মনে হয়—‘ওরা সব সময় এমনই করবে’। এভাবে অনাঙ্গ পারস্পরিক দূরত্ব বাড়ায়। প্রয়োজন, পরস্পরকে সঠিক বোৰা ও আন্তরিক সম্পর্ক তৈরি করা।
- ‘আদিবাসী’ বনাম ‘উপজাতি’ : ক্ষুদ্র জাতিসম্প্রদার অধিকাংশ মানুষজন সংবাদমাধ্যমে ‘আদিবাসী’ হিসেবে চিহ্নিত হতে চান। সাংবাদিকের করণীয় আলোচনার সময় এ প্রসঙ্গে চলতি বিতর্কগুলো এবং গ্রহণযোগ্য সমাধান খোঁজা হয়েছে। আদিবাসী প্রতিনিধিদেরও সেখানে উপস্থাপিত যুক্তিগুলো বিচার-বিবেচনা করতে হবে।

- **সেতুবন্ধ ভালো সাংবাদিকতায় :** বুঝতে হবে যে, সংবাদমাধ্যম বা সাংবাদিক ভালো প্রতিবেদন এবং ভালো সাংবাদিকতার বেশি কিছু করতে পারবেন না। এর বাইরে কিছু প্রত্যাশা করা যাবে না। সাংবাদিক ক্ষুদ্র জাতিসম্মত হলে তাঁর কাছেও এর বাইরে প্রত্যাশা করা যাবে না। করার দরকারও হবে না। নেতৃত্ব ও ভালো সাংবাদিকতার মধ্য দিয়েই কিন্তু সংবাদমাধ্যমের কাছে ক্ষুদ্র জাতিসম্মত দাবিগুলো পূরণ হতে পারবে। অর্থাৎ এটাকে উভয়ের সাধারণ লক্ষ্য হিসেবে চিহ্নিত করে ক্ষুদ্র জাতিসম্মত প্রতিনিধিদের সাংবাদিককে এটা করতে সাহায্য করতে হবে।
- **সাংবাদিকের অবশ্যকরণীয়গুলোকে শ্রদ্ধা :** এ বইয়ে আগের অংশে আমরা সাংবাদিকের জন্য সত্যনিষ্ঠতা, পক্ষপাতশূন্যতা বা ন্যায্যতা নিশ্চিত করার মতো কিছু অবশ্যকরণীয় নিয়ে আলোচনা করেছি। সেগুলো নিশ্চিত করা না গেলে ভালো সাংবাদিকতা তথা ভালো প্রতিবেদন হবে না। সাংবাদিকের এই পেশাগত চাহিদা ক্ষুদ্র জাতিসম্মত প্রতিনিধিদের বুঝতে এবং মানতে হবে।
- **মূলস্তোত্রে আসা চাই :** আপনার লক্ষ্য হোক ক্ষুদ্র জাতিসম্মত খবরাখবরকে ভালো সাংবাদিকতার মূল প্রবাহে অন্তর্ভুক্ত করা। পৃষ্ঠপোষকতামূলক বা সংরক্ষণবাদী (পেট্রোনাইজ করা, কলসেশন দেওয়া বা প্রোটেকটিভ) সাংবাদিকতা চাইবেন না। ক্ষুদ্র জাতিসম্মত খবর ‘কোটা’র মতো খোপে আটকা পড়লে তার দাম কমে যাবে।
- **অন্যান্য দাবিদার :** নেতৃত্ব সাংবাদিকতা দাবি করে, সাংবাদিক সমাজের সব অংশের কথা বলবে এবং দুর্বল ও সুযোগবন্ধিত সবাই সংবাদমাধ্যমের বিশেষ মনোযোগ পাবে। সংবাদমাধ্যমে অন্যান্য সংখ্যালঘু ও সুযোগবন্ধিত গোষ্ঠী/মানুষজনের খবরাখবর প্রতিফলনেও কমবেশি ঘাটতি আছে। অর্থাৎ কেবল ক্ষুদ্র জাতিসম্মতাই সাংবাদিকের বিশেষ মনোযোগের দাবিদার না। সংবাদমাধ্যমের সীমিত জায়গায় সুযোগবন্ধিত অন্যান্য জনগোষ্ঠীর কথাও ঠাই পেতে হবে। সুতরাং নিজেদের জন্য একক মনোযোগ প্রত্যাশা করলে চলবে না।

জাতিগত বিভাজন-বিদ্রোহ

ক্ষুদ্র জাতিসম্মত জনগোষ্ঠীর সঙ্গে সংঘাত-সংঘর্ষ বা তাদের প্রতি সহিংসতা অনেক সময়ই আদিবাসী-বাঙালি চরিত্র পায় অর্থাৎ একটা জাতিগত চেহারা নেয়। কিন্তু এ সংঘাত বা দ্঵ন্দ্ব আসলে স্বার্থের—প্রবল কোনো পক্ষের বা ক্ষমতাকেন্দ্রের স্বার্থের। এ বইয়ের আগের অংশে এই প্রসঙ্গে বিস্তারিত আলোচনা ছিল। সতর্ক থাকুন, আদিবাসী স্বার্থের দিক দেখতে গিয়ে আপনার চিন্তাভাবনা যেন জাতিগত বিভাজন বা পক্ষপাতের ফাঁদে পড়ে না যায়।

চুম্বক পরামর্শ

মন তৈরি

১. সাংবাদিক এবং সংখ্যাগুরুর ধারা সম্পর্কে নিজের মনে ঢালাও, বন্ধমূল পূর্বসংক্ষার থাকলে সেগুলো স্পষ্ট চিনে নিয়ে কাটিয়ে উঠতে হবে। মনে রাখতে হবে যে, প্রত্যেক ব্যক্তি এবং পরিস্থিতি আলাদা—ভিন্ন ভিন্ন বাস্তবতা থাকে। পরম্পরারের সমস্যাগুলো খোলা আলোচনা করে বোঝাপড়া জরুরি।

২. সন্দেহ ও অবিশ্বাস মনে নিয়ে সম্পর্ক গড়া শুরু করবেন না। সাধারণভাবে সাংবাদিকতার আদর্শ ভূমিকা ও সদুদেশ্যের সম্ভাবনার প্রতি শ্রদ্ধা ও আস্থা রাখবেন। আপনার সৌজন্য-সৌহার্দ্য ও বিনয় সুসম্পর্কের সুর বেঁধে দিক।

৩. সংবাদমাধ্যমের চরিত্র ও সীমাবদ্ধতা বিবেচনায় নিয়ে ব্যক্তি-সাংবাদিকের বাধ্যবাধকতাগুলো সংবেদনশীলভাবে বিচার করবেন। দায় পত্রিকা বা সংবাদমাধ্যমের নেতৃত্বাচক নীতিমালার হলে আপনার এলাকার সাংবাদিককে দোষী সাব্যস্ত করবেন না; বরং তাঁর সঙ্গে আলাপ করে কৌশল খুঁজবেন।

৪. সাংবাদিককে নিজের নিরাপত্তা দেখতে হবে। এটা আপনাকেও বুঝতে হবে। তাঁর কাছে অযৌক্তিক বীরত্ব প্রত্যাশা করবেন না। সংঘাত-সংঘর্ষ বা প্রবল কোনো পক্ষের সঙ্গে দ্বন্দ্বের খবরে এমন বুরা-বিবেচনা বিশেষ জরুরি হবে।

৫. ক্ষুদ্র জাতিসম্ভাবনার মধ্যেও সুযোগের বক্ষণায় বেশকম আছে। বেশকম আছে সংবাদমাধ্যমে তাদের প্রতিফলনের বক্ষণায়। যারা যত বক্ষিত, তাদের তত অগ্রাধিকার নিশ্চিত করা দরকার। আপনাকেও তাদের কথা তুলে ধরতে বিশেষ মনোযোগী হতে হবে। যেমন, ক্ষুদ্রতর জাতিসম্ভাৱ বা সমতলের আদিবাসীদের কথা জানাতে আপনি বিশেষ যত্নবান হবেন।

সাংবাদিকতা বোৰা

১. সাংবাদিককে তাঁর মতো করে কাজ করার অবকাশ দিতে হবে। তাঁর পক্ষপাতশূন্য, ন্যায় ও দায়িত্বশীল থাকার পেশাগত দাবি বুঝতে হবে। আপনার তরফ থেকে তথ্য দেওয়ার মধ্যে অনেক সময় হয়তো অলিখিত প্রত্যাশা থাকে যে, সাংবাদিক পুরোপুরি আপনাদের মতো করে লিখবেন, অন্য পক্ষের কথা শুনবেন না। এমন প্রত্যাশাও কিন্তু দূরত্বের কারণ হয়ে দাঁড়াতে পারে। সাংবাদিকের কাজ ভালো প্রতিবেদন করা—আন্দোলনে শরিক হওয়া না।

২. আপনাকে বুঝতে হবে যে, সাংবাদিক পক্ষপাত না করে স্বতন্ত্র অবস্থান নিলে এবং সব পক্ষের সঙ্গে কথা বললেই ভালো প্রতিবেদন হবে। এতে যদি ক্ষুদ্র জাতিসম্ভাবনার কোনো অংশ বা কাজ সম্পর্কে ন্যায় সমালোচনা আসে, যথার্থ নেতৃত্বাচক কোনো দিক উঠে আসে, তাতে ক্ষুঁক হবেন না।

৩. দায়িত্বশীল হবেন। ক্ষুদ্র জাতিসম্ভাবনার সঙ্গে সংশ্লিষ্ট অনেকগুলো বিষয় স্পর্শকাতর। আপনার কথাবার্তা যেন উসকানিমূলক হয়ে বৃহত্তর সমস্যা ডেকে না আনে। জাতিগত বিভাজন বা বিভেদ উসকে দেওয়ার মতো কথাবার্তা বলবেন না। সেটা সত্যনিষ্ঠ হবে না, সংবাদমাধ্যমের সঙ্গে আপনার দূরত্বও বাঢ়াবে।

৪. ঢালাও বা মিথ্যা অভিযোগ করবেন না বা তেমন কথাবার্তা বলবেন না। সাংবাদিক সেটা গ্রহণ করতে পারবেন না। আপনার ওপর থেকে তাঁর আস্থাও চলে যাবে।

আপিল করা, বোৰানো

১. সাংবাদিকের নেতৃত্বাচক দাবি সুযোগ-সুবিধায় পিছিয়ে পড়া অথবা অন্যায়-অন্যায়তার শিকার মানুষদের প্রতি বাড়তি মনোযোগ দেওয়া। এই যুক্তি তুলে ধরে সংবাদমাধ্যম তথা সাংবাদিকের নেতৃত্বাচক কাছে আপিল করুন। শুধু ‘নিজেদের খবর’ হিসেবে প্রতিফলন দাবি করবেন না।

২. সম্পাদক ও অন্যান্য সিদ্ধান্তগ্রহীতা বা গেটকিপার, এমনকি মালিকের সঙ্গেও নিয়মিত মতামত-তথ্য বিনিয়ন করা জরুরি। তাঁদের ক্ষুদ্র জাতিসভার বাস্তবতা বোঝাতে হবে। এভাবে হয়তো কারও নেতৃত্বাচক নীতিতে বদল আনতে পারবেন।

সম্পর্ক তৈরি

১. জাতীয় সংবাদমাধ্যম ও উপরের পর্যায়ে যেমন যোগাযোগ রাখবেন, তেমনি স্থানীয় পত্রিকা বা জাতীয় পত্রিকার স্থানীয় সাংবাদিককেও অবহেলা করবেন না। তাঁর সঙ্গেই কিন্তু আপনার প্রত্যক্ষ লেনদেন সবচেয়ে বেশি হবে।

২. সাংবাদিকের সঙ্গে কেবল সমস্যা-সংকটের সময় যোগাযোগ করবেন না। সামাজিক যোগাযোগের সুযোগ খুঁজবেন। সব ধাপের সাংবাদিকদের সামাজিক উৎসব ও অনুষ্ঠানে; ওয়ানগালা, বিজু বা রাস উৎসবে, বিয়ে-শাদিতে আমন্ত্রণ করুন। অনানুষ্ঠানিক আড়ডা-বৈঠকে একত্র হোন। তাঁদের ক্ষুদ্র জাতিসভার জীবন ও বাস্তবতা দেখান।

৩. সাংবাদিকের দুঃসময়ে তাঁর পাশে দাঁড়ান। সমবেদনা জানান, যথাসাধ্য সাহায্য করুন। তাঁর কোনো পেশাগত বিপর্যয়ে যেমন, তেমনি ব্যক্তিগত দুর্ঘাগের সময়ও সমব্যর্থী হোন।

সম্পর্ক রাখা

১. সংবাদমাধ্যমে ভুল, নেতৃত্বাচক বা আপত্তিকর কোনো কিছু প্রকাশিত হলে আপনি অবশ্যই প্রতিবাদ পাঠাবেন। তবে প্রতিবাদের ভাষায় ও সুরে সংযত ও পেশাদারি থাকবেন। রাগারাগি বা ব্যক্তিগত আক্রমণ কখনোই করবেন না। কোনো জরুরি খবর প্রকাশ না হলে সাংবাদিককে আপনার আন্তরিক দুঃখ জানান, এর ফলে কার কী ক্ষতি হলো তা জানান। তাতে প্রতিবেদক-সম্পাদক নিজে অনুতঙ্গ হওয়ার সুযোগ পাবেন এবং পরের বার এ কথা তাঁর মনে থাকবে।

২. পেশাদারি ও বুঝাদার হবেন। অযৌক্তিক মনোযোগ দাবি করবেন না। সাংবাদিক সব সময় ব্যস্ততা ও চাপের মধ্যে কাজ করেন। অহেতুক তাঁর সময় নষ্ট করবেন না। দুপুরের পর তাঁর হয়তো ফোনে আলাপ করারও সময় থাকে না। তেমন সময় যোগাযোগ করতে হলে নিতান্ত দরকারি কথাটুকুই বলবেন; খোশগল্ল বা লম্বা আলাপ জুড়বেন না।

৩. কোনো ভালো প্রতিবেদন প্রকাশিত হলে বা সংবাদমাধ্যম কাঞ্চিত ভূমিকা পালন করলে সংশ্লিষ্ট প্রতিবেদক ও সম্পাদকদের যথাযোগ্য প্রশংসা করতে ও ধন্যবাদ জানাতে কখনোই দেরি করবেন না। স্বীকৃতি দেওয়া ও ধন্যবাদ জানানো স্বতঃস্ফূর্ত হোক। সাংবাদিক অনাকাঞ্চিত বা অন্যায্য কিছু করলেও দুঃখিত চিন্তে ধন্যবাদ দিন। এতে তিনি লজ্জিত হবেন এবং সচেতন হবেন।

ধৈর্য এবং ধৈর্য

১. ধৈর্য ও লেগে থাকা একান্ত দরকার। তবে অযৌক্তিকভাবে নাছোড়বান্দা হবেন না। এমন যেন না হয় যে, আপনার ফোন পেলে বা ছায়া দেখলেই সাংবাদিক বিরক্ত হন, পালানোর সুযোগ খৌজেন। কারও বা

কোনো ক্ষেত্রে আর চেষ্টা নিষ্ফল বুঝলে ক্ষান্ত দিন। আগ্রহী সাংবাদিকের খৌজ করুন। নতুন বিষয়ে নতুন করে চেষ্টা করুন।

২. সব সময় মনে রাখুন, আপনার বিবেচনায় জরুরি সবগুলো ঘটনা বা বিষয়ই যে সংবাদমাধ্যমে প্রকাশিত হবে, তা নয়। সাংবাদিক নিজের মাপকাঠিতে সংবাদমূল্য বিচার করবেন। বরং তাঁকে ভালো খবর পেতে সাহায্য করুন। তা হলে তিনি আপনাকে ‘তদবিরকারী’ হিসেবে না দেখে উপকারী সূত্র হিসেবে দেখবেন। আপনার প্রতি তাঁর শ্রদ্ধা ও আগ্রহ বাড়বে।

৩

সাংবাদিকের চোখ দিয়ে দেখা, দেখানো

নিজস্ব কর্মকাণ্ড সম্পর্কে সংবাদমাধ্যমে প্রচার চাওয়ার সময় যেকোনো সংস্থা-প্রতিষ্ঠানকেই নিজের ঢাক মাত্রাতিক্রম না পেটাতে সতর্ক থাকতে হয়। ভালো সাংবাদিকতা কাউকে নিছক আত্মপ্রচারের সুযোগ দিতে চায় না। সুতরাং কেবল সংস্থা বা প্রকল্পের খবর নিয়ে সাংবাদিকের দ্বারস্থ হবেন না। তা ছাড়া, আপনি ক্ষুদ্র জাতিসভার স্বার্থ-সংরক্ষণে কাজ করছেন। সে সম্পর্কে জরুরি যেকোনো খবরাখবর প্রকাশই আপনার মূল লক্ষ্য। সুতরাং নিজের এনজিও/সিবিও/সংগঠনের ক্ষুদ্র স্বার্থ ছাপিয়ে ওঠা আপনার বৃহত্তর দায়িত্বের মধ্যে পড়বে। এ মনোভাব নিয়ে গণমাধ্যমের সঙ্গে যোগাযোগ করলে আপনি বেশি গুরুত্ব পাবেন। কেননা সাংবাদিক তখন আপনার মাধ্যমে ভালো খবরের হিসেব পাওয়ার প্রত্যাশা করবেন।

সংবাদমূল্য কী : সাংবাদিকের এ প্রত্যাশা পূরণ করতে হলে আপনাকে বুঝতে হবে, সাংবাদিকের কাছে খবর কী—ঘটনার সংবাদমূল্য কোথায়। সংবাদমূল্য আসলে স্থির হয় পাঠক-শ্রোতা-দর্শকের চাহিদার সূত্র ধরে। সচরাচর কয়েকটি মাপকাঠিতে কোনো ঘটনা বা বিষয়ের সংবাদমূল্য বিচার করা যেতে পারে :

- সময়োপযোগিতা—মানুষ সর্বশেষ পরিস্থিতির কথা জানতে চায়, তাই সাংবাদিক খৌজেন টাটকা নতুন ঘটনা। বাসি হয়ে গেলে খবরের দাম কমে যাবে। তবে ফিচার, নিবন্ধ বা বিশেষ প্রতিবেদনের জন্য দিনাদিন তাৎক্ষণিকতা না থাকলেও চলে। ক্ষুদ্র জাতিসভার অনেক বিষয়ই এ ধরনের লেখার আওতায় আসবে। কিছু খবর আবার দু-একদিন পুরোনো হয়ে গেলে তার দাম থাকবে না।
- ফলাফল ও তাৎপর্য—জনগোষ্ঠীর জন্য কোনো ঘটনার তাৎপর্য থাকলে সেটা খবর হবে। মানুষের ওপর কোনো ঘটনা বা বিষয়ের প্রভাবের মাত্রা সংবাদমূল্য নির্ধারণের বড় মাপকাঠি। এভাবে ঘটনার ফলাফল খবরের বিষয় হয়। আবার, ঘটনার প্রভাব পড়তে পারে ভবিষ্যতের ওপর। যে ঘটনা যত বেশি মানুষকে প্রভাবিত করে, তার দাম তত বাড়ে। একজন বা ছোট জনগোষ্ঠীর ওপর অন্যায়-অন্যায়তার খবরেরও দাম অনেক। ভবিষ্যতে এর বৃহত্তর প্রভাব থাকতে পারে।

- নাম-পরিচিতি—ঘটনায় কোনো সুপরিচিত মানুষজন জড়িত থাকলে খবরের দাম বাঢ়বে। বড় কোনো নেতা-প্রতিনিধি, উচ্চ পর্যায়ের কোনো কর্মকর্তা, বিখ্যাত মানুষজন, বিশিষ্ট কোনো ব্যক্তি যখন আদিবাসীদের সমস্যা-সংকট অথবা তাদের জন্য জরুরি কোনো বিষয়ে কথাবার্তা বলবেন, সেটা সহজেই খবর হবে। সংবাদমূল্য বিচারের মাপকাঠিতে ক্ষুদ্র জাতিসম্ভাদের মধ্য থেকেও বড় ও পরিচিত ব্যক্তি বা গোষ্ঠীরা তুলনামূলক বেশি গুরুত্ব পায়, ছোট বা সাধারণের বেশি উপেক্ষিত হয়।
- ঘটনার নেকট্য—স্থানীয় ঘটনা মানুষকে সরাসরি প্রভাবিত করে, আগ্রহী করে। ক্ষুদ্র জাতিসম্ভা-সংগ্রাম অপেক্ষাকৃত ছোট খবর হয়তো শুধু আঞ্চলিক পত্রিকাতেই গুরুত্ব পাবে। আবার, কিছু বিষয়ের সঙ্গে মানুষ মানসিকভাবে নেকট্য বোধ করে। যেমন, পৃথিবীর যেকোনো কোনায় রাষ্ট্রের সঙ্গে আদিবাসীদের দ্বন্দ্ব-সংঘাতের খবরে বাংলাদেশে ক্ষুদ্র জাতিসম্ভারসহ অনেক মানুষের আগ্রহ-কৌতুহল থাকবে।
- দ্বন্দ্ব-সংঘাত-চান্দল্য—যে ঘটনায় কোনো দ্বন্দ্ব, তর্ক-বিতর্ক বা ঘাত-প্রতিঘাত থাকে, মানুষ স্বভাবতই তার প্রতি আকৃষ্ট হয়। এমন ঘটনার ফলাফল, তাৎপর্য বা প্রভাবও জনজীবনের জন্য গুরুত্বপূর্ণ হয়ে থাকে।
- অভিনবত্ব—ঘটনায় যদি নতুনত্ব বা বৈচিত্র্য থাকে, সেটা যদি গড়পড়তা ঘটনার চেয়ে চোখে পড়ার মতো ভিন্ন বা আলাদা হয়, বেশির ভাগ মানুষ সেটা জানতে আগ্রহ বোধ করবে।
- চলতি আগ্রহ—একেক সময়ে একেক বিষয়ে সমাজের মানুষের আগ্রহ তৈরি হয়। তখন সংবাদমাধ্যমও সে বিষয়ের প্রতি ঝুঁকে পড়ে। পুরোনো বা চিরকালীন কোনো ঘটনা বা বিষয় তখন সংবাদমাধ্যমের মনোযোগের কেন্দ্রবিন্দু হয়ে উঠতে পারে। যেমন, দারিদ্র্য অনেক মানুষের রোজকার বাস্তবতা। সাধারণভাবে সব সময় এর প্রতি আলাদা নজর পড়ে না। কিন্তু কোনো ঘটনা বা কার্যক্রম-কর্মসূচির সুবাদে কোনো কোনো সময় দারিদ্র্য সমাজের ব্যাপক আলোচনা-বিতর্কে উঠে আসতে পারে। তখন ক্ষুদ্র জাতিসম্ভার দারিদ্র্যের বিষয়েরও আলাদা গুরুত্ব পাওয়া সম্ভব।
- জানানোর প্রয়োজনীয়তা বা গুরুত্ব—সাংবাদিক নিজে কোনো বিষয় জনগোষ্ঠীকে জানানো দরকার বলে মনে করতে পারেন। ঘটনা বা বিষয়টি হয়তো সাধারণভাবে কারও নজরে পড়ছে না, কম লোকই তার কথা জানে, কিন্তু সাংবাদিক তার খোঁজ পেয়েছেন। তিনি তখন সে বিষয়টি গুরুত্ব দিয়ে তুলে ধরতে পারেন।
- মানুষের রোজকার জীবনধারণের চিত্র/খবর—সাধারণ মানুষের রোজকার জীবনের সংগ্রাম-সমস্যা-সাফল্যের খবরে অনেক মানুষের আগ্রহ থাকে। এটাকে সব সময় সংবাদমাধ্যম গুরুত্ব দেয় না। কিন্তু খবর হিসেবে এর গ্রহণযোগ্যতা অনেক হবে।

ক্ষুদ্র জাতিসম্ভার খবরাখবরের প্রেক্ষাপটে ওপরে বলা সংবাদমূল্যগুলোর শেষের তিনটি মনে রাখা আপনার জন্য বিশেষ জরুরি। এগুলোর সূত্র ধরে আপনি জরুরি অনেক খবর চিহ্নিত করার সুযোগ পাবেন।

চুম্বক পরামর্শ

1. দিনাদিন কোনো বড় ঘটনা ঘটলে সাংবাদিককে দ্রুত সেটা জানাবেন। আপনার কাছ থেকে হদিস পেয়ে খবরটি জানানোয় এগিয়ে থাকতে পারলে সাংবাদিক আপনার প্রতি কৃতজ্ঞ থাকবেন।

২. পত্রিকা বা রেডিও-টিভির বুলেটিনের লেখা গ্রহণ করার শেষ সময় বা ডেভলাইন থাকে। ডেভলাইনের যথাসম্ভব আগে খবর পৌছানো দরকার। দিনের ঘটনার খবর তার আগে না পৌছালে সেদিন প্রকাশের সুযোগ থাকবে না, পরদিন খবর হয়তো বাসি হয়ে যাবে।

৩. বড় না হলে অবশ্য ক্ষুদ্র জাতিসম্মত দিনের ঘটনা খবর না-ও হতে পারে। বা হলেও তুলনামূলক বিচারে সেগুলো হয়তো জাতীয় দৈনিকের ভেতরের পাতায় বা খবরের অপেক্ষাকৃত গৌণ অংশে চলে যাবে। এসব খবর বরং স্থানীয় পত্রপত্রিকায় বেশি দাম পাবে।

৪. তবে রোজকার খুঁটিনাটি খবর প্রকাশিত হওয়াকে আপনার লক্ষ্য করবেন না। সাধারণভাবে দৈনিক পত্রিকার প্রথম বা শেষ পাতায় অথবা খবরের গুরুত্বপূর্ণ অংশে স্থান পাওয়ার জন্য আপনি জরুরি বিষয়গুলোতে গভীরতাধৰ্মী বড় ও বিশেষ প্রতিবেদনের সুযোগ চিহ্নিত করবেন। এমনিতেও আপনি চাইবেন, এসব বিষয়ের গভীরে গিয়ে প্রতিফলন।

- ✓ সাংবাদিককে গভীরে তলিয়ে খবরের বিষয়ের হিসেব দিন। সংবাদমূল্যগুলো বিচার করে আপনি সাংবাদিককে এমন খবরের দৃষ্টিকোণ বাতলে দিতে পারেন।
- ✓ আপনি চাইবেন, খবরগুলো প্রকাশে সাংবাদিক যেন নিজের ভেতর থেকে তাগিদ বোধ করেন। সে রকম ভালো ও বড় খবর অনুসন্ধানে তাঁকে প্রয়োজনীয় সহায়তা করুন।
- ✓ আপনি যে ঘটনা বা বিষয়ে সাংবাদিকের মনোযোগ চাইছেন, তার অভিনব বা নতুন দিকগুলো চিহ্নিত করুন। সাংবাদিককে সেটা দেখিয়ে দিন।
- ✓ ক্ষুদ্র জাতিসম্মত জন্য এসব বিষয়ের ফলাফল ও তাৎপর্য তাঁকে বুঝাতে সাহায্য করুন।

৫. আদিবাসীদের জন্য জরুরি বিষয়গুলো ও তাদের সমস্যা-বধ্যনা কীভাবে বৃহত্তর জনগোষ্ঠীর জীবনকেও প্রভাবিত করতে পারে, সে দিকে সাংবাদিকের দৃষ্টি আকর্ষণ করুন। যেমন, প্রাকৃতিক বনের জায়গায় বাণিজ্যিক বনায়ন আদিবাসীদের জীবন-জীবিকার ক্ষতি করে। কিন্তু দীর্ঘ মেয়াদে এটা পরিবেশ ও পুরো জনগোষ্ঠীর পরিস্থিতিই অস্থিতিশীল করে তুলতে পারে। এভাবে ঘটনা বা বিষয়ের বৃহত্তর প্রভাব-ফলাফলগুলো চিহ্নিত করুন।

৬. উপযুক্ত উপলক্ষের খৌজে থাকুন। সমাজে চলতি আগ্রহের দিকে নজর রাখুন। ক্ষুদ্র জাতিসম্মত জন্য জরুরি কোন বিষয়গুলো সেই আঙিকে খাপ খায় তা ভাবুন। বিশেষ দিবসগুলো লক্ষ্য করে প্রাসঙ্গিক ভালো প্রতিবেদন করার সুযোগ সম্পর্কে আগে থাকতে সাংবাদিকদের জানান।

৭. সংবাদমাধ্যমে ক্ষুদ্র জাতিসম্মত বিষয়ে সচরাচর দুই ধরনের খবর বেশি আসে, দ্বন্দ্ব-সংঘাত ও সংকৃতি-জীবনধারা। এগুলো কিন্তু খুবই বড় ও জরুরি বিষয়, তবে সব সময় সঠিকভাবে বা যথাযথ তাৎপর্য নির্দেশ করে উঠে আসে না। এসব ক্ষেত্রে খবরে গুণগত পরিবর্তন আনার উপায় ভাববেন। সাংবাদিককে সেই পথ দেখাবেন।

- ✓ ক্ষুদ্র জাতিসম্মত-সংক্রান্ত দ্বন্দ্ব-সংঘাতমূলক ঘটনার গভীরে গিয়ে সত্যানুগ ও দায়িত্বশীল প্রতিফলন সম্ভব করতে সাংবাদিককে সাহায্য করুন।

- ✓ ক্ষুদ্র জাতিসম্ভাবনার মানুষের রোজকার জীবনযাপনের নতুনত্ব, বৈচিত্র্য, সংগ্রাম-সমস্যা-দ্বন্দ্বগুলোর সঙ্গে সাংবাদিককে পরিচিত করান। গভীরে গিয়ে বোঝার সুযোগ করে দিন।
- ✓ সংস্কৃতির বৈচিত্র্য ও নতুনত্বের পাশাপাশি ক্ষুদ্র জাতিসম্ভাবনার জীবনে এর গুরুত্ব, এ ক্ষেত্রে নতুন-পুরোনোয় দ্বন্দ্ব, হারিয়ে যাওয়ার ঝুঁকি ও ক্ষতি—এসব তাঁকে বুঝিয়ে বলুন। এক ভাষা নিয়েই অনেক জরুরি এবং আগ্রহব্যৱ্যক্ত খবরের সুযোগ আছে।

৮. যখন সমাজের ব্যাপকসংখ্যক মানুষের জীবনকে প্রভাবিত করার মতো বড় কোনো ঘটনা ঘটে এবং চলমান থাকে, ক্ষুদ্র জাতিসম্ভাবনার মতো বিশেষ গোষ্ঠীর প্রতি মনোযোগ স্বভাবতই কমে যায়। এ রকম কোনো সময়ে যদি আদিবাসীদের জন্য বিশেষ জরুরি কোনো ঘটনা ঘটতে থাকে, সেটা সাংবাদিকের নজরে আনতে আপনার বাড়তি চেষ্টা দরকার হবে। সংবাদমূল্যগুলো বুঝে কৌশল ঠিক করতে হবে।

৯. সাংবাদিককে কেবল সমস্যার খবরের হিসেব দেবেন না। শুধু সমস্যা-বন্ধনার খবরে একটা বিরূপ চিত্র তৈরি হয়, গংবাধা স্টিরিওটাইপ চলে আসে। সমস্যা-বন্ধনা যেহেতু অনুপাতে বড়, সেগুলো অগ্রাধিকার অবশ্যই পাবে। কিন্তু পাশাপাশি ক্ষুদ্র জাতিসম্ভাবনার সম্পর্কে ইতিবাচক খবরাখবরের দিকেও সাংবাদিকের দৃষ্টি আকর্ষণ করতে সজাগ থাকুন। কোনো জনগোষ্ঠী বা ব্যক্তির বিশেষ কোনো অর্জন বা যেকোনো বিষয়ে সংগ্রাম ও বিজয়ের খবর চিহ্নিত করবেন। খারাপ খবরের ভিত্তির মধ্যে এসব বিষয়ের খবর সংবাদমাধ্যম এবং পাঠক-শ্রোতা-দর্শকের আলাদা মনোযোগ পায়।

১০. সম্ভাব্য প্রতিবেদন বা জরুরি বিষয় নিয়ে আলাপ করার জন্য সাংবাদিকের সুবিধাজনক সময় চেয়ে নেবেন। তবে মামুলি তুচ্ছ ঘটনা নিয়ে তাঁকে অস্ত্রিত করবেন না। বাড়তি কথা বলবেন না। কোনো সাংবাদিক আগ্রহী না হলে তাঁর এবং আপনার সময় নষ্ট না করে আগ্রহী জনকে খুঁজে নিন।

8

সাংবাদিককে তাঁর কাজে সহায়তা করা

আদিবাসী প্রতিনিধিদের একটি বড় অভিযোগ, সংবাদমাধ্যম ক্ষুদ্র জাতিসম্ভাবনার সম্পর্কে কিছু ছাঁচে-ঢালা ধারণা ও চিত্র তুলে ধরে। এটা কিন্তু অনেক সময় না-জানা থেকে হয়। সাংবাদিকের না-জানা ও না-বোঝার জায়গাগুলোয় আপনি গুণগত পরিবর্তন আনতে পারেন।

অন্যদিকে, সাংবাদিকের দরকার তথ্য। আপনি সে তথ্য পেতে সাহায্য করলে তিনি আপনাকে মনে করে রাখবেন; সুসম্পর্কের ভিত্তি মজবুত হবে। এটা ঠিক যে, ক্ষুদ্র জাতিসম্ভাবনার স্বার্থসংশ্লিষ্ট অনেক ঘটনার বিষয়ে কেউই মুখ খুলতে চায় না। স্পর্শকাতর এসব বিষয়ে রাষ্ট্রসহ অনেক প্রবল প্রতিপক্ষকে চটানোর ঝুঁকি থাকে। কিন্তু ভুক্তভোগী বা সাধারণ মানুষের জন্য এ ঝুঁকি অনেক বেশি। পক্ষান্তরে নেতৃত্ব বা সিবিও/এনজিও/সংগঠনের প্রতিনিধিরা কিছু কথাবার্তা বলতে পারেন। সে সাহসুকু করতে হবে। এ ছাড়া, তথ্য-প্রমাণ জুগিয়ে পরোক্ষভাবে সহায়তা তো তাঁরা করতেই পারেন।

চুম্বক পরামর্শ

১. সাংবাদিকদের তথ্য দেওয়ার সুবিধার্থে সব সময়ের জন্য সাধারণভাবে কিছু করণীয় :

- যেসব জাতিসভা নিয়ে কাজ করছেন, তাদের সম্পর্কে তথ্যকণিকা তৈরি রাখুন।
- বড় ঘটনাপঞ্জি ও ব্যক্তিত্বের জীবনবৃত্তান্ত তৈরি রাখুন। ছবি রাখুন।
- আদিবাসী-সংশ্লিষ্ট আন্তর্জাতিক ও জাতীয় আইনকানুনগুলোর সারসংক্ষেপ করে রাখুন।
- প্রধান সমস্যাগুলোর প্রয়োজনীয় ব্যাখ্যা ও প্রেক্ষাপটসহ তথ্যকণিকা তৈরি করে রাখুন।
- সমাজ-সংস্কৃতির বড় অনুষ্ঠানগুলোর তালিকা ও ছবিসহ বিবরণ রাখুন।
- সম্ভব হলে এসবের মাল্টিমিডিয়া উপস্থাপনার ব্যবস্থা রাখুন। ছবিসহ ব্রোশিওর ছাপান।
- নিজস্ব ওয়েবসাইট থাকলে সেটায় নিয়মিত তথ্য দিন এবং হালনাগাদ করুন।
- আদিবাসী জাতিগোষ্ঠীদের প্রভাবিত করে, এমন যেকোনো সরকারি নীতি-সিদ্ধান্তের নথিপত্র সংগ্রহে রাখবেন। এমন যাবতীয় নোটিশ/চিঠিপত্র/সভার কার্যবিবরণী ফাইলে থাকা চাই।
- একইভাবে গুরুত্বপূর্ণ বেসরকারি কর্মসূচি/প্রকল্পগুলোর ফাইল রাখুন।
- আপনার সংস্থা/সংগঠনের বার্ষিক প্রতিবেদন তৈরির সময় সাংবাদিকের তথ্য ও বিভিন্ন বিষয়ে জবাবদিহিতার চাহিদা মনে রাখুন। পরিচ্ছন্ন, গোছানো, তথ্যসমৃদ্ধ বার্ষিক প্রতিবেদন সাংবাদিককে ধারাবাহিক ও হালনাগাদ তথ্য-উপাত্ত দিতে পারে।
- গবেষণা, জরিপ বা কোনো বিশেষ উদ্যোগের পুস্তিকা প্রকাশ করতে চেষ্টা করবেন।
- সংস্থা/সংগঠনের নিজস্ব প্রকাশনা বা নিউজলেটার প্রকাশের চেষ্টা করুন।
- সময় সময় সাংবাদিকদের জন্য বিশেষ আয়োজন/অনুষ্ঠানের ব্যবস্থা করুন। এসব অনুষ্ঠানে কিছু সত্যিকার তথ্য-মতামত বিনিময়ের কথা ভাবুন। মোটামুটি নিয়মিত গোলটেবিল আলোচনা একটি ভালো উপায়। এমন উপলক্ষ সংবাদমাধ্যমে স্থান পাওয়ার ভালো সুযোগ।
- বড় কোনো অনুষ্ঠান-আয়োজনের আগে থেকে সাংবাদিককে বিষয়টির নানা দিক সম্পর্কে জানাতে থাকবেন। এতে তাঁর আগ্রহ বাড়বে, তিনি বিষয় ভালো করে বুঝতেও পারবেন। গুচ্ছিয়ে প্রেস-কিট তৈরি করবেন। সাংবাদিককে আগাম কাগজপত্র ও তথ্য পাঠাবেন।
- আপনার সংস্থা/সংগঠনে সাংবাদিককের তথ্য জানানোর জন্য একাধিক মুখ্যপাত্র রাখবেন। প্রয়োজনে সাংবাদিক যেন যেকোনো সময় অন্তত একজনকে যোগাযোগ করতে পারেন সেটা নিশ্চিত করবেন।
- এন্দেরসহ ক্ষুদ্র জাতিসভাদের নিয়ে কর্মরত মানুষজন, গুরুত্বপূর্ণ ব্যক্তি, সমমনা সংস্থা-প্রতিষ্ঠানের নাম-ঠিকানা, টেলিফোন ও মোবাইল ফোন নম্বর, ই-মেইল ঠিকানা সাংবাদিককে দিন। সম্ভব হলে ছোটখাটো নির্দেশিকা ছাপিয়েও ফেলতে পারেন। এগুলো নিজেদেরও কাজে আসবে।

২. সাংবাদিকের তথ্যসংক্রান্ত চাহিদা মেটানোর জন্য কিছু জরুরি সাধারণ বিবেচনা ও করণীয়:

- সাংবাদিক যখন কোনো তথ্য চাইবেন, আগে তৈরি হয়ে নেবেন। তাঁর তাড়াহুড়ো থাকলেও একটু সময় চেয়ে তথ্যগুলো গুছিয়ে নেবেন।
- কোনো কিছু জানা না থাকলে সেটা অকপটে স্বীকার করবেন। তথ্য দেওয়ায় কোনো সমস্যা বা বাধা থাকলে সংক্ষেপে বুঝিয়ে বলবেন। কখনোই স্টান বলবেন না যে, ‘মন্তব্য নেই’। এ থেকে সাংবাদিক সন্দেহ করতে পারেন যে আপনি কিছু গোপন করতে বা এড়িয়ে যেতে চাইছেন।
- ভুল বা মিথ্যা তথ্য দেবেন না। প্রকাশের আগে বা পরে সেটা যখন ধরা পড়বে, আপনার ওপর থেকে সাংবাদিকের আস্থা চলে যাবে। তা ছাড়া, সত্য প্রকাশ পাবেই। তখন মানুষ ক্ষুদ্র জাতিসভা সম্পর্কে যেকোনো খবরকে সন্দেহের চোখে দেখতে শুরু করবে।
- সাংবাদিকের চাই সূত্র-উৎস নির্দিষ্ট করা ছাঁকা তথ্য, প্রমাণ এবং যাচাইয়ের সুযোগ। তাঁকে আপনি তেমন তথ্য-প্রমাণ পেতে সাহায্য করবেন। কোথায় গেলে সেটা প্রত্যক্ষ দেখা যাবে বা তথ্য মিলবে, সেটা বাতলে দেবেন।
- নিরাপত্তার কারণে নাম প্রকাশ করতে আপত্তি থাকলে প্রামাণ্য নজির যেমন দেবেন, তেমনি অন্য আরও সূত্র নির্দেশ করবেন। সাংবাদিক তখন একাধিক সূত্রে যাচাই করতে পারবেন।
- জনগোষ্ঠীর সহায়তা ছাড়া ক্ষুদ্র জাতিসভা বিষয়ে গভীরে তলিয়ে বিশেষ প্রতিবেদন করা সম্ভব নয়। আপনি সে যোগাযোগগুলো ঘটিয়ে দিতে সক্রিয় ভূমিকা রাখবেন।
- ঘটনা বা প্রবণতার কার্যকারণ ও ফলাফল-তাৎপর্য বুঝাতে সাংবাদিককে সাহায্য করুন; এটা করবেন তথ্য-প্রমাণের ভিত্তিতে। যেকোনো ঘটনা বা বিষয়ের যথাযথ প্রেক্ষাপট জানাবেন। পরবর্তী ঘটনা বা ফলো-আপ জানাতে সজাগ থাকবেন।
- নিতান্ত তাড়াহুড়ো না থাকলে এবং ঘটনা বা বিষয় জটিল হলে টেলিফোনে তথ্য না দিয়ে সামনাসামনি আলাপ করতে চাইবেন।

৩. দিনের বড় ঘটনার ক্ষেত্রে সাংবাদিককে তথ্য পেতে বাড়তি সহযোগিতা করতে তৈরি থাকুন।

- দিনের ঘটনার ক্ষেত্রে সাংবাদিক চাইলেও সময় দিতে পারেন না। তিনি তখন চান চটজলদি গোছানো তথ্য ও বক্তব্য।
- হঠাৎ কোনো ঘটনা ঘটলে বক্তব্য-মন্তব্য-তথ্য দেওয়ার মতো ব্যক্তি বা নেতৃবৃন্দের সঙ্গে সাংবাদিকের যোগাযোগের ব্যবস্থা গড়ে তুলুন।
- নিজের সংগঠন/প্রতিষ্ঠানের মুখ্যপাত্রকে প্রস্তুত রাখুন। প্রেক্ষাপটের তথ্য, প্রয়োজনীয় তারিখ, সময়, ঘটনাস্থলগুলো গুছিয়ে লিখে ফেলুন।

- সাংবাদিকের জরুরি প্রয়োজনের সময় টেলিফোনে তাঁকে তথ্য দেবেন। তবে টেলিফোনে ভুল-বোঝা বুঝির ভয় থাকে। কথাগুলো গুছিয়ে নেবেন। সংক্ষেপে মূল এবং সুনিশ্চিত জানা তথ্য দেবেন।

৪. নিজের প্রয়োজনের সময় ছাড়াও সাংবাদিককে সাহায্য করুন। এলাকায় যেকোনো বড় ঘটনা ঘটলে সাংবাদিককে জানান। ক্ষুদ্র জাতিসভার বিষয়াদির বাইরেও তাঁকে খবরের ধারণা দিন। তথ্য জোগান। তিনি এ উপকার মনে রাখবেন। কখনো হয়তো আপনিও তাঁর কাছ থেকে কিছু ঘটনার আগাম তথ্য পাবেন।

বিশেষ অনুষ্ঠান

কোনো বিষয় বা সমস্যার দিকে সাংবাদিকের নজর টানতে চাইলে বিশেষ অনুষ্ঠান বা ইভেন্ট করা একটি কার্যকর জনসংযোগ পদ্ধতি। মেলা, আলোচনা, মতবিনিময়, কর্মশালা—ইত্যাদি ইভেন্ট পরিকল্পনার সময় সংবাদমূল্যগুলো মাথায় রাখবেন। আরও মনে রাখবেন : সাংবাদিক ভালো উদাহরণ ও তথ্য-প্রমাণ চাইবেন; ভালো ছবি তোলার সুযোগ খুঁজবেন; গুরুত্বপূর্ণ তথ্য-বক্তব্য দেওয়ার মতো মানুষজনকে হাতের কাছে চাইবেন। রেডিও ও টিভি শেষের দুটি সুযোগ না থাকলে বিশেষ আগ্রহী হবে না। প্রাসঙ্গিক হলে ভুক্তভোগী সাধারণ মানুষজনকে উপস্থিত করবেন। সম্প্রদায়ের নেতা, বর্ষীয়ান মানুষজনকে একত্র করবেন। নারীদের প্রতিনিধিত্ব বিশেষ জরুরি হবে। এঁদের সবার সঙ্গে সাংবাদিকদের কথা বলার ব্যবস্থা রাখবেন। সম্ভব হলে কোনো সংবাদমাধ্যমকে মিডিয়া-পার্টনার করুন।

৫

সংবাদমাধ্যমের সঙ্গে যোগাযোগের পরিকল্পনা

আটঘাট বেঁধে এগোনো দরকার।

- আগামী এক বছরে কোন কোন বিষয় বা সমস্যা সংবাদমাধ্যমের প্রকাশের জন্য চেষ্টা করবেন তার একটা তালিকা করুন। আপনার সংস্থা-সংগঠনের সদস্য এবং জনগোষ্ঠীর মানুষজনের সঙ্গে আলাপ করে তালিকাটি তৈরি করবেন।
- প্রতি চার মাসের লক্ষ্যমাত্রা স্থির করুন।

সাধারণভাবে আপনাকে সংবাদমাধ্যমের ধরন বুঝে সেগুলোর সর্বোচ্চ সম্বিহারের উপায় ভাবতে হবে :

- দৈনিক পত্রিকা সবচেয়ে জরুরি। এর আছে স্থায়িত্ব ও গভীরে যাওয়ার সুযোগ। যেসব বিষয় বিস্তারিত ব্যাখ্যা-বিশ্লেষণ, বড় জায়গা দাবি করে সেগুলোর ক্ষেত্রে আপনি দৈনিক পত্রিকাসহ ছাপা-মাধ্যমের প্রতি বিশেষ মনোযোগী হবেন। তবে দৈনিকগুলো সচরাচর গণপত্রিকা। বিশেষ জনগোষ্ঠীর বিষয়ে আলাদা গুরুত্ব বা নজর দিতে এদের অনীহা থাকে, সুযোগও কম থাকে। সাময়িকী বা বিশেষ আগ্রহের পত্রিকা হয়তো বেশি গুরুত্ব দেবে।
- রেডিও এবং টিভি আপনি বাছবেন তাৎক্ষণিকতা ও প্রাণবন্ত সজীব উপস্থাপনার তাগিদ থেকে। ঘটনায় জোরালো ছবি দেখানোর সুযোগ থাকলে আপনি টিভিকে বিশেষ আগ্রহী করতে পারবেন। আকর্ষণীয় শব্দচিত্র ও বক্তব্য পাওয়ার সুযোগ থাকলে তাতে রেডিও বিশেষ আগ্রহী হবে। তবে বিশেষ অনুষ্ঠান ছাড়া এদের খবরের গভীরে যাওয়ার কোনো সুযোগ নেই। এদের আপনি তথ্যচিত্র বা ধারাবাহিক প্রতিবেদনের ধারণা দিতে সচেষ্ট থাকবেন। কিন্তু এরাও গণসংবাদমাধ্যম, দৈনিক পত্রিকার সীমাবদ্ধতাগুলো এদেরও থাকবে।

সংবাদমাধ্যমের রৌপ্য ও বাছাই : গণসংবাদমাধ্যমে সংখ্যালঘু অথবা সংখ্যাগুরুর চেয়ে ভিন্ন যেকোনো গোষ্ঠীর কথা কম আসে। প্রাতিষ্ঠানিক তথা সম্পাদকীয় সচেতন দৃঢ় নীতি-সিদ্ধান্ত না থাকলে ক্ষুদ্র জাতিসভার মতো কোনো গোষ্ঠী সেখানে বিশেষ গুরুত্ব পায় না। আবার, মাধ্যমে মাধ্যমেও নীতির বেশকম থাকে। কেউ হয়তো এ প্রশ্নে একেবারেই নেতৃত্বাচক অবস্থান নেয়।

- আপনাকে উল্লেখযোগ্য সবগুলো প্রতিষ্ঠানের চরিত্র ও নীতিগত অবস্থান বুঝতে হবে। বোঝার প্রথম উপায় হচ্ছে—নিয়মিত বিভিন্ন টিভি ও রেডিওর সংবাদসংক্রান্ত সবগুলো খবর দেখা/শোনা; পত্রিকাগুলো নিয়মিত আগামাত্তলা পড়া।
 - ✓ লক্ষ করুন—বড় ঘটনা কে কীভাবে প্রকাশ করছে; কোন মাধ্যম কতখানি জায়গা দিচ্ছে, কোন পাতায় ছাপছে; কারা সম্পাদকীয় ও উপসম্পাদকীয় ছাপছে, সেগুলোর বক্তব্য কী।
 - ✓ এ ছাড়া সম্পাদক পর্যায়ে কথা বললেও ধারণা পাবেন।

আপনার বোঝার ভিত্তিতে সংবাদমাধ্যমের শ্রেণীবিভাগ করে অগ্রাধিকারভিত্তিক তালিকা ঠিক করুন। মনে রাখবেন, সব সংবাদমাধ্যম আদিবাসীদের জন্য জরুরি খবর ও সমস্যা সঠিকভাবে তুলে ধরবে না।

- ✓ যারা সংবেদনশীল, যাদের ইতিবাচক নীতি আছে, তাদের প্রতি বাড়তি মনোযোগ দিন। তাদের সাংবাদিককে আপনি খাস খবর দেবেন, সবার আগে তাঁদের সঙ্গে যোগাযোগ করবেন।
- ✓ তবে বিরুদ্ধ মতের বা নেতৃত্বাচক নীতিসম্পন্ন মাধ্যমের সংবাদকর্মীদেরও খোলা মনে ডাকুন, তথ্য দিন।

সংবাদমাধ্যমগুলোর প্রবণতায় সব সময় নজর রাখুন। সে অনুযায়ী আপনার অগ্রাধিকার-তালিকা পুনর্বিবেচনা করুন।

- আপনাকে বুঝতে হবে, কোন খবরটি কার কাছে কী আকারে পৌছাতে চান। সেটা বুঝেও আপনি সংবাদমাধ্যম ও সুনির্দিষ্ট প্রতিষ্ঠানে মনোনিবেশ করবেন।
 - ✓ নীতিনির্ধারকদের মনোযোগ টানতে হলে আপনার দরকার বড় জাতীয় দৈনিক, রেডিও/টিভি
 - ✓ ছোটখাটো স্থানীয় খবরের জন্য স্থানীয় দৈনিককে বেশি গুরুত্ব দেবেন। কমিউনিটি রেডিও পুরোদমে চালু হলে সে প্রতিষ্ঠানগুলো আপনার জন্য বিশেষভাবে জরুরি হবে।
 - ✓ অর্থনীতির খবর অর্থনৈতিক পত্রিকা বেশি নেবে। আবার, একই মাধ্যমের মধ্যে নানা বিভাগ ও বিশেষ আয়োজনের অংশ থাকে, তাদের চাহিদাও ভিন্ন ভিন্ন হয়। যেমন আদিবাসী ক্ষুদ্র ব্যবসায়ীদের কোনো খবর ব্যবসা-বাণিজ্য পাতার জন্য ভালো খবর হবে। আদিবাসী নারীদের বিষয়ে কোনো ফিচার বা প্রতিবেদন নারীর পাতায় সহজে ছাপানো যাবে।
 - ✓ সব সময় সংবাদের পাতাগুলো লক্ষ্য না করে আপনি এসব বিভিন্ন বিভাগীয় পাতায় বা অংশে জায়গা পাওয়ার চেষ্টা করবেন।
 - ✓ সংবাদ প্রতিবেদন ছাড়াও ফিচার, উপসম্পাদকীয়, নিবন্ধ, ছবি, আলোচনা অনুষ্ঠান, তথ্যচিত্র—সব ধরনের প্রকাশনা লক্ষ্য করে চেষ্টা করবেন। বিষয় বুঝে সংশ্লিষ্ট দণ্ডে প্রতিবেদক/সম্পাদকদের সঙ্গে যোগাযোগ করবেন।

যোগাযোগের তালিকা

- জাতীয় সংবাদমাধ্যম ও স্থানীয় সংবাদমাধ্যমের বিভিন্ন পর্যায়ের সাংবাদিকদের নাম-ঠিকানা-পদবি, টেলিফোন ও মোবাইল ফোন নম্বর, ই-মেইল ঠিকানা রাখুন। নিয়মিত হালনাগাদ করুন। যাদেরগুলো অবশ্যই চাই : এলাকার প্রতিনিধি, এ বিষয়ে কাজ করা প্রতিবেদক, প্রধান প্রতিবেদক, বার্তা সম্পাদক, মফস্বল সম্পাদক, ডেক্সের বিভিন্ন পালার দায়িত্বপ্রাপ্ত জনেরা বা শিফট-ইন-চার্জ, সম্পাদকীয় বিভাগের প্রধান, ফিচারসহ বিভিন্ন বিশেষ বিভাগীয় প্রধান, বিশেষ দায়িত্বপ্রাপ্ত অন্য কোনো সম্পাদক পদস্থ ব্যক্তি (যদি থাকে), সম্পাদক।
- সংবাদমাধ্যমের নীতি-সংবেদনশীলতার ভিত্তিতে অগ্রাধিকারপ্রাপ্য প্রতিষ্ঠান/সাংবাদিকদের তালিকা আলাদা রাখুন। একটি সাধারণ বড় তালিকা রাখুন।
- পিআইডির মিডিয়া গাইড, প্রেসক্লাব, রিপোর্টার্স ইউনিটিসহ সাংবাদিকদের পেশাজীবী সংগঠনগুলোর প্রধান পদাসীন সাংবাদিকদের যোগাযোগের তালিকা রাখুন। এঁদের আপনি বিভিন্ন বিষয়ে লেখালেখি করতে উদ্বৃদ্ধ করতে পারেন। কখনো গণমাধ্যমে এককাটা হয়ে প্রচার-প্রচারণায় এঁদের সম্পৃক্ত করতে পারেন।

- সমমনা এনজিও/সিবিও/সংগঠনের যোগাযোগ-তালিকা রাখুন। কোনো গুরুত্বপূর্ণ বিষয়ে জোটবদ্ধভাবে গণমাধ্যমের সঙ্গে যোগাযোগে এদের সমর্থন লাগবে।

সবগুলো তালিকা নিয়মিত হালনাগাদ করবেন।

টুকিটাকি

- নিজের প্রতিটি তৎপরতার মূল্যায়ন করুন। নিজের কাজের সাফল্য ও ব্যর্থতা পর্যালোচনা করুন। অভিজ্ঞতা থেকে শিক্ষা নিন।
- গুরুত্বপূর্ণ পত্রিকাগুলোয় ক্ষুদ্র জাতিসম্পত্তি সম্পর্কে প্রকাশিত লেখাগুলো কেটে ভাগে ভাগে গুছিয়ে রাখুন। এতে সংবাদমাধ্যম ও সাংবাদিককে বুঝাতে সুবিধা হবে। তা ছাড়া, বিভিন্ন বিষয়ে ব্যাকগ্রাউন্ড গোছাতে এবং তথ্যকণিকা তৈরি করতে সাহায্য হবে।
- সাংবাদিকদের জন্য যখন যে কাগজপত্র তৈরি করছেন, তার কপি সংরক্ষণ করবেন। নিউজলেটার, বার্ষিক প্রতিবেদন, সমীক্ষাপত্র, গবেষণা প্রতিবেদন, ব্রোশিয়ারের একাধিক কপি সংগ্রহে রাখবেন।
- নিজের সংস্থা-সংগঠনের উল্লেখযোগ্য কার্যক্রমের বিবরণ-নজির গুছিয়ে রাখবেন। স্থানীয় আদিবাসী নেতাদেরসহ বিভিন্ন গুরুত্বপূর্ণ ব্যক্তিত্বের বক্তৃতা-বিবৃতির কপি রাখবেন।
- আপনার সংস্থা/সংগঠন থেকে পাঠানো সব সংবাদ-বিজ্ঞপ্তির কপি সংরক্ষণ করুন।

টাকা দিয়ে নয়

সাংবাদিককে টাকা দিয়ে খবর প্রকাশের ব্যবস্থা করতে যাবেন না। আজকাল বিভিন্ন অনুষ্ঠানে উপস্থিতির জন্যও টাকা দেওয়া হয়। এটা সৎ সাংবাদিকতার চর্চার জন্য ভালো না। সাংবাদিকের মনে অনাকাঙ্ক্ষিত প্রত্যাশা তৈরি হয়। তা ছাড়া, দায়িত্বশীল সাংবাদিক এতে আপনার সম্পর্কে বিরূপ ধারণা করবেন। সাংবাদিককে কিনে দীর্ঘ মেয়াদে আপনার লক্ষ্যসাধন করতে পারবেন না।

সংবাদ-বিজ্ঞপ্তি

কোনো ঘটনা, অনুষ্ঠান বা কার্যক্রমের খবর জানাতে আপনি সংবাদমাধ্যমের কাছে সংবাদ-বিজ্ঞপ্তি পাঠিয়ে থাকেন। আপনার পাঠানো সংবাদ-বিজ্ঞপ্তির তিনটি সম্ভাব্য পরিণতি ভেবে রাখুন :

- হ্রব্দ প্রকাশ
- সম্পূরণ ও সম্পাদনার পর প্রকাশ
- পত্রপাঠ বাতিলের ঝুঁড়িতে ফেলে দেওয়া

হ্রব্দ প্রকাশ হওয়ার সম্ভাবনা ক্ষীণ, বাতিলের ঝুঁড়িতে যাওয়ার ভয় প্রবল। মনে রাখবেন, সংবাদমাধ্যমের বার্তাকক্ষে রোজ অনেক সংবাদ-বিজ্ঞপ্তি যায়—সুতরাং প্রতিযোগিতা তীব্র হবে।

আপনার প্রথম চেষ্টা হবে, সেটা যেন প্রকাশের জন্য বিবেচিত অন্তত হয়। সুতরাং নিশ্চিত করুন :

- বিজ্ঞপ্তি যেন সঠিক ব্যক্তির হাতে পৌছায়।
- টেবিলে স্তুপ হওয়া বিজ্ঞপ্তিগুলোর মধ্য থেকে আপনার ‘শিখটি’ যেন সংশ্লিষ্ট সম্পাদক বা প্রতিবেদকের নজরে পড়ে।
- পড়তে যেন বিরক্ত না লাগে; মূল কথা যেন চট করে সহজে বোকা যায়।
- বিরাট রদবদল করে সম্পাদনা যেন করতে না হয়। হাতে কেটে সম্পাদনা করাও যেন সহজ হয়।
- বিজ্ঞপ্তিকে প্রতিবেদনে রূপ দেন প্রতিবেদক অথবা কপি-সম্পাদক। ধরে রাখতে পারেন যে, ভালো সাংবাদিক আরও কিছু বাড়তি তথ্য খোঁজ করবেন এবং যাচাই করতে চাইবেন। সেটার উপায় বাতলে দিন।

পরামর্শ

ভালো সংবাদ-বিজ্ঞপ্তি লেখার কিছু কলাকৌশল পরে বলব। আগে কিছু সাধারণ করণীয় দেখি :

ক্ষেত্র তৈরি করা

১. মূল বিজ্ঞপ্তির আগে দু-তিন বাকে বিষয় বা ঘটনাটি পরিষ্কার করে একটি চিঠি সংযুক্ত করবেন।
২. চিঠির সম্মোধনে ‘বরাবর সম্পাদক’ লিখবেন। কিন্তু সেটা কেবল সম্পাদকের কাছে পৌছালে চলবে না। চোখ এড়িয়ে যেতে পারে। বার্তা সম্পাদক, সংবাদের যে অংশে বা দৈনিক পত্রিকার যে পাতায়/সাংগ্রাহিক বিশেষ আয়োজনে প্রকাশের সম্ভাবনা বেশি তার সম্পাদক, এবং প্রধান প্রতিবেদকের কাছে এর অনুলিপি দেবেন। বড় প্রতিষ্ঠানে বিজ্ঞপ্তি বাছাইয়ের প্রাথমিক কাজটি প্রধান প্রতিবেদক বা তাঁর সহকারীরা করে থাকেন।
৩. এঁদের সঙ্গে আপনার পরিচয় বা যোগাযোগের ক্ষেত্র আগে থেকে তৈরি রাখবেন। যাঁর সঙ্গে আপনার যোগাযোগ সবচেয়ে ভালো, তাঁকে ফোন করে বিজ্ঞপ্তির কথা জানাবেন। স্পর্শকাতর বিষয়ে সরাসরি সম্পাদকের সঙ্গেও কথা বলা জরুরি হবে।
৪. এঁদের কোনো কিছু প্রকাশের সরাসরি অনুরোধ করবেন না। খুব সংক্ষেপে বিষয়টির গুরুত্ব বলে বিবেচনা করতে বলবেন। এতে খবরটি গুরুত্ব পাবে। বিশেষ কোনো প্রসঙ্গে প্রকাশের জন্য অনুরোধ করা জরুরি হলে করবেন, তবে কখনোই বারবার তাগাদা দেবেন না।
৫. এলাকার কোনো বিষয় বা ঘটনা হলে জাতীয় সংবাদমাধ্যমের স্থানীয় প্রতিনিধির সঙ্গে আগে আলাপ করে নেবেন। তাঁর জ্ঞাতসারে এবং তাঁর পরামর্শ নিয়ে ওপরের পর্যায়ে পাঠাবেন।
৬. প্রধান প্রতিবেদক ও বার্তা সম্পাদকসহ সম্পাদকদের সঙ্গে সঙ্গে কথা বলার জন্য সবচেয়ে ভালো সময়

একটু বেলা করে, দুপুরের দিকে। বিকেলের পর থেকে বার্তাকক্ষে ব্যস্ততার ঝড় শুরু হয়। তখন বাড়তি কথা বলে সময় নিলে এরা বিরক্ত হবেন।

৭. সংবাদ-বিজ্ঞপ্তি পাঠানোর কথা বারবার জানাবেন না; সেটা বিরক্তিকর হবে।

৮. সংবাদমাধ্যমের সংবেদনশীলতা বিচার করে অগ্রাধিকারভিত্তিক যে তালিকা করে রেখেছেন, সেগুলোর ক্ষেত্রে বিশেষ যত্ন নিয়ে যোগাযোগ করবেন। এ ছাড়া, বড় সাধারণ তালিকাভুক্তদেরও পাঠাবেন, তবে সবার সঙ্গে ব্যক্তিগতভাবে যোগাযোগ করা না হলেও ক্ষতি নেই।

সময় হাতে রেখে

১. সংবাদ-বিজ্ঞপ্তি যথাসম্ভব আগে পাঠাবেন। যদি কোনো ঘটনা বিকেলের দিকে বা পরে ঘটে তবে আপনাকে বিজ্ঞপ্তি পরেই পাঠাতে হবে। নির্ধারিত কোনো অনুষ্ঠান হলে সকালেই কথা বলে রাখলেন, বিজ্ঞপ্তি পাঠানোর পর একবার শুধু খৌজ নিলেন তাঁর হাতে পৌছেছে কি না।

২. ই-মেইলে পাঠানোর সুযোগ থাকলে সেটা অবশ্যই করবেন। ই-মেইলে পাঠানো লেখা পত্রিকাকে কম্পোজ করতে হয় না, ছবিও ছাপা সহজ হয়। তবে সম্ভব হলে সেই সঙ্গে কাণ্ডে কপি ও পাঠাতে চেষ্টা করবেন। ই-মেইলে পাঠানো বিজ্ঞপ্তি চোখে পড়ল কি না তা নিশ্চিত করতে অবশ্যই ফোন করবেন।

৩. দৈনিক পত্রিকার প্রত্যেক সংক্ষরণ এবং সাংগ্রাহিক বিশেষ পাতাগুলোর জন্য আলাদা আলাদা ডেডলাইন থাকে। সেটা আপনার জানা থাকতে হবে। যেখানে খবরটি প্রকাশ হওয়ার সম্ভাবনা বেশি সে বিভাগের ডেডলাইনের যথেষ্ট আগে বিজ্ঞপ্তি পাঠাবেন। দেরিতে পৌছালে ভালো খবরও প্রকাশের সুযোগ হারাতে পারে। রেডিও-টিভির ক্ষেত্রে বিভিন্ন বুলেটিনের ডেডলাইন থাকে। তবে সেখানে একটি হারালেও পরবর্তীটি দিনাদিন ধরতে পারার সুযোগ থাকে।

৪. বিজ্ঞপ্তির সঙ্গে আরও কাগজপত্র থাকলে-কোনো বক্তৃতার পুরো কপি, কোনো প্রতিবেদন, কারো জীবনবৃত্তান্ত, প্রাসঙ্গিক কোনো সাক্ষাৎকার, উদাহরণ বা মানবিক কোনো বিবরণ, নথিপত্র, ব্রোশিওর-সেগুলোর কিছু আগে পাঠাতে চেষ্টা করবেন। পরে বিজ্ঞপ্তির সঙ্গে আবার সংযুক্ত হিসেবে দেবেন। কোনো ওয়েবসাইটে প্রাসঙ্গিক তথ্য-প্রয়োগ থাকলে সেগুলোর ঠিকানা দেবেন।

৫. হাতে সময় একেবারে কম থাকলে এবং ই-মেইলের সুযোগ না থাকলে ফ্যাক্সে সংবাদ-বিজ্ঞপ্তি পাঠাতে পারেন। তবে চেষ্টা করবেন যথাসম্ভব আগে সংবাদ-বিজ্ঞপ্তি তৈরি করে ফ্যাক্সের ব্যবহার এড়াতে। ফ্যাক্সে পাঠালে অবশ্যই ফোনে কথা বলে নেবেন। তার পরও কিন্তু ফ্যাক্সে পাঠানো কাগজ হারিয়ে যেতে পারে। তা ছাড়া, ফ্যাক্সে আনুষঙ্গিক কাগজপত্র পাঠানো ঝামেলার ব্যাপার।

আনুষঙ্গিক খুঁটিনাটি

১. চিঠি এবং বিজ্ঞপ্তি দুটির ওপরেই স্পষ্ট করে তারিখ দেবেন। বিজ্ঞপ্তির আকর্ষণীয় একটি শিরোনাম দেবেন।

২. আপনার সংস্থা-সংগঠনের প্যাডে, না থাকলে পরিষ্কার সাদা পাতায় বিজ্ঞপ্তি দেবেন। হাতে লিখতে হলে হাতের লেখা ভালো, এমন কাউকে দিয়ে লেখাবেন। তবে টাইপ করা বা কম্পিউটারে লেখা পড়তে সহজ, দেখতেও পেশাদারি হয়। ছোট হরফ ব্যবহার করবেন না। হাতে কাটাকাটি করবেন না।

৩. প্রতিটি কপি কম্পিউটার থেকে বের করতে চেষ্টা করবেন। ফটোকপি করলে দেখবেন কোথাও ঝাপসা বা অস্পষ্ট যেন না হয়।

৪. লাইন এবং অনুচ্ছেদগুলোর মধ্যে যথেষ্ট জায়গা ছাড়বেন—ডবল স্পেস রাখা ভালো। বাঁ দিকে চওড়া মার্জিন রাখবেন; হাতে সম্পাদনা করা সহজ হবে।

৫. বিজ্ঞপ্তি এক পৃষ্ঠা, বড় জোর দুই পৃষ্ঠার মধ্যে রাখবেন। বড় বিজ্ঞপ্তি বাতিল হওয়ার ভয় বেশি। প্রতি পৃষ্ঠায় তারিখ ও পৃষ্ঠা নম্বর দেবেন। পৃষ্ঠা নম্বর দেবেন এভাবে : ২-এর ১। পৃষ্ঠার নিচের দিকে লিখবেন ‘পরবর্তী পৃষ্ঠা দেখুন’। লেখার শেষে লিখুন ‘সমাপ্ত’ অথবা #### চিহ্ন দিন। ফ্যাক্সে পাঠালে প্রতি পৃষ্ঠার ওপরে বিষয়ের উল্লেখ করবেন।

৬. গুরুত্বপূর্ণ খবর হলে রেডিও-টিভি বা অনলাইন মাধ্যমে তাৎক্ষণিক প্রকাশের জন্য আলাদা করে মূল কথার একেবারে সারসংক্ষেপ বিজ্ঞপ্তি তৈরি করতে পারেন।

৭. বাড়তি তথ্য বা কোনো কিছু যাচাই দরকার হলে যোগাযোগ করার জন্য দায়িত্বশীল কারো নাম-ঠিকানা-ফোন নম্বর দেবেন। এটা করার সুযোগ যে আছে, তা চিঠিতে এবং বিজ্ঞপ্তির শেষে পরিষ্কার করে লিখে দেবেন। বিজ্ঞপ্তি যাঁর নামে যাচ্ছে, শেষে তাঁর নাম, পরিচিতি/পদ/পদবি এবং মোবাইলসহ ফোন নম্বর ও ই-মেইল ঠিকানা তো অবশ্যই দেবেন।

৮. বাংলাভাষী রেডিও-টিভি ও পত্রপত্রিকার জন্য বিজ্ঞপ্তি বাংলায় লিখবেন। ইংরেজি গণমাধ্যমের জন্য ইংরেজিতে বিজ্ঞপ্তি পাঠাবেন। সংবাদ-বিজ্ঞপ্তি অনুবাদ করতে হলে প্রতিবেদক/কপি-সম্পাদকের বাড়তি সময় যায়, ভুল হওয়ার ভয়ও থাকে।

৯. ছবি : বিজ্ঞপ্তির সঙ্গে ছবি দিতে চেষ্টা করবেন।

- ✓ ছোট বা আঘাতিক পত্রপত্রিকায় নিজস্ব ছবির আকাল থাকতে পারে এবং ছবি পেলে তাদের আগ্রহ বাড়তে পারে।
- ✓ রেডিও-টিভিতে ছবি ছাপানোর প্রশ্ন নেই। বড় দৈনিক সচরাচর, বিশেষ করে বড় ঘটনায়, নিজেদের আলোকচিত্রীর তোলা ছবি ছাড়া ব্যবহার করতে চায় না। তবু ছবিসহ বিজ্ঞপ্তি পাঠাবেন। অন্য বিজ্ঞপ্তিগুলোর থেকে তখন এটা আলাদা করে চোখে পড়বে।
- ✓ কিন্তু ই-মেইল-সুবিধা না থাকলে সবগুলো সংবাদমাধ্যমের কাছে ছবি পাঠানো ব্যবসাপেক্ষ। সে সামর্থ্য না থাকলে বিজ্ঞপ্তির সঙ্গে বলে দেবেন যে, ছবি চাইলে পাওয়া যাবে। তবে খবরটি ধরানো জরুরি মনে করলে অন্তত একটি ছবি সঙ্গে দিতে চেষ্টা করবেন। আপনার অগ্রাধিকার-তালিকাভুক্ত সংবাদমাধ্যমগুলোর কাছে হয়তো একাধিক ছবি পাঠালেন।

- ✓ ছবি পাঠালে বিজ্ঞপ্তির মাথায় ‘ছবিসহ’ কথাটি লিখে দিতে পারেন।
- ✓ ছবির বিষয়বস্তু, স্থান, সময়, মানুষদের পরিচিতি টাইপ করে প্রতিটি ছবির উল্টোপিঠে জুড়ে দিন; ই-মেইলে হলে ছবির ক্যাপশন হিসেবে লিখে দিন। সেখানে সংবাদ-বিজ্ঞপ্তির শিরোনাম ও আপনার সংস্থা-সংগঠনের নামও দেবেন। দুটি কারণে এটা করা জরুরি : বিজ্ঞপ্তি থেকে ছবি কখনো আলাদা হয়ে গেলে প্রতিবেদক বা কপি সম্পাদক পেছনের তথ্য ধরে দুটোকে আবার মেলাতে পারবেন; ছবি ছাপালে সেটার ক্যাপশন বা শিরোনাম লিখতে তাঁর সুবিধা হবে। কখনো হয়তো তিনি শুধু ছবিটিই ছাপানোর সিদ্ধান্ত নিতে পারেন। বিষয়বস্তুর বিবরণ সুতরাং সংক্ষিপ্ত অথচ পর্যাপ্ত হতে হবে।

মিলিয়ে দেখুন

ছাপা হওয়া প্রতিবেদনের সঙ্গে আপনার পাঠানো সংবাদ-বিজ্ঞপ্তি মিলিয়ে দেখবেন। সাংবাদিক কী সম্পাদনা করেছেন? তথ্যের ক্রমে তিনি কী রদবদল করেছেন? কার্যকর সংবাদ-বিজ্ঞপ্তি লেখার দিকনির্দেশনা পাবেন।

সংবাদ-বিজ্ঞপ্তি লেখা

আদর্শ সংবাদ বিজ্ঞপ্তির জন্য কিছু সাধারণ করণীয় ভাবা যায় :

- ✓ নিজের ঢাক বেশি পেটাবেন না। কেবল কথার ফুলবুরি হলেও চলবে না। তেমন বিজ্ঞপ্তি সোজাসুজি বাতিল হয়ে যেতে পারে।
- ✓ সংবাদ-বিজ্ঞপ্তিতে অবশ্যই কিছু যথার্থ খবর থাকতে হবে। সাংবাদিক বিজ্ঞপ্তি ঝোড়েবেছে সেটুকুতেই আগ্রহী হবেন।
- ✓ খবরের গড়পড়তা গ্রাহকের আগ্রহ জাগানোর মতো তথ্য-বিবরণ থাকতে হবে। সংবাদমূল্যের মাপকাঠিগুলো মাথায় রাখবেন।
- ✓ একবারে প্রতিবেদনের মতো করে লেখা সংবাদ-বিজ্ঞপ্তি সম্পাদনা করতে বামেলা কম হয় এবং সময় বাঁচে দেখে প্রকাশের সম্ভাবনা বাড়ে।

সংবাদ-বিজ্ঞপ্তির কাঠামো : প্রতিবেদনের সোজাসাপটা কাঠামো অনুসরণ করতে হবে। অর্থাৎ—

- ঘটনা বা বিষয়ের মূল কথা সংক্ষেপে স্পষ্ট করে জানাবেন। তথ্য ও বক্তব্যগুলো গুরুত্বের ক্রমানুসারে সাজাবেন। সচরাচর নিজের সংস্থার প্রচারণামূলক কথাবার্তা দিয়ে শুরু করতে গিয়ে গুরুত্বপূর্ণ তথ্যগুলো চলে যায় বিজ্ঞপ্তির মাঝামাঝি বা শেষের দিকে। এটা করা যাবে না। গুরুত্বপূর্ণ তথ্যগুলো আগে দেওয়ার দুটি কারণ :

- ✓ এভাবে লিখলে প্রতিবেদক বা কপি-সম্পাদককে পুরো বিজ্ঞপ্তি হাতড়ে মূল সংবাদ খুঁজে বের করতে হয় না। কোন তথ্যগুলো জরুরি তা তিনি চট করে বুঝতে পারেন।
- ✓ কখনো মূল বিজ্ঞপ্তি মোটামুটি অক্ষুণ্ণ রেখে ছাপাতে নিলে এবং সেটা শেষ মুহূর্তে ছোট করতে হলে তিনি শেষ দিক থেকে ছাঁটেন। গুরুত্বপূর্ণ তথ্য শেষে থাকলে সেটা কিন্তু তখন বাদ পড়ে যাবে।
- যেকোনো ঘটনা বা বিষয় সম্পর্কে মূল কথা জানাতে গেলে ছয়টি প্রশ্নের উত্তর দরকার হয় : কী ঘটেছে, কে বা কারা ঘটিয়েছে, কোথায় ঘটেছে, কখন ঘটেছে, কেন এটা ঘটেছে এবং কীভাবে এটা ঘটেছে। ঘটনা বা বিষয়ের ক্ষেত্রে যে প্রশ্নগুলো সবচেয়ে জরুরি, প্রথম অনুচ্ছেদে সেগুলোর চুম্বক উত্তর থাকবে।
 - ✓ সচরাচর প্রথম চারটি প্রশ্নের চুম্বক উত্তর বিজ্ঞপ্তির প্রথম অনুচ্ছেদেই থাকতে হবে।
 - ✓ প্রয়োজন হলে প্রথম অনুচ্ছেদে ছয়টি প্রশ্নেরই সংক্ষিপ্ত উত্তর দেওয়া যেতে পারে। তবে শেষ দুটি প্রশ্নের উত্তর সব সময় ধরানো সম্ভব হবে না। তাতে বক্তব্য জটিল হয়ে পড়তে পারে। সেগুলো তখন দ্বিতীয় ও তৃতীয় অনুচ্ছেদে গুরুত্বের ক্রমে আসতে পারে।
- ঘটনার সঙ্গে আপনার সংস্থা-সংগঠনের সম্পৃক্ততা থাকলে সেটা মূল বিষয়বস্তু সঙ্গে বিজ্ঞপ্তির গোড়ার দিকেই চলে আসবে। বিশেষ প্রয়োজন না হলে আপনার সংস্থার পরিচিতি দেবেন শেষে।
- এভাবে প্রথম দু-তিনটি অনুচ্ছেদে মূল কথার সারমর্ম জানিয়ে বিজ্ঞপ্তির বাকি অংশে সেগুলো কিছুটা বিস্তারিত জানাবেন।
 - ✓ মূল কথাগুলো জানানোর সময় আপনি চেষ্টা করবেন ঘটনা বা বিষয়ের তাৎপর্যের দিকটি স্পষ্ট করতে। সেটাও প্রথম কয়েক অনুচ্ছেদের মধ্যে করা দরকার।
 - ✓ প্রসঙ্গগুলো আসবে গুরুত্বের ক্রমানুসারে। অনুশিরোনাম বা সাবহেড দিয়ে বড় প্রসঙ্গগুলো চিহ্নিত করবেন।
- প্রসঙ্গগুলো তুলে ধরতে গিয়ে অবশ্যই আপনার সংস্থা-সংগঠনের প্রতিনিধির বক্তব্যসহ ঘটনায় জড়িত মানুষজনের মুখের কথার সরাসরি উদ্ধৃতি ব্যবহার করবেন।
 - ✓ সরাসরি উদ্ধৃতি লেখাকে প্রাণবন্ত ও বিশ্বাসযোগ্য করে। চেষ্টা করবেন, দ্বিতীয় বা তৃতীয় অনুচ্ছেদে কারও প্রাসঙ্গিক ভালো কোনো উক্তি যোগ করতে।
 - ✓ জোরালো ও বর্ণময় উক্তি বেছে নেবেন। কোনো মতামত, মন্তব্য বা অভিযোগ কারও সরাসরি উক্তি হিসেবে আসা ভালো হবে।
 - ✓ বিজ্ঞপ্তিতে একাধিক সরাসরি উক্তি থাকা ভালো হবে।
 - ✓ গুরুত্বপূর্ণ ঘটনায়, অধিকারের প্রশ্নে বিশিষ্ট কোনো নাগরিক বা মানবাধিকারকর্মীর মন্তব্য নিতে পারলে সংবাদ-বিজ্ঞপ্তির গুরুত্ব বাড়বে।
 - ✓ যাঁর উক্তি তাঁর পুরো নাম ও পরিচয় পরিকার করে উল্লেখ করবেন।

- যেখানে সম্ভব, ঘটনায় জড়িত মানুষজনকে বিবরণে প্রত্যক্ষ করে তুলবেন। এভাবে মানবিক প্রেক্ষাপট ফুটে উঠলে লেখাটি আকর্ষণীয় হবে। পরিস্থিতির সঙ্গীব বর্ণনা জরুরি হতে পারে। যেখানে সম্ভব উদাহরণ দেবেন।
- বিজ্ঞপ্তিতে যার নামই আসবে, সঠিক বানানে পুরো নাম চাই; পুরো পরিচিতি চাই।
- ব্যক্তিগত আক্রমণ বা ঢালাও কোনো অভিযোগ করবেন না। সুনির্দিষ্ট তথ্য-বক্তব্য চাই।
- তথ্যসূত্র অবশ্যই উল্লেখ করবেন।
- উৎস উল্লেখ করে প্রমাণ্য তথ্য এবং প্রয়োজনীয় সংখ্যা-পরিসংখ্যান দেবেন। সঙ্গে ছবি দেওয়ার কথা আগে বলেছি। ছবি জরুরি প্রামাণ্য নির্দেশন হতে পারে। আবার, প্রসঙ্গ বুরো গ্রাফ-চার্ট ইত্যাদিও সংযুক্ত করুন। মূল বিজ্ঞপ্তি ছোট রাখতে এগুলো সংযুক্ত হিসেবে দিন।
- অসম্পূর্ণ বা আধাৰোচিত তথ্য দেবেন না। তবে সংক্ষেপে লিখবেন। সুতরাং মূল বিষয়বস্তুতে মনোযোগ দিয়ে আনুষঙ্গিক খুঁটিনাটি বাদ রাখুন। এমনিতেও প্রতিবেদক বা সম্পাদকের বাড়তি তথ্য লাগলে তিনিই ফোন করে খৌজ করবেন।
- তথ্য-বক্তব্য গুহিয়ে লিখবেন গড়পড়তা সাধারণ গ্রাহকের কথা মাথায় রেখে। ক্ষুদ্র জাতিসভা-সংগ্রাম বিষয়গুলো অনেকেরই অজানা থাকতে পারে। সবার বোৰাৰ জন্য প্রয়োজনীয় ব্যাখ্যা থাকতে হবে।
- প্রয়োজনীয় প্রেক্ষাপট বা পশ্চাংপট—ব্যাকগ্রাউন্ড অবশ্যই দেবেন। বড় কোনো ব্যাখ্যা বা ব্যাকগ্রাউন্ড দরকার হলে সংযুক্তিতে দিন এবং লেখায় তা নির্দিষ্ট করে জানান।

সতর্ক থাকুন : বিভিন্ন প্রসঙ্গের তথ্য-বক্তব্যগুলো সহজ যৌক্তিক ধারায় বিন্যাস করবেন।

- ✓ আগের কথা পরে, পরের কথা আগে—এমন যেন না হয়; এলোমেলো হয়ে ছড়িয়ে যেন না পড়ে।
- ✓ আলাদা আলাদা তারিখের ঘটনা উল্লেখ করলে সেটা যেন পরিষ্কার বোৰা যায়।
- ✓ এক ধরনের তথ্য-বক্তব্যগুলো একত্রে রাখবেন।
- ✓ এক প্রসঙ্গ থেকে অন্য প্রসঙ্গে যাওয়া মসৃণ ও যুক্তিসংগত হতে হবে।
- ✓ কিছুতেই যেন বড় না হয়। পুনরাবৃত্তি থেকে সাবধান।

লেখা : লেখা হবে সহজ, সুস্পষ্ট, সুপাঠ্য।

- সহজ পরিচিত শব্দ ব্যবহার করবেন। তবে বন্তাপচা সন্তা শব্দ বা ক্লিশে এড়িয়ে চলুন। আদিবাসী কোনো ভাষার অথবা যেকোনো অপরিচিত বা কারিগরি শব্দ ব্যবহার করতে হলে সেটার সহজ অর্থ বুবিয়ে লিখবেন।
- অপরিচিত বিষয় বা ধারণা দু-তিনটি শব্দে বুবিয়ে লিখবেন।

- বাংলা বিজ্ঞপ্তিতে ইংরেজি শব্দ যথাসম্ভব এড়িয়ে চলুন; যেমন—‘ইনডিজেনাস পিপলস ডে’ না লিখে লিখুন ‘আদিবাসী দিবস’।
- শব্দ প্রয়োগে ভুল হলে কথার অর্থ পাল্টে যেতে পারে। যথাযথ শব্দটি বেছে নিন। কঠিন, বিভ্রান্তিকর বা দুই অর্থ হতে পারে—এমন শব্দ ব্যবহার করবেন না। সব সময় অভিধান দেখে নেবেন।
- কোনো শব্দসংক্ষেপ ব্যবহার করলে প্রথম উল্লেখে তা ভেঙে বলবেন—ইউএনডিপি বা জাতিসংঘ উন্নয়ন কর্মসূচি। অপরিচিত হলে সে শব্দসংক্ষেপ এড়িয়ে চলুন। কিছু শব্দসংক্ষেপ বুঝিয়ে লিখতে হতে পারে। যেমন, সিএসআর—করপোরেট সোশ্যাল রেসপনসিবিলিটি অর্থাৎ—ব্যবসাপ্রতিষ্ঠানের সমাজকল্যাণমূলক কার্যকলাপ/সামাজিক দায়িত্ব
- অশালীন, আপত্তিকর শব্দ ব্যবহার করবেন না।
- যতিচিহ্ন বা পাংকচুয়েশন ব্যবহারে ভুল হলে কথার অর্থ বোঝা কঠিন, অর্থ পাল্টেও যায়। প্রথম আলো ভাষারীতি বা আনন্দবাজার পত্রিকার বাংলা কী লিখব, কেন লিখব বইটি কিনে নিন। ইংরেজির জন্য স্কুলপাঠ্য কোনো ব্যাকরণ বই জোগাড় করে নিন।
- বানান ভুল যেন না থাকে। বাংলা একাডেমীর বাংলা বানান-অভিধান এবং ভালো কোনো ইংরেজি অভিধান হাতের কাছে রাখুন।
- বাক্য হবে সরল ও সরাসরি। বাংলা বাক্যে কর্তা-কর্ম-ক্রিয়া এবং ইংরেজি বাক্যে সাবজেক্ট-ভাৰ্ব-অবজেক্ট—এ স্বাভাবিক গঠন অনুসরণ করবেন। এক বাক্যে একটি কথা বলতে চেষ্টা করুন। একাধিক প্রসঙ্গ এবং বাক্যাংশবুক্ত জটিল বাক্য লিখবেন না। এভাবে বাক্য ছোটও থাকবে। গড়পড়তা ১৭ শব্দের বাক্য সবচেয়ে সহজে বোঝা যায়। বাক্য ২২/২৩ শব্দ ছাড়াতে নিলেই লাগাম টানুন।
- অনুচ্ছেদও ছোট রাখুন। তিন থেকে চারটি ছোট বাক্যে অনুচ্ছেদ গড়ুন। একটি অনুচ্ছেদে একটি বিষয় পরিকার করতে মন দিন। প্রসঙ্গ পাল্টালে নতুন অনুচ্ছেদে যান। অনুচ্ছেদগুলো আলাদা করতে মধ্যে বেশি জায়গা ছাড়ুন বা একটু ইনডেন্ট করে দিন।
- মোটামুটি সংক্ষিপ্ত এবং আকর্ষণীয় একটি শিরোনাম দেবেন। সংবাদ-শিরোনাম একেবারে সংক্ষেপে পাঠক-শ্রোতা-দর্শককে মূল বিষয়বস্তু আভাস দেয়। আপনার শিরোনাম অত্যানি সংক্ষিপ্ত না হলেও চলবে। আপনার শিরোনামের মূল লক্ষ্য মনে রাখুন—প্রতিবেদক বা সম্পাদকের নজরে পড়া, তাঁকে মূল বিষয়বস্তুর সবচেয়ে আকর্ষণীয় এবং/অথবা সবচেয়ে তাৎপর্যপূর্ণ কথাটি একলজরে জানিয়ে দেওয়া। শিরোনামটি পড়েই কিন্তু তিনি প্রথম বাছাই করবেন।

অনেকে পরামর্শ দেন, তৃতীয় কোনো সাধারণ পাঠককে দিয়ে বিজ্ঞপ্তি একবার পড়িয়ে নিতে। সহজবোধ্যতা নির্ণয় করার এটা একটি ভালো উপায়।

- ✓ প্রয়োজনীয় সংশোধন, পুনর্মার্জন ও সংযোজনের পর নতুন করে পরিচ্ছন্ন কপিটি কম্পিউটার থেকে বের করে নিন/ফের লিখে বা টাইপ করে নিন।
- ✓ আগে পাঠিয়ে থাকলেও অত্যাবশ্যক সহায়ক তথ্য-উপকরণ আবার সংযুক্ত করুন।

নিজে লেখা ও সেটা ছাপানো

পত্রপত্রিকায় আপনি নিজেও আদিবাসী বিষয়ে ফিচার বা নিবন্ধ লিখতে পারেন। তবে লেখার চর্চা ও অনুশীলন লাগবে। যে পাতায় ছাপাতে চাইছেন, সে পাতার লেখা নিয়মিত পড়ুন। সম্পাদক ও পাঠকের চাহিদার আন্দজ পাবেন। এ ছাড়া, সংশ্লিষ্ট সম্পাদকের কাছে বিষয় প্রস্তাব করে তাঁর সম্মতি ও পরামর্শ নিয়ে নেবেন। বিশেষ জরুরি, শব্দসীমা জেনে নেওয়া এবং সেটার মধ্যে সীমিত থাকা। ছোট পত্রিকা বেশি গুরুত্ব দেবে।

৬

প্রেস কনফারেন্স বা সংবাদ-সম্মেলন

বড় কোনো ঘটনা, কোনো সমীক্ষা বা গবেষণা প্রতিবেদন প্রকাশ, কোনো সিদ্ধান্ত বা প্রতিবাদ—জনমানুষকে জরুরি কিছু জানানোর থাকলে আপনি সাংবাদিকদের ডেকে সংবাদ-সম্মেলন করবেন।

আয়োজন

- আটঘাট বেঁধে সময় নিয়ে আয়োজন করলে সংবাদ-সম্মেলন কার্যকরভাবে করা যায়। হঠাত বা চটকলদি সংবাদ-সম্মেলন করতে হলে সব সাংবাদিকের উপস্থিতি নিশ্চিত করার মতো যথেষ্ট জোরালো কারণ থাকতে হবে।
- এমনিতেও বিষয় যথেষ্ট গুরুত্বপূর্ণ বা আগ্রহব্যঙ্গক হলে তবেই আপনি সংবাদ-সম্মেলন ডাকবেন। ছোটখাটো বিষয়ে সংবাদ-সম্মেলন পাঞ্চ পাবে না। তা ছাড়া বারবার ছোট বিষয়ে সাংবাদিকদের ডাকলে পরে বড় বিষয়েও তাঁরা আসতে দ্বিধা করবেন, ভাববেন যে সেটাও হয়তো বরাবরের মতো মামুলি কিছু নিয়ে হচ্ছে।
- আমন্ত্রণপত্র পাঠাবেন আগের দিন সকালের দিকে। বেশি আগে পাঠালে সেটার কথা কারও মনে থাকবে না। আবার আগের রাতে দেরি করে পাঠালে সংবাদমাধ্যমের কাউকে সেখানে পাঠানোর সুযোগ কমে যাবে।
- চিঠি দিলেও ফোন অবশ্যই করবেন; বিশেষ করে, আপনার অঞ্চাধিকার তালিকার সাংবাদিকদের।

- আমন্ত্রণপত্রে বিষয়টি পরিষ্কার করে লিখবেন এবং সংক্ষেপে এটা ডাকার প্রেক্ষাপট ও গুরুত্ব তুলে ধরবেন। বিষয়ের আকর্ষণীয় দিকগুলো জানিয়ে দেবেন। যেমন, কোনো বড় নেতা বা ভুজ্জভোগী কারও উপস্থিতি; ভালো ছবি তোলার কোনো সুযোগ; কোনো নতুন তথ্য জানানোর থাকলে সেটার কথা; অথবা কোনো বিতর্কের ইঙ্গিত।
- সময় এবং স্থান সূচিপ্রস্তর করে লিখবেন।
- সকালের দিকে সময় ঠিক করা সবচেয়ে ভালো। তবে খুব সকালে ডাকবেন না। সাংবাদিকেরা অনেক রাত অন্ধি কাজ করেন। বেলা ১১টা-১২টার মধ্যে ডাকাটা সবচেয়ে ভালো।
- সাংবাদিকের যাওয়া সহজ এবং পরিচিত জায়গায় সংবাদ-সম্মেলন ডাকবেন। স্থানীয় প্রেসক্লাবে বড় ঘর থাকলে সেটা ব্যবহার করুন। অপরিচিত জায়গা হলে সঙ্গে পথনির্দেশনার ম্যাপ দেবেন।
- কী কী হবে আমন্ত্রণপত্রে সেটার ক্রমানুসারে সূচি দেবেন। কোনো সাংবাদিক দেরিতে পৌছালেও খেই ধরতে পারবেন।
- সংবাদ-সম্মেলনের বিষয় নিয়ে আগে থাকতে প্রধান প্রতিবেদক, আপনার পরিচিত প্রতিবেদক এবং/অথবা সম্পাদক পর্যায়ের কারও সঙ্গে কথা বলে রাখুন। সময় থাকতে একবার মনে করিয়ে দেবেন।
- প্রাসঙ্গিক কাগজপত্র থাকলে সেগুলো, ছবি বা প্রেক্ষাপটের তথ্য আমন্ত্রণপত্রের সঙ্গে আগাম পাঠাবেন। বিষয়টি স্পষ্ট হবে, সাংবাদিক তৈরি হয়ে যেতে পারবেন।

সম্মেলন অনুষ্ঠান


- কোনো জনগোষ্ঠীর সমস্যা-সংকট নিয়ে হলে সব সময় ভুজ্জভোগী কয়েকজনকে সঙ্গে রাখুন। ব্যবস্থাপনার দিক আছে। ঘন্টা দুই আগে পৌছাবেন। মাইক ইত্যাদি যন্ত্রপাতি ঠিকমতো কাজ করছে কি না দেখুন। বসার বন্দোবস্ত তদারক করুন। মাল্টিমিডিয়া উপস্থাপনা—ছবি, ভিডিও-ক্লিপ, শব্দ প্রক্ষেপণ—সবকিছু ঠিকমতো কাজ করছে কি না দেখে নিন।
- তৈরি থাকুন, দু-একজন সাংবাদিক আগে পৌছাবেন। তাঁরা আপনার কাছে প্রাথমিক তথ্য-কাগজপত্র চাইবেন।
- সাংবাদিকদের নাম-পরিচয়-ফোন-ই-মেইল নিবন্ধন করুন। আপনার যোগাযোগের তালিকা সমৃদ্ধ ও হালনাগাদ করতে কাজে লাগবে।
- সংবাদ-সম্মেলনের দুটি অংশ থাকে। প্রথমে আপনি আপনার উদ্দেশ্য ও বিষয় খুলে বলেন। তারপর থাকে সাংবাদিকের প্রশ্ন ও আপনার তরফের উত্তর।
- সব মিলিয়ে খুব বড় যেন না হয়—৩০ মিনিট থেকে এক ঘন্টার আন্দাজ ধরে রাখুন। নিজেদের বক্তব্য সংক্ষিপ্ত ও পরিষ্কার রাখবেন। তবে ভুজ্জভোগী মানুষজনকে উপস্থিত করালে তাদের কথা বলার পর্যাপ্ত সময় দেবেন।

- প্রশ্নোত্তর অংশ খুব বেশি নিয়ন্ত্রণ করবেন না, তবে একেবারে টেনে বড় হতেও দেবেন না। অনেক সাংবাদিক থাকলে শুরুতেই বলে দিতে পারেন যে, একেকজন একটি মূল ও একটি সম্পূরক প্রশ্ন করার সুযোগ পাবেন।
- সম্মেলনের শেষে রেডিও-টিভির সাংবাদিক সাক্ষাৎকার নিতে চাইবেন। কে কী বলবেন তা আগে ঠিক করে রাখুন।
- সাংবাদিক ছবি তুলতে চাইবেন। ভালো ছবি কিসে হতে পারে এটা ভাববেন এবং সম্ভব হলে ব্যবস্থা রাখবেন।
- পত্রপত্রিকার সাংবাদিক আরও বিস্তারিত তথ্য চাইতে পারেন। ভুক্তভোগীদের সঙ্গে সাক্ষাৎকার চাইতে পারেন। সহায়তা করবেন। সম্মেলন শেষে চা পর্ব রাখুন। সে সময় অনানুষ্ঠানিক আলাপ যেমন হতে পারবে, তেমনি এ কাজগুলো সারা যাবে।
- সম্মেলন শেষ হওয়ার পরও এক-দুই ঘণ্টা সেখানে থাকুন। অনেক সাংবাদিক দেরিতে পৌছাতে পারেন।
- সংবাদ-সম্মেলনের বিবরণ দিয়ে বিজ্ঞপ্তি সব সময় পাঠাবেন। সঙ্গে ছবি দেবেন। অনেক সময় কোনো সংবাদমাধ্যম হয়তো কোনো প্রতিবেদককে পাঠাতে পারেন না। আবার, প্রতিবেদক নিজে উপস্থিত থাকলেও কিছু প্রসঙ্গ তাঁর নজর এড়িয়ে যেতে পারে। তা ছাড়া, বিজ্ঞপ্তি ধরে তিনি নিজের নোট মিলিয়ে নিতে পারেন।

সাংবাদিকদের মোকাবিলা করা

- অসৌজন্য করবেন না। তবে নিজের বক্তব্য জানাতে দৃঢ় থাকবেন।
- সম্ভাব্য প্রশ্ন ভেবে উত্তর চিন্তা করে রাখবেন।
- খোচানো প্রশ্ন করলেও উত্তেজিত হবেন না।
- প্রশ্ন সবই নেবেন। তবে কোনোটির উত্তর দিতে না চাইলে সেটা সৌজন্যের সঙ্গে বুঝিয়ে বলবেন।
- ভুক্তভোগী কোনো মানুষকে সাংবাদিকের সামনে উপস্থিত করলে নজর রাখবেন, সাংবাদিকের প্রশ্নে তিনি উৎপীড়িত বোধ করছেন কি না। কোনো অবস্থাতেই কোনো সাংবাদিককে তাঁকে নাজেহাল বা উত্ত্যক্ত করতে দেবেন না।
- যৌন-নির্যাতিত নারী, নাজুক অবস্থানের শিশুসহ যেকোনো ভুক্তভোগী বা ভিকটিমের ছবি তুলতে দেবেন না। তাঁর নিরাপত্তার কথা ভাববেন। সাংবাদিককে বলবেন, তাঁর নাম-পরিচয় গোপন রাখতে।

তথ্যকণিকা



বাংলাদেশের ক্ষুদ্র জাতিসম্পত্তি

ক্ষুদ্র জাতিসম্পত্তি বলতে কাদের বোঝানো হয় এবং ‘আদিবাসী’ বনাম ‘উপজাতি’ সংজ্ঞা, সেগুলোর অর্থ ও তাৎপর্যের বিষয়গুলো আমরা এ বইয়ের প্রথম অধ্যায়ে বিস্তারিত দেখেছি। এখানে আমরা বাংলাদেশের এসব জাতি সম্পর্কে কিছু মৌলিক তথ্য-উপাত্ত দেখব।

সংখ্যা নিয়ে নানা মত : বাংলাদেশে কয়টি ক্ষুদ্র জাতিসম্পত্তি আছে এবং তাদের জনসংখ্যা কত—এ দুটি প্রশ্নের পরিকার বা নিরঙ্কুশ কোনো উত্তর মেলে না।

- ক্ষুদ্র জাতিসম্পত্তির সংখ্যার বিভিন্ন হিসাব পাওয়া যায়। বিভিন্ন সূত্রে এ সংখ্যা ২৬ থেকে ৫৭টি পর্যন্ত বলা হয়েছে। কোনো জরিপ বা সেভাবে আলাদা করে গোনাগাথা না থাকায় সুনিশ্চিত করে বলা কঠিন; তবে সরকারি-বেসরকারি বিভিন্ন সূত্র মিলিয়ে দেখলে মনে হয় আদিবাসী জাতিসম্পত্তির সংখ্যা ৪৫টির মতো হতে পারে। বাংলাদেশ আদিবাসী ফোরামও এ সংখ্যাই দেয়।

নৃবিজ্ঞানীরা বলছেন, এর কিছু একেবারে ক্ষুদ্র জাতি, কিছু হয়তো বড় কোনো গোষ্ঠীর ভাগ। তা ছাড়া, এ ৪৫টির মধ্যে অন্তর্ভুক্ত বেশ কিছু জাতি আসলে বাঙালি জনগোষ্ঠীর প্রান্তে মিশে যাওয়া সাবেক ক্ষুদ্র জাতিসম্পত্তি। এরা নিজেরাও হয়তো কেউ কেউ বাঙালিসমাজের অংশ হিসেবেই পরিচিত হতে চায়। তবে সামাজিক-সাংস্কৃতিক কিছু স্বাতন্ত্র্য, প্রান্তিকতা ও আর্থ-সামাজিক সুযোগবৃক্ষিত অবস্থানের বিবেচনায় এবং উন্নয়নসহ বিশেষ মনোযোগের দাবিদার হিসেবে এসব প্রান্তিক জনগোষ্ঠীকে ক্ষুদ্র জাতিসম্পত্তির গণিতে দেখা যুক্তিযুক্ত।

- ক্ষুদ্র জাতিসম্পত্তির মানুষের সংখ্যা কত, সেটার সার্বিক হিসাবের জন্য সরকারি আদমশুমারির কাছে যেতে হয়। তবে ক্ষুদ্র জাতিসম্পত্তির মানুষদের পক্ষ থেকে সব সময় আদমশুমারিতে তাদের সংখ্যা কম গণনার অভিযোগ করা হয়। নৃবিজ্ঞানীরাও এ প্রশ্ন তুলেছেন। কোনো কোনো অঞ্চলে বিক্ষিণ্ণ কিছু বেসরকারি জরিপ ও শুমারি আদিবাসীদের সংখ্যা সরকারি আদমশুমারির চেয়ে বেশি দেখিয়েছে। এ ছাড়া, আরেকটি বড় আপত্তির ক্ষেত্র আছে।

বাংলাদেশে আদমশুমারি হয় দশ বছর পর পর। শেষ দুটি আদমশুমারিতে ক্ষুদ্র জাতিসম্পত্তির মানুষকে ভাগ করার মাপকাঠিতে একটি পার্থক্য দেখা যায়। একটিতে এ ভাগ করা হয়েছে জাতিভিত্তিক, অন্যটিতে ধর্মভিত্তিক। ক্ষুদ্র জাতিসম্পত্তির প্রতিনিধিরা এবং অনেক নৃবিজ্ঞানী আদমশুমারির জাতিভিত্তিক তালিকাকে অসম্পূর্ণ ও কিছুটা ত্রুটিযুক্ত বলেছেন। অন্যদিকে, তাঁরা শুধু ধর্মভিত্তিক বিভাজনের যুক্তিযুক্ততা নিয়েই প্রশ্ন তুলেছেন।

ভৌগোলিক অবস্থান : আদমশুমারি প্রতিবেদনগুলোয় দেখা যায়, ৬৪ জেলার প্রতিটিতেই কিছু না কিছু আদিবাসী মানুষ আছে। বাংলাদেশে এদের বড় বসতির এলাকাগুলো হচ্ছে : দক্ষিণ-পূর্বাঞ্চলে পার্বত্য চট্টগ্রামের তিন জেলা; উত্তর ও উত্তর-পশ্চিমে বৃহত্তর রাজশাহী ও রংপুরের জেলাগুলো; উত্তর-পূর্বে সিলেট বিভাগের জেলাগুলো; উত্তর-মধ্যাঞ্চলে বৃহত্তর ময়মনসিংহের জেলাগুলো, বিশেষ করে গড় বা বনাঞ্চল ও সীমান্ত এলাকা। এ বাদে, দক্ষিণের উপকূলীয় কিছু জেলায় একটি মোটামুটি বড় আদিবাসী গোষ্ঠীর বাস। লক্ষণীয়, এসব এলাকা ভারত অথবা মিয়ানমারের সীমান্তের ঘৰে। আদিবাসী-অধ্যুষিত এসব অনেক এলাকা এখনো দুর্গম ও প্রত্যন্ত, বা একসময় তেমনটা ছিল।

২০০১ সালের আদমশুমারিতে ক্ষুদ্র জাতিসম্প্রদায়

বাংলাদেশের আদমশুমারিতে ক্ষুদ্র জাতিসম্প্রদায় মানুষকে ‘উপজাতীয়’ হিসেবে চিহ্নিত করা হয়। সর্বশেষ আদমশুমারি হয়েছে ২০০১ সালে। এর এ্যাবৎ প্রকাশিত প্রতিবেদনগুলোয় পুরো দেশে ক্ষুদ্র জাতিসম্প্রদায় মানুষের মোট সংখ্যা এবং জেলাওয়ারি সংখ্যা পাওয়া যায়। তবে আদমশুমারি প্রতিবেদনের তথ্যগুলো দেখার সময় ওপরে বলা প্রশ্ন ও দ্বিমত মাথায় রাখতে হবে।

এসব প্রতিবেদনে আদিবাসীদের জাতিসম্প্রদায় ধরে ভাগ করে তাদের আলাদা আলাদা জনসংখ্যা দেখানো হয়নি। জাতীয় প্রতিবেদনমালার প্রথম খণ্ডে ২০০১ আদমশুমারিতে প্রাপ্ত তথ্য-পরিসংখ্যানের ব্যাখ্যা-বিশ্লেষণ আছে। সেখানে ক্ষুদ্র জাতিগোষ্ঠীর মোট জনসংখ্যার ধর্মভিত্তিক ভাগ পাওয়া যায়। জেলাওয়ারি প্রতিবেদনে অর্থাৎ কমিউনিটি সিরিজের প্রতিবেদনগুলোয় জেলার নিবাসীদের ধর্মভিত্তিক সংখ্যার পাশাপাশি ‘ট্রাইবাল’ বা ‘উপজাতীয়’দের সংখ্যা দেওয়া হয়েছে।

তবে কিছু জেলার প্রতিবেদনে ‘উপজাতীয়’দের সংখ্যা দেওয়া নেই। তা ছাড়া, জাতীয় প্রতিবেদনমালার প্রথম খণ্ডে বলা হয়েছে, জেলা প্রতিবেদনমালায় ‘উপজাতীয়’ ও ‘ধর্মসংক্রান্ত’ কোডের ভুল শ্রেণীকরণের জন্য কিছু ভুল রয়ে গিয়েছে। সুতরাং সংখ্যার জন্য জেলা প্রতিবেদনের ওপর নির্ভর করা যাবে না, জাতীয় প্রতিবেদনমালার প্রথম খণ্ড দেখতে হবে। এ খণ্ডেই জেলা ও উপজেলাভিত্তিক আদিবাসী জনসংখ্যার হিসাব পাবেন।

সংখ্যা ও অবস্থান

আদমশুমারির এ প্রতিবেদনটি বলছে :

- ✓ ২০০১ সালে দেশের মোট আদিবাসী জনসংখ্যা ছিল ১৪ লাখ ১০ হাজার ১৬৯ (১৪,১০,১৬৯); এরা দেশের মোট জনসংখ্যার ১.১৩ শতাংশ।
- ✓ ১৯৯১ সালের আদমশুমারিতে মোট আদিবাসী জনসংখ্যা ছিল ১২ লাখ ৫ হাজার ৯৭৮ (১২,০৫,৯৭৮); মোট জনসংখ্যায় এদের হার একই ছিল—১.১৩ শতাংশ।
- ✓ ১৯৮১ সালের আদমশুমারিতে মোট আদিবাসী জনসংখ্যা ছিল ৮ লাখ ৯৭ হাজার ৮৮২ (৮,৯৭,৮৮২); তখন মোট জনসংখ্যায় এদের হার কিছু কম ছিল—১.০৩ শতাংশ।

২০০১ সালের আদমশুমারি অনুযায়ী :

- বাংলাদেশে ক্ষুদ্র জাতিসভাদের অর্ধেকের কাছাকাছি বাস করে বান্দরবান, খাগড়াছড়ি ও রাঙামাটি জেলায়। আদমশুমারিতে গণনা করা ‘উপজাতীয়’ জনগোষ্ঠীর ৪২.০৫ শতাংশের বাস পার্বত্য চট্টগ্রামের এ তিনি জেলায়। তবে জাতীয় প্রতিবেদনমালার প্রথম খণ্ডে বলা হয়েছে, শুমারিতে এ এলাকাগুলোয় কিছু কম গণনা হয়ে থাকতে পারে। কারণ এ তিনি জেলায় আদমশুমারি পরিচালনায় বেশ সমস্যা আছে; আদিবাসী বাড়িগুলো ছড়ানো-ছিটানো।
- এ ছাড়া নওগাঁ, দিনাজপুর, চট্টগ্রাম, রাজশাহী, ময়মনসিংহ, মৌলভীবাজার ও নেত্রকোণা জেলায় আদিবাসীদের কিছু সংখ্যাধিক্য আছে। এসব জেলায় দেশের মোট আদিবাসী জনগোষ্ঠীর যথাক্রমে ৬.১২, ৪.৯৭, ৪.০৭, ৩.৮৩, ২.৮৮, ২.৫৫ এবং ২.৩৪ শতাংশ বাস করে। বাদবাকি সবগুলো জেলাতেই কিছু না কিছু আদিবাসী জনবসতি থাকলেও সেগুলো এসব জেলার তুলনায় নগণ্য। উপজেলাভিত্তিক বসতির তথ্য ধরে আদিবাসীগুলি এলাকাগুলো চট করে পাওয়া যায়।
- তবে এসব কোনো প্রতিবেদনেই ক্ষুদ্র জাতিসভার মানুষেরা জেলার মোট জনসংখ্যার কত শতাংশ তা বলা হয়নি। সেটা অবশ্য বের করে নেওয়া যায়। এভাবে হিসাব করলে দেখা যায়, পার্বত্য চট্টগ্রামের দুই জেলায় আদিবাসী জনসংখ্যা বাঙালিদের চেয়ে কম, একটিতে যৎসামান্য বেশি—খাগড়াছড়ি ও বান্দরবানে আদিবাসী মোট জনসংখ্যার যথাক্রমে ৩৭ ও ৪৮ শতাংশ; রাঙামাটিতে তারা ৫১ শতাংশ। গণনায় বাদ পড়ার প্রশ্ন আছে। এ ছাড়া আদিবাসী-অধ্যুষিত এ অঞ্চলে দু-তিনি দশক আগেও আদমশুমারি অনুযায়ীই আদিবাসীরা সংখ্যাগরিষ্ঠ ছিল—যত পেছন দিকে যাবেন, তত বেশি।

সাক্ষরতা, জীবিকা ও দারিদ্র্য, ধর্ম

আদমশুমারি ২০০১-এর জাতীয় প্রতিবেদনে আদিবাসী জনগোষ্ঠীর সাক্ষরতার হার, তাদের জীবিকা ও ধর্ম-সংক্রান্ত যেসব তথ্য আছে তা একে একে দেখা যাক।

সাক্ষরতার হার : আদিবাসী জনগোষ্ঠীর মধ্যে জাতীয় পর্যায়ের তুলনায় সাক্ষরতার হার খুবই কম; তবে ১৯৮১ সালের তুলনায় এটা বেড়েছে। দেশের আদিবাসী জনসংখ্যায় সাত বছরের চেয়ে বেশি বয়সীদের মধ্যে সাক্ষরতার হার এ রূপক্রম :

- ✓ ১৯৮১ : ১৬.২ শতাংশ; পুরুষদের ২৩.১ এবং মেয়েদের ৮.৪ শতাংশ।
- ✓ ১৯৯১ : ২৪.৯ শতাংশ; পুরুষদের ৩১.৬ এবং মেয়েদের ১৭.৯ শতাংশ।
- ✓ ২০০১ : ৩২.২ শতাংশ; পুরুষদের ৩৯.৩ এবং মেয়েদের ২৪.৮ শতাংশ।

জীবিকা : ২০০১ সালে আদিবাসী খানাগুলোর আয়ের মূল উৎস ছিল :

- ✓ ২৯.৬ শতাংশের জন্য কৃষি/গবাদিপশু/বন।
- ✓ ২০.৩ শতাংশের জন্য কৃষিমজুরি।
- ✓ ১৪.৮ শতাংশের জন্য ব্যবসা।

- ✓ ১০.৮ শতাংশের জন্য বেতন বা মজুরি।
- ✓ ০৩.৮ শতাংশের জন্য পরিবহন/যোগাযোগ।
- ✓ ০৩.৯ শতাংশের জন্য অ-কৃষি মজুরি।
- ✓ বাকিরা মাছ চাষ, বাইরে উপর্জনকারীর পাঠানো টাকা, নির্মাণ, বুনন ইত্যাদি এবং অন্যান্য উৎসের ওপর নির্ভরশীল।
- ১৯৯১ সালে কৃষি-পশ্চ-বন, কৃষিমজুরি এবং বেতন/মজুরিনির্ভরতা আরও অনেক বেশি ছিল। ২০০১ সালে এ জীবিকাণ্ডলোর ওপর নির্ভরতা যেমন কমেছে তেমনি ব্যবসা, পরিবহন খাত, নির্মাণ ইত্যাদি বেড়েছে।
- ২০০১ সালের আদমশুমারি এবং ২০০৫ সালের খানা আয়-ব্যয় জরিপের ভিত্তিতে বাংলাদেশ পরিসংখ্যান ব্যরো-বিবিএস, বিশ্ব খাদ্য কর্মসূচি ও বিশ্বব্যাংক ২০০৯ সালে দেশে দারিদ্র্যের হালনাগাদ মানচিত্র প্রকাশ করেছে। এতে দেখা যায়, আদিবাসী-অধ্যুষিত অনেক এলাকাই অধিক দরিদ্র এলাকাণ্ডলোর মধ্যে পড়ছে।

গোষ্ঠী ধরে না, ধর্ম ধরে : ২০০১ সালে ক্ষুদ্র জাতিসভাদের ভাগ করা হয়েছে কেবল ধর্ম অনুসারে। এতে দেখা যায় :

- ✓ বৌদ্ধ—৩৬.৭৩ শতাংশ
- ✓ হিন্দু—২১.২৯ শতাংশ
- ✓ মুসলিম—১৭.৩৪ শতাংশ
- ✓ খ্রিস্টান—১১.৫৭ শতাংশ
- ✓ অন্যান্য—১৩.১৮ শতাংশ

- ১৯৯১ সালের সঙ্গে তুলনা করলে দেখা যায়, বৌদ্ধ ও হিন্দু ধর্মাবলম্বীর হার মোটামুটি একই রকম আছে। মুসলিম কিছু কমেছে। খ্রিস্টান যৎসামান্য বেড়েছে। লক্ষণীয়, ২০০১ আদমশুমারির প্রতিবেদনে যেহেতু জাতিসভার পৃথক পরিচিতি দেওয়া হয়নি, এত ব্যাপকসংখ্যক মুসলিম কারা, সেটা স্পষ্ট নয়। বেদেরা মুসলিম, কিন্তু ১৯৯১ সালের আদমশুমারিতেও আদিবাসী হিসেবে তাদের নাম আসেনি।

ক্ষুদ্র জাতিসভাণ্ডলোর কিছু পরিচিতি

আগেই বলেছি, ১৯৯১ সালের আদমশুমারির প্রতিবেদনে বাংলাদেশের ক্ষুদ্র জাতিসভা চিহ্নিত করে তাদের জনসংখ্যা দেওয়া ছিল। বলা হয়েছিল, এমন ‘উপজাতি’ অর্থাৎ জাতিগোষ্ঠী আছে ২৯টি। এদের মধ্যে তিনটি জাতির জন্য দুটি করে নামে হিসাব ছিল। যেমন, ত্রিপুরা ও টিপরা একই জাতি; বংশী ও রাজবংশীও তাই; শ্রো (শ্রু) ও শ্রং (মুরং/শ্রং) এক। এদের এক করে নিলে সরকারি হিসাবে আদিবাসী জাতির সংখ্যা দাঁড়াচ্ছে ২৬টি।

১৯৯১ সালের আদমশুমারির হিসাব এভাবে গুচ্ছয়ে যোগ করে নিয়ে যে তালিকা পাই :

১. চাকমা	২,৫২,৮৫৮	২. সাঁওতাল	২,০২,১৬২
৩. মারমা	১,৫৭,৩০১	৪. ত্রিপুরা	৮১,০১৪
৫. গারো	৬৪,২৮০	৬. মণিপুরি	২৪,৮৮২
৭. শ্রো, মুরং	২২,৩০৮	৮. তৎঙ্গ্যা	২১,৬৩৯
৯. রাখাইন	১৬,৯৩২	১০. কোচ	১৬,৫৬৭
১১. বম	১৩,৪৭১	১২. খাসিয়া	১২,২৮০
১৩. হাজং	১১,৫৪০	১৪. ওরাওঁ	৮,২১৬
১৫. রাজবংশী	৭,৫৫৬	১৬. বুনো	৭,৪২১
১৭. উরুয়া	৫,৫৬১	১৮. মাহাতো	৩,৫৩৮
১৯. পাংখোয়া	৩,২২৭	২০. খিয়াং	২,৩৪৩
২১. মুড়া	২,১৩২	২২. চাক	২,১২৭
২৩. পাহাড়ি	১,৮৫৩	২৪. খুমি	১,২৪১
২৫. হরিজন	১,১৩২	২৬. লুসাই	৬৬২

- এ ছাড়া, ১৯৯১ সালের আদমশুমারি প্রতিবেদনে ২,৬১,৭৪৩ জনকে ‘অন্যান্য’ হিসেবে দেখানো হয়েছে। নৃবিজ্ঞানীরা বলছেন, এদের মধ্যে কিছু হয়তো বড় কোনো গোষ্ঠীর ছোট অংশ বা শাখা এবং সাবেক ক্ষুদ্র জাতিসম্পত্তি। এরা হতে পারে—কোল, খন্দ, খারিয়া, ডালু, তুরী, পাহান, বানাই, সিং, পাত্র, বর্মণ, বাগুদি, বেদে, মালো, মাহালি, মুরিয়ার, মুশহর, রাই, রাঁজোয়াড়, হদি, হো প্রভৃতি জনগোষ্ঠী। কিন্তু সেটা স্পষ্ট নয়। নৃবিজ্ঞানীরা বলছেন, এভাবে সরকারি আদমশুমারির এ তালিকা পূর্ণাঙ্গ হয়নি। ক্রটিও আছে। এক জাতিকে আলাদা আলাদা নামে দেখানো ছাড়াও, কোনো কোনো গোষ্ঠীকে বাঙালি হিসেবেও দেখানো হয়েছে।
- এদিকে বইপত্রে বলা হচ্ছে যে, বুনো, উরুয়া ও হরিজনদের উল্লেখ কেবল ১৯৯১ সালের আদমশুমারিতে আছে। এদের সম্পর্কে আলাদা করে তথ্য চোখে পড়ে না। তবে ‘উরুয়া’ ওরাওঁদের ভিন্ন নাম হতে পারে, ‘হরিজন’ বলতে কাদের বোঝানো হচ্ছে সে প্রশ্ন জাগে।

একাধিক নাম ও শাখা

ভাগ করা সহজ নয়, সেটা বড় সমস্যা :

- ✓ আদিবাসীদের কিছু জাতি একাধিক নামে পরিচিত। টিপুরা ও ত্রিপুরা, রাজবংশী ও বংশী এবং শ্রো ও শ্রং/মুরং নিয়ে বিভাগিত কথা আগেই বলেছি। একাধিক নামের উদাহরণ আরও আছে। মারমাদের যেমন মগ/মঘও বলা হয়—নামটি অবজ্ঞাসূচক। মুড়াদের মুড়ারিও বলা হয়। গারোরা ‘মান্দি’ নাম পছন্দ করে। লুসাইরা কুকি বা মিজো নামেও পরিচিত। বম ও পাংখোয়াদেরও বাঙালিরা ‘কুকি’ বলে। পাংখোয়াদের পাংখোও বলা হয়।

- ✓ বিভান্তি হয় ইংরেজি বানানের জন্যও। ‘ওরাও’ নামটি যেমন ইংরেজি বানানে ‘উরাং’ বা ‘উরাও’। কেউ কেউ ইংরেজির অনুসরণে সাঁওতালদের ‘সান্তাল’ লেখেন। ইংরেজিতে খুমিদের ‘খামি’, ‘কামি’ এমন বানানেও লেখা হয়। খাসিয়া ইংরেজিতে ‘খাসি’ এবং পাত্রকে ‘পাথর’ বা ‘পাতর’ লেখা হয়।
- ✓ দেখা যায়, কিছু গোষ্ঠী আসলে বড় আরেক গোষ্ঠীর শাখা বা অংশ। মানুষ শাখার নামই বলে। এদিকে নৃবিজ্ঞানীরা বলেন, যাদের ভাষা, সংস্কৃতি ও ঐতিহ্য এক, তারা আসলে একই জাতি। এভাবে অনেক নৃবিজ্ঞানীর মতে যেমন—মারমা এবং পটুয়াখালীর রাখাইন আসলে একই জাতি; তৎঙ্গ্যারা চাকমার একটি শাখা। এঁরা বলেন : ডালু, ডালুই, ডুলাই—গারোর অংশ; হো—মুভার অংশ; মাহালি—সাঁওতালের উপ-বিভাগ; পালিয়া—রাজবংশীর একটি শাখা; নর—খাসিয়ার একটি উপ-বিভাগ; রিয়াং—ত্রিপুরাদের একাংশ; সেন্দু—খুমির একটি শাখা। মণিপুরিদের দুই ভাগ বিষ্ণুপ্রিয়া ও মৈতৈ ছাড়াও মুসলিম মণিপুরি আছে। অনেকে ‘পাঙ্গন’ নাম দিয়ে এদের আলাদা জাতি হিসেবে দেখান। মান্দাই ও বর্মণ বা ক্ষত্রিয়-বর্মণ নামে পরিচিত জনগোষ্ঠী দুটিকে কোচের শাখাও বলা হয়।
- ✓ জাতি চিহ্নিত করার মাপকাঠি নিয়েও প্রশ্নের অবকাশ আছে। মুসলিম বেদে এবং হিন্দু হয়ে যাওয়া কিছু গোষ্ঠী বাঙালি হিসেবে পরিচিত হতে আগ্রহী। কেউ কেউ বেদে এবং ভুইমালী, ভুইয়া, গাঞ্জু, জালিয়া (কৈবর্ত), কুকামার, কুর্মি, মালো, নমশ্বৰ—এমন জাতিগোষ্ঠীগুলোকে সাবেক ক্ষুদ্র জাতি হিসেবে চিহ্নিত করেছেন। আবার, হিন্দু হয়ে যাওয়া কিঞ্চিৎ স্বাতন্ত্র্যের দাবিদার আরও কিছু জাতিসম্প্রদায় : হন্দি, কাচারি, মিকির ও পাত্র।
 - তবে নৃবিজ্ঞানীরা এ-ও বলেন যে, কেউ আলাদা নামে পরিচিত হতে চাইলে সেটা সম্মান করা ও সে স্বীকৃতি দেওয়া উচিত। এবং সাবেক গোষ্ঠীগুলোকেও চিহ্নিত করতে হবে। সমতলের আদিবাসীদের অনেকেই তেমন জাতিগোষ্ঠীর মানুষ।
 - এদিকে বাংলাদেশ আদিবাসী ফোরাম যে ৪৫টি জাতিসম্প্রদায় তালিকা দেয়, তার মধ্যে ওপরে বিভিন্ন প্রসঙ্গে আসা নামগুলো ছাড়া আরও পাই : ভূমিজ, বাগদি, কর্মকার, আসাম, গুর্খা ও ক্ষত্রিয়-বর্মণের নাম। এর প্রথম তিনটি সাবেক ক্ষুদ্র জাতিসম্প্রদায় সংজ্ঞা পেতে পারে। শেষেরটি কোচের শাখা বা অন্য নাম।

মোটা দাগে কোথায় কোন জাতি

- পার্বত্য চট্টগ্রামের তিন জেলায় আদিবাসী বসতি মূলত গড়েছে মোট ১১টি ক্ষুদ্র জাতি। এরা হচ্ছে : চাকমা, মারমা, ত্রিপুরা, ত্রো, তৎঙ্গ্যা, বম, পাংখোয়া, খিয়াং বা খ্যেং, চাক, খুমি ও লুসাই।
- ✓ বান্দরবান জেলায় এই ১১টি জাতির সবারই দেখা মিলবে।
- ✓ চাকমারা জনসংখ্যায় দেশের সবচেয়ে বড় আদিবাসী। মারমা ও ত্রিপুরা যথাক্রমে তৃতীয় ও চতুর্থ বৃহত্তম। এ তিন জেলা যেমন এই বড় জাতিগুলোর মূল নিবাস, তেমনি এখানকার ক্ষুদ্রতর গোষ্ঠীগুলোও স্বাতন্ত্র্যের জন্য লক্ষণীয়।
- ✓ এদের মধ্যে চাকদের বান্দরবানেই দেখা যায়। ত্রোদের বড় অংশও সে জেলার বাসিন্দা।

- ✓ ত্রিপুরা জনগোষ্ঠীর অংশবিশেষ চট্টগ্রাম, কুমিল্লা, চাঁদপুর, মৌলভীবাজার, রাজবাড়ী এসব জেলাতেও বাস করে।
 - ✓ পার্বত্য তিন জেলায় রাখাইন বসতিও দেখা যায়। খুব অল্প সংখ্যায় গুরু বা নেপালি উৎসের মানুষও এখানে আছে।
- ১০ ভাষা ও ঐতিহ্যের যোগসূত্র থেকে ধারণা করা হয়, মারমাসহ পার্বত্য চট্টগ্রামের এসব জাতির প্রায় সবাই ইতিহাসের বিভিন্ন সময়ে বর্তমান মিয়ানমার, বিশেষ করে আরাকান থেকে ভারত ও বাংলাদেশের এ অঞ্চলে এসেছে। ন্বিজ্ঞানী প্রশান্ত ত্রিপুরা বলছেন, দেশভেদে পরিচিতির অনেক আগে সুদূর অতীতে পুরো অঞ্চল জুড়েই মানুষ চলাচল করেছে, বসতি গড়েছে। মারমাদের কেউ কেউ মনে করেন, তাঁরা মিয়ানমার থেকে আসা। ‘মারমা’ নামটি সে যোগসূত্র দেখায়। ভারতের ত্রিপুরা, মিজোরাম ও অরুণাচলে চাকমা বসতি আছে। ব্রিটিশরা ‘হিল টিপেরা’ বা ত্রিপুরা বলতে আজকের ভারতের ত্রিপুরা রাজ্যকে বোঝাত। সে সময় স্বাধীন ত্রিপুরা রাজ্যের জমিদারি হিসেবে অন্তর্গত ছিল কুমিল্লা ও চাঁদপুরের কিছু অংশ। চট্টগ্রামও অতীতে আরাকান ও ত্রিপুরা শাসনাধীন ছিল।
- উত্তর-বাংলাদেশে বৃহত্তর রাজশাহী ও রংপুরের বেশ কিছু জেলার কিছু অংশে বাস করে সাঁওতাল, ওরাওঁ, রাজবংশী, মাহাতো, মুভা, পাহাড়িয়া, কোল, মালো এবং আরও কিছু ছোট বা সাবেক ক্ষুদ্র জাতি। এসব এলাকায় মূলত উত্তর-পশ্চিমের ভারত-সীমান্তবর্তী বা কাছাকাছি জেলা। বগুড়ার মধ্যাঞ্চল, পাবনা এবং কুষ্টিয়াতেও এদের কারও কারও বসতি উল্লেখযোগ্য। এরা সমতলের আদিবাসী।
 - ✓ বাংলাদেশের বিভীয় বৃহত্তম আদিবাসী জাতি সাঁওতালদের দেখা যায় রাজশাহী, চাঁপাইনবাবগঞ্জ, নওগাঁ, নাটোর, দিনাজপুর, রংপুর, বগুড়া, পাবনা, কুষ্টিয়া, জয়পুরহাট, গাইবান্ধা, কুড়িগ্রাম, পঞ্চগড়, লালমনিরহাট, নীলফামারী ও ঠাকুরগাঁও জেলায়।
 - ✓ ওরাওঁরা বরেন্দ্র অঞ্চলের বাসিন্দা—দেখা যায় বগুড়া, রাজশাহী, রংপুর, দিনাজপুর, কুড়িগ্রাম, নীলফামারী, গাইবান্ধা, লালমনিরহাট, জয়পুরহাট, নওগাঁ, নাটোর ও চাঁপাইনবাবগঞ্জ জেলায়। এ ছাড়া, গাজীপুর, হবিগঞ্জ ও মৌলভীবাজার জেলায় ওরাওঁ বসতি আছে।
 - ✓ রাজবংশীদের বাস রাজশাহী, বগুড়া, রংপুর, দিনাজপুরসহ বৃহত্তর রংপুরের বিভিন্ন অঞ্চল ছাড়াও ময়মনসিংহ এবং শেরপুর জেলার কয়েকটি অঞ্চলে।
 - ✓ মাহাতোরা মূলত জয়পুরহাট, গাইবান্ধা, দিনাজপুর, নাটোর, রাজশাহী, নওগাঁ, পাবনা, সিরাজগঞ্জ, কুড়িগ্রাম, চাঁপাইনবাবগঞ্জ প্রভৃতি জেলায় বাস করে। বগুড়া, ফরিদপুর ও সিলেটের চা-বাগানেও মাহাতোদের ছোট বসতি রয়েছে।
 - ✓ উত্তর-বাংলাদেশের বিভিন্ন অঞ্চল ছাড়াও বৃহত্তর সিলেটের চা-বাগান এলাকায় মুভা বসতি আছে।
- ১০ সাঁওতাল, মুভা এবং ওরাওঁরা ব্রিটিশ আমলে ভারতের ছোট নাগপুর ও সাঁওতাল পরগনা থেকে এসেছে।

- বৃহত্তর সিলেটে খাসিয়া ও মণিপুরি বড় জাতি। ছোটদের মধ্যে আছে পাত্র। কিছু ত্রিপুরা, গারো, ওরাওঁ হাজং, মুভা বসতি/বসবাসও আছে।
 - ✓ মণিপুরিদের বসবাস মৌলভীবাজার, হবিগঞ্জ, সিলেট ও সুনামগঞ্জের সমতলে। বড় বসতি মৌলভীবাজারের কমলগঞ্জ উপজেলায়; এখানেই মুসলিম অংশতিরও দেখা মেলে। সীমান্তের ওপারে ভারতের মণিপুর, আসাম, ত্রিপুরা, আগরতলায় মণিপুরি জাতি আছে।
 - ✓ খাসিয়াদের বসবাস মূলত এগারোটি উপজেলায়। এগুলো হচ্ছে : সিলেটের ভারতসীমান্তবর্তী জৈন্তিয়াপুর, কানাইঘাট ও গোয়াইনঘাট; মৌলভীবাজারের শ্রীমঙ্গল, কমলগঞ্জ, রাজনগর, কুলাউড়া ও বড়লেখা; হবিগঞ্জের চুনারংঘাট ও বাহুবল; এবং সুনামগঞ্জের তাহিরপুর উপজেলায়।
 - ✓ পাত্রদের দেখা মেলে সিলেট শহরের উত্তর-পূর্বে, খুব কাছেই। এ অঞ্চলে ত্রিপুরারা আছে মৌলভীবাজার জেলায়।

মোটা দাগে ৪৫ জাতি

বাংলাদেশ এশিয়াটিক সোসাইটি প্রকাশিত আদিবাসী জনগোষ্ঠী (বাংলাদেশ সাংস্কৃতিক সমীক্ষামালা-৫) বইটির তথ্য অনুযায়ী, বাংলাদেশে ৪৫ আদিবাসী জাতি এভাবে বিন্যস্ত :

পার্বত্য চট্টগ্রাম অঞ্চল : খিরাং, খুমি, চাক, চাকমা, তঞ্চঙ্গ্যা, ত্রিপুরা, পাংখোয়া, বম, মারমা, ত্রো, রাখাইন, লুসাই—মোট ১২টি।

উত্তরাঞ্চল : ওরাওঁ, নুনিয়া, পলিয়া, পাহান, ভুইমালী, মাহাতো, মাহালি, মুভা, মুশহর, রবিদাস, রাঁজোয়াড়, রাজবংশী, রানা কর্মকার, লহরা, সাঁওতাল—মোট ১৫টি।

ময়মনসিংহ-সিলেট অঞ্চল : কন্দ, কুর্মি, কোচ, খাড়িয়া, খাসিয়া, গারো, ডালু, নায়েক, পাঙ্গন, পাত্র, বর্মণ, বীন, বোনাজ, ভূমিজ, মণিপুরি, শবর, হাজং, হালাম—মোট ১৮টি।

- ময়মনসিংহ ও টাঙ্গাইলসহ বৃহত্তর ময়মনসিংহের জামালপুর, শেরপুর, নেত্রকোনা ইত্যাদি জেলায় বড় জাতি গারো। তারপর আছে কোচ ও হাজং। ভারতের মেঘালয়ের গারো পাহাড় অঞ্চলে এ জাতির আদি নিবাস।

- ✓ বাংলাদেশে গারোদের মূল বসতি হালুয়াঘাট উপজেলাসহ ময়মনসিংহ, শেরপুর, নেত্রকোনার ভারত-সীমান্তবর্তী অঞ্চলে এবং টাঙ্গাইলের মধুপুর গড়াঞ্চলে। এখানে কোচ, হাজং, রাজবংশী এবং ডালু, বর্মণ (ক্ষত্রিয়), বানাই, হনি প্রভৃতি জনগোষ্ঠীর বাসও আছে।
- ✓ এ ছাড়া, ঢাকা ও সিলেট বিভাগের বিভিন্ন জেলায় গারোদের দেখা মিলবে।
- ✓ বৃহত্তর ময়মনসিংহ ছাড়াও বৃহত্তর সিলেটে হাজংদের বসতি আছে।

ঝঝ ভাষার মিল থেকে ধারণা করা হয় গারো, খাসিয়া, মণিপুরি, রাজবংশী এবং কোচ জাতিসম্প্রদারা আদিতে

ছিল বর্মা থেকে তিক্রত অন্ধের বিস্তৃত অঞ্চলে ব্রহ্মপুত্র উপত্যকার বাসিন্দা। কয়েক হাজার বছর আগে থেকেই এদের অনেকে আজকের আসাম ও তার আশপাশের এলাকার বাসিন্দা ছিল। বিভিন্ন সময়ে এরা বিভিন্ন এলাকায় ছড়িয়ে পড়ে।

- বরঙনা ও পটুয়াখালীতে বড় আদিবাসী বসতি রাখাইনদের।
✓ এ ছাড়া পার্বত্য চট্টগ্রাম ও কক্রবাজারেও কিছু রাখাইন আছে।
- রাখাইনেরা এসেছে আরাকান থেকে। প্রশান্ত ত্রিপুরা জানাচ্ছেন, এদেরই জাতভাই মারমাদের কেউ কেউ অবশ্য নিজেদের উৎপত্তিস্থল হিসেবে মিয়ানমারের নাম বলেন।
- দক্ষিণ-পশ্চিমে বৃহত্তর খুলনা-ঘণ্টোর এলাকায় কিছু সাবেক-ক্ষুদ্র জাতিসভার মানুষের বড় বসতি চোখে পড়ে। বেদে জাতি ছড়িয়ে-ছিটিয়ে আছে অনেক এলাকায়।

কম করে গোনা?

নৃবিজ্ঞানীরা বিভিন্ন সময় সরকারি গণনায় পাওয়া আদিবাসী জনসংখ্যা নিয়ে অশু তোলেন। তাঁরা বলেন, ক্ষুদ্র জাতিসভাদের জনসংখ্যা এগুলোর চেয়ে বেশি হওয়া সম্ভব। যেমন, ১৯৯১ সালের আদমশুমারি পুরো টাঙাইল জেলায় ‘উপজাতীয়’ জনসংখ্যা বলেছিল ১৪,০৮২। ২০০১ সালের আদমশুমারি গুনেছে ১৭,৪৬২। অর্থাৎ মধুপুর জাতীয় উদ্যানের ভেতরে ও আশপাশের ৩০টি গারো গ্রামের ১০টির নমুনা জরিপ করে প্রয়াত নৃবিজ্ঞানী কিবরিয়াউল খালেক ১৯৯২ সালেই লিখেছিলেন, কেবল মধুপুর গড়াঝলেই আদিবাসীদের সংখ্যা হবে ২৫,০০০। বইপত্রে পাওয়া সরকারি ও বেসরকারি শুমারির ব্যাপক পার্থক্যের আরেকটি নজির : ১৯৮১ সালের মার্চে বিবিএসের মাসিক পরিসংখ্যান বুলেটিনে রাজশাহীর পাঁচ জেলায় আদিবাসীর সংখ্যা বলা হয় ৬২,০০০। কিন্তু খ্রিস্টান মিশনগুলোর শুমারিতে এর দ্বিগুণ জনসংখ্যা দেখায়। সরকারি গণনায় ভুল হওয়া বিচ্ছিন্ন নয়। সরকারি কাগজপত্রে এমনিতেই খ্রিস্টান আদিবাসীদের ‘খ্রিস্টান’ এবং বাংলা পদবি ব্যবহারকারীদের ‘হিন্দু’ হিসেবে চিহ্নিত করার নজির আছে।

মোটা দাগে জাতিভেদে ধর্ম :

বৌদ্ধ : মারমা, চাকমা, তঞ্জঙ্গা, রাখাইন; পার্বত্য চট্টগ্রামের আরও কিছু ক্ষুদ্র জাতি। খুব অল্পসংখ্যক শ্রোও বৌদ্ধধর্মের অনুসারী।

হিন্দু : ত্রিপুরা, মণিপুরি, কোচ, হাজং, পাত্র, সমতলের আরও কিছু জাতি ও অনেকগুলো সাবেক ক্ষুদ্র জাতিসভা।

সর্বপ্রাণবাদী, নিজস্ব ধর্ম : সাঁওতাল—স্পিরিট বা আত্মানির্ভর বিশ্বাস। তবে হিন্দু প্রভাব আছে এবং কিছু খ্রিস্টান হয়েছে। খাসিয়াদেরও একই পরিস্থিতি। পার্বত্য চট্টগ্রামের প্রত্যন্ত অঞ্চলের ছোট গোষ্ঠীগুলো

সর্বপ্রাণবাদী ছিল। কিন্তু এখন অনেকে খ্রিস্টধর্মে ধর্মান্তরিত। অন্যদিকে আদিতে শ্রোদের কোনো পোশাকি ধর্ম ছিল না। ১৯৮০-র দশকে মেনলে শ্রো নামে এক কিশোর-চিন্তাবিদ তাদের জন্য ত্রামা নামে ধর্ম প্রবর্তন করেন। এখন অধিকাংশই সে ধর্ম পালন করে।

শ্রিষ্টান : সংখ্যাগরিষ্ঠ ত্রিপুরা হিন্দু হলেও, কেউ কেউ শ্রিষ্টান। বান্দরবানের অধিকাংশ ত্রিপুরাই তাই। গারোদের সর্বপ্রাণবাদী ধর্ম ছিল। এখন প্রায় সবাই শ্রিষ্টান। বম, লুসাই এবং পাংখোয়াদের অধিকাংশ বা প্রায় সবাই এখন শ্রিষ্টান। খিয়াং, শ্রো এবং খুমিদেরও কেউ কেউ শ্রিষ্টান।

মুসলিম : বেদে; মণিপুরিদের ছোট একটি অংশ, ‘পাঞ্জন’ নামে পরিচিত।

ভাষার মিল ও স্বাতন্ত্র্য

নৃবিজ্ঞানীরা বলছেন, নরগোষ্ঠী বা রেস ধরে বিভাজন মানুষের অর্থবহ পরিচিতি নয়। বরং যেকোনো জাতির উৎপত্তি ও পরিচয় বোঝার জন্য গুরুত্বপূর্ণ একটি ভিত্তি হচ্ছে তার ভাষাগত পরিচিতি। শব্দভাভাবের তুলনা করে একই উৎস থেকে উদ্ভৃত ভাষাগুলোকে একেকটি পরিবার বলা হয়। ক্ষুদ্র জাতিসভাদের ভাষার পরিবারভুক্তি দেখলে এদের কাছে বাংলা ভাষাভাষী জনগোষ্ঠীর ঝণ যেমন চোখে পড়ে, তেমনি এদের স্বাতন্ত্র্যের বিষয়টিও পরিষ্কার হয়। সংক্ষেপে চিত্রটি এমন :

১. তিব্বতি-বর্মি বা ভোট-বর্মি ভাষা পরিবার : এই পরিবারের সদস্যদের মধ্যে আছে তিব্বতি ও বর্মী ভাষা এবং নেপাল, ভূটান ও ভারতের আদিবাসী-অধ্যুষিত উত্তর-পূর্বাঞ্চলীয় রাজ্যগুলোর অধিকাংশ ভাষা। কুকি-চিন এবং বোঢ়ো এর দুটি ভাগ। কুকি-চিন গোত্রের সদস্য পার্বত্য চট্টগ্রামের বম, খুমি, খিয়াং, লুসাই, মণিপুরি (মৈতৈ), মারমা, শ্রো, পাংখোয়া এবং চাক ভাষাগুলো। চাকমা ও তৎঙ্গ্যাদের পুরোনো ভাষাও হয়তো কুকি-চিনের অন্তর্গত ছিল। বনযোগী ও সেন্দুদের ভাষাও এই পরিবারে। বোঢ়ো গোত্রের সদস্য : গারো, কোচ, ত্রিপুরা, রাজবংশী প্রভৃতি ভাষা। এ ছাড়া আরও আছে ডালু, হন্দি, কাচারি, মিকির, পালিয়া, পাত্র, রিয়াংদের ভাষা। হাজংদের পুরোনো ভাষা বোঢ়ো গোত্রের ছিল।

২. অস্ট্রো-এশিয়াটিক : দুই প্রধান শাখা—মুন্ডা ও মন-খ্মের। মুন্ডাদের ভাষা মুন্ডারি ছাড়াও মুন্ডা শাখায় আছে সাঁওতাল, (মাহালি, হো) প্রভৃতি ভাষা। মন-খ্মের শাখার অন্তর্ভুক্ত হচ্ছে বার্মার মন ও কমোডিয়ার খ্মের ভাষা। ভারতীয় উপমহাদেশে এ পরিবারে পড়ছে কেবলমাত্র খাসিয়া ভাষা।

৩. দ্রাবিড় ভাষা পরিবার : তামিল, মালয়ালম, তেলেঙ্গ প্রভৃতি দক্ষিণ ভারতীয় ভাষা। ওরাওঁ ও পাহাড়িয়া ভাষা এ পরিবারভুক্ত।

৪. ইন্দো-ইউরোপীয় ভাষা পরিবার : বাংলা এই পরিবারের সদস্য। নৃবিজ্ঞানীরা বলছেন, আদিতে হয়তো চাকমা, তৎঙ্গ্যা ও হাজংদের ভাষাগুলো তিব্বতি-বর্মি উৎসের ছিল। তবে এখন এরা যেসব ভাষা ব্যবহার করে সেগুলোর সঙ্গে বাংলার অনেক মিল আছে। সে হিসেবে এখন তাদের ভাষা ইন্দো-ইউরোপীয় পরিবারের সদস্য। আবার বিষ্ণুপ্রিয়া মণিপুরিদের ভাষাকেও অহমিয়া, উড়িয়া ও বাংলা ধাঁচের

বলে মনে করা হয়। তাই সেটা এই পরিবারে পড়বে। বেদে, ভুইমালী, ভুইয়া, গাঙ্গু, জালিয়া-কৈবর্ত, কুকামার, কুর্মি, মাল্লা, নমশ্বন্দি প্রভৃতি জাতির ভাষা এ পরিবারে পড়ে।

বাংলার শেকড় : নৃবিজ্ঞানীরা বলেন, বাংলা ভাষাভাষী এ অঞ্চলের প্রাচীন অধিবাসীদের ভাষা ছিল মুঙ্গা-গোত্রীয় অস্ট্রো-এশিয়াটিক পরিবারের। এদের কাছ থেকেই বাংলা ভাষার ধ্বনিতত্ত্ব ও ব্যাকরণের কিছু ভিত্তিসহ এর ‘দেশ’ শব্দগুলো এসেছে। সাঁওতাল বা মুঙ্গাদের সুতরাং ‘বহিরাগত’ বলার কোনো সুযোগ নেই। তারা বাংলা ও বাঙালির বৃহত্তর ঐতিহ্যের ভিত্তি। একইভাবে কিছু ‘দেশ’ শব্দ তিব্বতি-বর্মি ভাষাগুলোর কাছ থেকে পাওয়া। বাংলার বিভিন্ন আঞ্চলিক রূপেও তিব্বতি-বর্মি, বিশেষ করে এর বোঢ়ো শাখার প্রভাব দেখা যায়।

পারম্পরিক লেনদেন : অন্যদিকে এখন পার্বত্য চট্টগ্রামের প্রত্যন্ত অঞ্চলের কিছু গোষ্ঠী ছাড়া প্রায় সবাই বাংলা ও নিজস্ব ভাষা দুটোতেই অভ্যন্ত। রাজবংশী, পাহাড়িয়া, কোচ বা পাত্রা নিজেদের ভাষা হারিয়ে ফেলেছে; তারা এখন নিজেদের মধ্যেও বাংলায় কথা বলে। ধর্মান্তরিত খ্রিস্টান জাতিগুলোর ওপর ইংরেজির প্রভাব দেখা যায়। বেশ কিছু আদিবাসী ভাষা অন্য ভাষার লিপি নিয়েছে: বাংলা লিপি-ত্রিপুরা ও মণিপুরি; বর্মী লিপি-চাকমা ও মারমা; রোমান লিপি—সাঁওতাল, গারো, লুসাই ও আরও কিছু ভাষা। তবে অনেক ত্রিপুরা রোমান লিপি ব্যবহার করতে পছন্দ করেন।

রবিদাস

রবিদাসেরা নিম্নবর্ণের হিন্দু এবং বাঙালি সমাজের প্রাচীক গোষ্ঠী হিসেবে পরিচিত। নারায়ণের পূজারী রবিদাসদের জাতির নাম তাদের ধর্মগুরুর নামে। এদের আদি পেশা চর্মকার। অনেকে চামড়ার কাজের ওপর নির্ভর করলেও এরা এখন বিভিন্ন শ্রমজীবী। বাংলাদেশ এশিয়াটিক সোসাইটি প্রকাশিত বাংলাদেশ সাংস্কৃতিক সমীক্ষামালা-৫ বইটি বলছে এদের সবচেয়ে বড় অংশ বাস করে নওগাঁ জেলার নিয়ামতপুরে। বৃহত্তর সিলেটের মালিনীছড়া, লাক্তাতুরা, আলীবিহার ও মৌলভীবাজারের শ্রীমঙ্গলের আলীনগর, শমশেরনগর, পুঁঠিয়াছড়া এবং হবিগঞ্জে তাদের বড় বসতি আছে। খুলনা-যশোরসহ দেশের অন্যান্য বিভিন্ন অঞ্চলেও তাদের দেখা যায়। রবিদাস সমাজের দুই সদস্যর বরাত দিয়ে বইটি তাদের সংখ্যা বলছে, ১ লাখ ২৮ হাজার।

সমতলবাসী ক্ষুদ্র জাতিসম্প্রদায়

বৃহত্তর ময়মনসিংহের গারোরা বিভিন্ন কারণে, বিশেষ করে গড়াঞ্চলে তাদের সঙ্গে বন নিয়ে রাষ্ট্রের দ্বন্দ্ব-সংঘাত এবং রাজধানী ঢাকার সঙ্গে নৈকট্যের সুবাদে, সংবাদমাধ্যমে কিছুটা স্থান পায়। মণিপুরদের সমৃদ্ধ সংস্কৃতির খবর সংবাদমাধ্যমে বিস্তৃতভাবে কিছু স্থান পায়। এরা বাদে সমতলবাসী অন্য কোনো ক্ষুদ্র জাতিসম্প্রদায়ের কথা সংবাদমাধ্যমে প্রায় দেখাই যায় না। বাংলাদেশে আদিবাসীদের দ্বিতীয় বৃহত্তম জাতি সমতলবাসী সাঁওতালেরা।

সাঁওতাল বিদ্রোহের দিবস এলে হয়তো তাদের কথা সংবাদমাধ্যমের মনে পড়ে। অথবা দিনাজপুরের কঢ়লাখনি নিয়ে তর্ক-বিতর্ক উঠলে তাদের নাম ওঠে।

ওপরে পাহাড়ি ক্ষুদ্রতর জাতিসভাগুলোর নাম পাবেন। সবগুলো ক্ষুদ্রতর জাতিসভা সাধারণভাবে বঞ্চিতর মধ্যে অধিকতর বঞ্চিত। আর দু-একটি অপেক্ষাকৃত বড় জাতির কিছু অংশের কথা বাদ দিলে সমতলবাসী সব আদিবাসীদেরই অবস্থা সে রকম। এক অর্থে এদের সমস্যাগুলো হয়তো গভীরতর। সংখ্যাগুরু জনগোষ্ঠীর একেবারে গা ঘেঁষে বসবাস করায় জমি নিয়ে এদের দ্বন্দ্ব ও বঞ্চনা প্রকটতর। সমতলের অনেক আদিবাসী ক্ষুদ্র জাতিসভা খুব ছোট। এ ছাড়া, অনেকগুলো জাতিই নিত্য ওঠাবসায় বাঙালি সমাজের রীতি-নীতি-ধারার প্রবল প্রভাব এড়াতে পারেনি।

অনেকে তারা সাবেক ক্ষুদ্র জাতিসভা। কেউ অনেকদিন থেকে, কেউ অল্পদিন হয় বাঙালিসমাজের প্রান্তিক গোষ্ঠী হিসেবে নজরের আড়ালে চলে গেছে। সমতলের আদিবাসীদের স্বাতন্ত্র্য হারানোর এ প্রক্রিয়া দ্রুত চলমান। কোণঠাসা হতে হতে অস্তিত্বের সংগ্রামে অনেকেই খ্রিষ্টধর্ম গ্রহণ করেছে এবং খ্রিষ্টান মিশনারিদের সাহায্যে লেখাপড়া শিখে জীবিকার উপায় খুঁজছে। গারোদের প্রায় সবাই এখন খ্রিষ্টান। অনেক জাতি আবার বাঙালিসমাজে অন্তর্ভুক্ত হওয়ার প্রক্রিয়ায় হিন্দুধর্ম গ্রহণ করেছে কিন্তু তাদের ঠাঁই হয়েছে একেবারে প্রাপ্তে, অস্পৃশ্যতার ভুক্তভোগী নিম্নবর্ণের মধ্যে অথবা চতুর্বর্ণের বাইরে। এদের অনেক জাতিই এখনো নিজেদের আদি কিছু আচার-অনুষ্ঠান কমবেশি পালন করে।

ওপরে যেমনটা দেখেছি, সাঁওতালেরাসহ সমতলবাসী আদিবাসীদের বড় একটি অংশ উত্তর-বাংলাদেশের বিভিন্ন জেলায় ছড়িয়ে-ছিটিয়ে আছে। উত্তরাঞ্চলের চরম দরিদ্র জনগোষ্ঠীর মধ্যে এরাও আছে। আনুষ্ঠানিক শিক্ষা বা সাক্ষরতা দুই দিক থেকেই এরা অনেক পিছিয়ে। আদিবাসী গ্রামগুলোতে সুযোগ-সুবিধার অভাব যেমন প্রকট, তেমনি এখনো এরা জাদুকর বা ওকা ও টোটকা চিকিৎসকের ওপর নির্ভরশীল।

এদিকে সাঁওতাল, মুভা এবং ওরাওঁরা ভারতের ছোটনাগপুর ও সাঁওতাল পরগনা থেকে এ ভূখণ্ডে এসেছে ব্রিটিশ আমলে। সুতরাং এদের ‘আদিবাসী’ স্বীকৃতি নিয়ে বাগ্বিতণ্ডও বেশি। একই রকম বিতর্কের মধ্যে আছে বৃহত্তর সিলেটের চা-শ্রমিক জনগোষ্ঠীরা। চা-বাগান প্রতিষ্ঠার সময় তাদের ভারত থেকে এ অঞ্চলে এনে বসতি করিয়েছিল ব্রিটিশ মালিকেরা। তাদের আনা হয়েছিল বিহার, তামিলনাড়ু, উড়িষ্যা, অন্ধ্র প্রদেশ, মধ্যপ্রদেশ, পশ্চিমবঙ্গ, উত্তর প্রদেশ—এসব জায়গা থেকে। এরা মূলত আদিবাসী ও দলিত সম্প্রদায়ের মানুষ। চা-জনগোষ্ঠীর মধ্যে উল্লেখযোগ্য কিছু জাতিগোষ্ঠী : মুভা, ওরাও, সাঁওতাল, মাহালি, বিন্দ, বাউরি, মাহাতো, বরাইক, গঁড়, দাল ও কাহার। বাংলাদেশে এরা ক্ষুদ্র জাতিসভা পরিচিতির দাবিদার। উপত্যকাবাসী হিসেবে এরাও সমতলের আদিবাসীদের মধ্যে পড়বে। আরও কিছু জাতির হন্দিস পাবেন আলাদা আলাদা বর্ণে।

এ ছাড়া, সমতলের আদিবাসী জাতিদের কিছু সামাজিক-সাংস্কৃতিক উৎসব-অনুষ্ঠানের কথা পাবেন সে-সংগ্রান্ত তালিকায়। তবে সাংবাদিককে কেবল সেসব বিষয়ে নজর দিলে চলবে না, এদের সমস্যা-বঞ্চনাগুলো তুলে ধরায় মন দিতে হবে। এবং সমতলবাসী সবগুলো আদিবাসী জাতিসভার কথাই বিশেষভাবে মনে রাখতে হবে।

সমতলের ছোট কিছু জাতিসম্প্রদায়

বাংলাদেশ এশিয়াটিক সোসাইটি প্রকাশিত আদিবাসী জনগোষ্ঠী বইটি থেকে সমতলবাসী কয়েকটি ছোট এবং/অথবা সাবেক স্কুল জাতিসম্প্রদায়ের হিসেব দেব।

পালিয়া : অনেক নৃবিজ্ঞানীর মতে, পালিয়ারা রাজবংশীদের একটি শাখা। এদের নিবাস বাংলাদেশের রংপুর, দিনাজপুর, কুড়িগ্রাম, নীলফামারী জেলায়। ধর্মে হিন্দু। দুর্গা বড় দেবী।

পাহান : পাহান জাতির মানুষেরা বসবাস করে মহাস্থানগড় ও পাহাড়পুর বৌদ্ধবিহার এলাকায়। পাহানেরা মূলত নিজস্ব সন্নাতন বিশ্বাস অনুসারী, তবে হিন্দু আচার ও পূজা-পার্বণও তারা পালন করে।

ভুইমালী : ভুইমালীদের বসবাস মূলত জয়পুরহাটের কাছে পাথুরিয়া গ্রামে। এ গ্রাম-সংলগ্ন যমুনা নদীর অন্য পারেও কিছু ভুইমালী বাস করে। এরা নিজেদের নিম্নবর্ণের বাঙালি হিন্দু বলে মনে করে।

মাহালি : অনেক নৃবিজ্ঞানীর মতে, মাহালিরা সাঁওতালদের একটি উপ-বিভাগ। মাহালিরা বাস করে উত্তরাঞ্চলের রাজশাহী, দিনাজপুর, রংপুর, বগুড়া ও জয়পুরহাট জেলায়। ধারণা করা হয়, মাহালিরা খ্রিস্টান হতে শুরু করে বিংশ শতাব্দীর সক্রিয়তে। এখন এদের প্রায় সবাই খ্রিস্টধর্ম গ্রহণ করেছে। যারা খ্রিস্টান হয়নি তারা হিন্দুধর্মের কিছু আচার-অনুষ্ঠান পালন করে। তবে হিন্দুধর্মের সবচেয়ে নিচের বর্ণেও তাদের ঠাই হয়নি।

মুশহর : মুশহর নামে পরিচিত মানুষেরা বাংলাদেশে এসেছে ভারতের বিহার রাজ্যের আদিবাসী-অধ্যুষিত অঞ্চল থেকে। এরা বাংলাদেশের উত্তরাঞ্চলে বাস করে। এশিয়াটিক সোসাইটির বইটি এদের সংখ্যা অনুমান করছে তু হাজার। এরা ধর্মবিশ্বাসে হিন্দু; হোলি সবচেয়ে বড় ধর্মীয় উৎসব।

রাঁজোয়াড় : রাঁজোয়ারদের বসতি একটি গ্রামে সীমিত-জয়পুরহাট জেলার পাঁচবিবি উপজেলার নাকরিয়া। গ্রামটি ছোট যমুনা নদীর তীরে অবস্থিত। লোকিক দেব-দেবীর পাশাপাশি তারা হিন্দু দেব-দেবীদেরও পূজা করে।

লহরা : সন্নাতন হিন্দু ধর্মাবলম্বী লহরা জাতির বড় বসতি জয়পুরহাট শহরের কাছে এবং সে জেলার সদর উপজেলায় ভাদসা ইউনিয়নের ইয়াকপুর গ্রামে। এ ছাড়া, রাজশাহী ও নাটোরে কিছুসংখ্যক লহরার দেখা যায়। সন্নাতন হিন্দু ধর্মাবলম্বী লহরাদের বড় দেবতা নারায়ণ। সব শুভ কাজে নারায়ণের পূজা করা হয়। প্রতি লহরা বাড়িতে বছরে অন্তত একবার নারায়ণপূজা করতেই হয়।

আদিবাসী সংস্কৃতি

সাঁওতাল

- ✓ **সোহরাই/সহরায় উৎসব :** সবচেয়ে বড় উৎসব। আমন ধান ঘরে তুলে ফসলের দেবতাকে ধন্যবাদ জানানোর উৎসব। হয় পৌষ-মাঘ মাসে।
- ✓ **বাহা পরব :** ফাল্গুন মাসের এ উৎসব সাঁওতালদের খুবই প্রিয়। মূলত এটা বসন্ত উৎসব।
- ✓ **দাঁসায় উৎসব ও নৃত্য :** অতীতে আদিধর্মের একটি বিশেষ উপলক্ষে এ অনুষ্ঠান ও নাচ হতো। এখন দুর্গাপূজার সময় এই নৃত্য পরিবেশিত হয়।
- ✓ **সারজম উৎসব :** শাল ফুল ফুটলে ঐতিহ্যবাহী এই পরব হয়। শালগাছ বাঁচানোর জন্য বনদেবীর সঙ্গে তাদের বিয়ে দেওয়া হয়।
- ✓ **এরো উৎসব :** আষাঢ়-শ্রাবণে বীজ বোনার উৎসব।

ওরঁও

- ✓ **কারাম উৎসব :** সবচেয়ে বড় উৎসব। কারামগাছকে তারা রক্ষাকর্তা মনে। তার প্রতি কৃতজ্ঞতার কথা মনে করতে এ উৎসব করা হয়। এটা হয় ভাদ্র মাসে।
- ✓ **সারছল উৎসব :** চৈত্র মাসে গাছের নতুন পাতা বেরোলে এ উৎসব হয়। এ সময় গ্রাম রক্ষাকারী আত্মাকে স্মরণ করে পূজা দেওয়া হয়। এর আরেক তাৎপর্য সূর্য ও পৃথিবীর বিয়ে।
- ✓ **ফাণয়া উৎসব :** নববর্ষ। ফাল্গুনকে বছরের প্রথম মাস গণনা করে এ উৎসব করা হয় ফাল্গুনী পূর্ণিমায়। প্রচুর আবির ছড়ানো হয়।
- ✓ **সোহরাই উৎসব :** কার্তিক মাসে অমাবস্যায় (হিন্দুদের দীপাবলি উৎসবের দিন) আলো জ্বালিয়ে ঘর-গোয়াল সাফসুতরো করে।
- ✓ **খারিয়ানি উৎসব :** অগ্রহায়ণ মাসে আমন ধান মাড়াইয়ের জায়গাকে পবিত্র করার জন্য এ উৎসব।
- ✓ **ভান্তা কাটনা :** যেকোনো ভালো কাজের আগে এই উৎসব করা হয়।

রাজবংশী

- ✓ **তুলসীপূজা** : বাংলা নববর্ষের প্রথম দিন বছরজুড়ে প্রাকৃতিক বিপর্যয়ের হাত থেকে রক্ষা পাওয়ার জন্য এ পূজা হয়।
- ✓ **মদনকাম বাঁশখোলা** : বৈশাখ মাসের এ পূজা ও উৎসবে রঙিন কাপড়ে মোড়া বাঁশের খণ্ড নিয়ে গ্রাম প্রদক্ষিণ ও নাচ-গান করা হয়। এটা কালীপূজার মতো। রাজবংশীরা শীতলা দেবীর বদলে এ পূজা করে।
- ✓ **বিষহরির পূজা** : প্রায় সব অনুষ্ঠানে বিষহরি ঠাকুরানির পূজা করা হয়।
- ✓ **ধানকাটার পূজা** : অগ্রহায়ণ মাসের পঞ্চলা এ পূজা তারিখে করা হয়। পরিবারের কর্তৃ সিঁদুর ও প্রদীপ নিয়ে ক্ষেতে গিয়ে সিঁদুর ছড়িয়ে কিছু ধান কেটে ঘরে আনেন।
- ✓ **বাক্রশী সন্নান** : মাঘ মাসে করোতোয়া নদীর তীরে রাজবংশীরা এ পুণ্যসন্নান করে।

মাহাতো

- ✓ **সহরায় উৎসব** : প্রধান উৎসব। কার্তিক মাসের অমাবস্যা তিথিতে গৃহপালিত পশুর মঙ্গলের জন্য করা হয়; অশুভ শক্তি নাশ করাও উদ্দেশ্য থাকে।
- ✓ **কারাম উৎসব** : ভাদ্র মাসের শুক্লপক্ষের একাদশীর দিনে ওরাওঁদের মতো কারামগাছের ডালকে পূজা করা হয়।
- ✓ **সূর্যপূজা** : মাঘ মাসে করা হয়
- ✓ **পূষনা উৎসব** : পৌষ মাসের শেষ দিনে বা সংক্রান্তিতে এই উৎসব হয়। এ উৎসবকে কেন্দ্র করে মেলা হয়।

হাজৎ

- ✓ **বাস্তুপূজা** : প্রতি গ্রামে বাস্তুমন্দির থাকে, পৌষসংক্রান্তির দিনে সেখানে পূজা হয়; হাজৎদের সবচেয়ে আনন্দের উৎসব।
- ✓ **মনসাপূজা** : শ্রাবণের মধ্যভাগে মনসাপূজা হয়। কবিয়ালেরা গীত রচনা করেন।
- ✓ **দোলযাত্রা** : ফাল্গুনী পূর্ণিমায় সবাই দোল উৎসব পালন করে।

মুভা

- ✓ গ্রামপূজা : সবচেয়ে বড় ও জাঁকজমকের পূজা। তবে আজকাল সব জায়গায় এ পূজা করা হয় না।
- ✓ কারামপূজা : ভদ্র মাসে কারামগাছের ডাল কেটে এনে এরাও পূজা করে।
- ✓ মনসাপূজা : সাপের মূর্তি-সংবলিত মাটির ঘট তুলে ভদ্র মাসে এ পূজা করা হয়।

রবিদাস

- ✓ মাঘী পূর্ণিমা : এদের প্রধান উৎসব। এ দিনটি তাদের ধর্মগুরু রবিদাসের জন্মতিথি।
- ✓ দেওয়ালি পূজা : কার্তিক মাসের অমাবস্যা তিথিতে কালীপূজার দিন এ উৎসব হয়। দোলপূর্ণিমা, বাসন্তীপূজা, শিবরাত্রি—এরা এসব পূজাও করে।

রাঁজোয়াড়

- ✓ ডালপূজা : ভদ্র মাসের একাদশী তিথিতে কুমারী মেয়েরা বিভিন্ন রকমের শস্যদানা নিয়ে পূজা করে।
- ✓ নারায়ণপূজা : বৈশাখ মাসে করা হয়। অন্তত বছরে একবার করতেই হয়।
- ✓ বিষহরির পূজা : শ্রাবণের শেষ দিন সাপের মূর্তি বসানো ঘট দিয়ে এ পূজা করা হয়।
- ✓ পৌষনা : পৌষ মাসের শেষ দিন নানা রকম পিঠা তৈরি করে সবাইকে খাওয়ানো হয়।
- ✓ সন্ধ্যাসীমেলা : চৈত্রের শেষ দিন ও বৈশাখের প্রথম দিন এ পূজা করা হয়।

গারো

জুম বা চাষাবাদকে কেন্দ্র করে তাদের বড় উৎসবগুলো আবর্তিত।

- ✓ ওয়ানগালা উৎসব : ঐতিহ্যবাহী সবচেয়ে বড় এবং জাঁকজমকপূর্ণ উৎসব হলো ওয়ানগালা। জুমের প্রথম ফসল খাওয়ার আগে তারা এ উৎসব করত। এখনো প্রতীকীভাবে অঞ্চলের মাসের শেষে বা নভেম্বর মাসে এ উৎসব করা হয়।
- ✓ জামে গাপুগা-আহাওয়া : জুম ক্ষেতে ধান কাটার আগের উৎসব। ধান কাটার মৌসুমে এটা পালিত হয়।
- ✓ শিশুর জন্মের অনুষ্ঠান : শিশু জন্ম নিলে পুরো গ্রামের সবাই আনন্দ করে।

মণিপুরি

- ✓ **রাস উৎসব** : সবচেয়ে বড় কার্তিকের পূর্ণিমায় উদ্যাপিত মহা রাসলীলা মণিপুরিদের সবচেয়ে বড় উৎসব। গ্রামে গ্রামে মহাসমারোহে নৃত্যগীত সহযোগে এ উৎসব পালন করা হয়।
- ✓ **বিষু উৎসব** : বর্ষবিদায় উৎসব।
- ✓ **সংক্রান্তি উৎসব** : পৌষপার্বণ

মণিপুরিদের যেকোনো উৎসব তাদের সমৃদ্ধ নৃত্য-গীতকলার জন্য বিশেষ বৈশিষ্ট্য পায়।

খাসিয়া

নাচ তাদের ধর্মীয় ও সামাজিক অনুষ্ঠানের অংশ। বিভিন্ন উপলক্ষে নৃত্য অনুষ্ঠিত হয়।

- ✓ **কুমারী নৃত্য** : বসন্তের শুরুতে প্রকৃতিকে খুশি করতে অবিবাহিত তরুণ-তরুণীরা এ নৃত্যে যোগ দেন।
- ✓ **ফসল তোলার নৃত্য** : বীজ বোনা, মাটির উর্বরতা কামনা থেকে শুরু করে ফসল উৎপাদন প্রক্রিয়ার বিভিন্ন পর্যায়ে আচার-অনুষ্ঠানের অঙ্গ থাকে নাচ।
- ✓ **নৎসুম নাচ** : খাসিয়ারা সব জনগোষ্ঠী একই সময়ে বিভিন্ন স্থানে সমিলিতভাবে বছরে একবার এ অনুষ্ঠান আয়োজন করে।

চা-জনগোষ্ঠী

এদের মধ্যে অনেকগুলো জাতি থাকায় নানা রকম পূজা-উৎসব দেখা যায়।

বাঁধনা, নয়াখানি, জিতিয়া, কারাম, ভাইফেঁটা, সোহরাই, সাকরাং, বাহা পরব, টুসু, ডাঙ্কাটনা, ইত্যাদি গুরুত্বপূর্ণ

- ✓ **ছট** : কার্তিক মাসের শুরু ও সপ্তমী তিথিতে হয় ছট পরব। এ পরব বিহারের বড় উৎসব।
- ✓ **টুসু** : শস্যের দেবী। পৌষ মাসে একে উদ্দেশ করে মুভা, কুর্মি ও মাহাতোরা ব্রত পালন করে।

চাকমা

- ✓ **বিজু বা বিছ উৎসব** : সবচেয়ে বড় উৎসব বিজু—চৈত্রসংক্রান্তি ও বর্ষবরণ উৎসব চৈত্র মাসের শেষ দুদিন এবং নতুন বছরের প্রথম দিন উদ্যাপিত হয়।

- ✓ **হাল-পালনি ও মা-লক্ষ্মী-মা পূজা** : অন্যতম উৎসব। একে দ্বিতীয় বিজু বলে। আষাঢ় মাসের ৭ তারিখ ফসল ও ঐশ্বর্যের দেবী মা-লক্ষ্মী-মাকে মুরগির ডিম এবং কাঁকড়া দিয়ে পূজা দেওয়া হয়। ওই দিন হালের গরণ্দের ও বিশ্রাম দেওয়া হয়।

মারমা

- ✓ **সাংগ্রাহী (নববর্ষ)** : প্রধান সামাজিক উৎসব। বর্মী সনের চৈত্র মাসের শেষ দুদিন ও নতুন বছরের দিন এ উৎসব হয়। বিজু বা বাঙালির চৈত্রসংক্রান্তি ও পয়লা বৈশাখের সময়ে এটা হয়।
- ✓ **শো-গ্যায়-আঁকা** : প্রবারণা পূর্ণিমার এ উৎসব মারমাদের ধর্মীয় ও সামাজিক উৎসব।

ত্রিপুরা

- ✓ **বৈসু/বৈসুক** : ত্রিপুরাদের প্রধান জাতীয় উৎসব। এটি তাদের বর্ষবরণের দিন। এটি অত্যন্ত পুণ্যদিনও বটে। এ উৎসবের দিনগুলোতে প্রেম ও কর্মের দেবতা গরিয়ার নামে গরিয়া উৎসব হয়। বিজু ও সাংগ্রাহীয়ের সময়ে এটা হয়।
- ✓ **কেরপূজা** : এটি একটি সর্বজনীন উৎসব। শকাদের শ্রাবণের কৃষ্ণপঞ্চের প্রথম শনি ও মঙ্গলবার এটা করা হয়। কের অর্থ গভি বা বেষ্টনী। মহামারি, প্রাকৃতিক দুর্ঘটনা ও শক্র আক্রমণ থেকে রক্ষা পাওয়ার জন্য এ পূজা করা হয়।
- ✓ **কাথারক (বোতল) নৃত্য** : কাথারক অর্থ পবিত্র। কার্তিক-অগ্রহায়ণ মাসের শুক্লা চতুর্দশী তিথিতে মাঙ্গলিক কাথারকপূজা ও উৎসব হয়। ভালো কাজের জন্য কাথারকপূজার সময় বোতলের ওপর দীপশিখা জুলিয়ে মাথায় নিয়ে মাঙ্গলিক নৃত্য করা হয়।

তৎক্ষণ্যা

- ✓ **বিসু** : তাদের প্রধান এ উৎসবটি নববর্ষের।

খিয়াৎ

- ✓ **সাংলান** : সবচেয়ে বড় ধর্মীয় উৎসব। বিজু ও সাংগ্রাহীর মতোই বর্ষবরণ উৎসব।
- ✓ **হেনেই** : জুম ফসল তোলার পর পালন করা হয়। বছরে তিনবার এই উৎসব করা হয়।
- ✓ **বুগেলে** : জুমে ধানের বীজ বপনের পর ভালো ফসলের আশায় এই অনুষ্ঠান করা হয়।

চাক

- ✓ সাংগ্রাহিক : বর্ষবরণ উৎসব। পাঁচ দিন ধরে হয়।
- ✓ নবান্ন উৎসব : জুমের প্রথম ধান কাটার পর এ উৎসব হয়।

বম

- ✓ প্রায় সবাই শ্রিষ্ঠান। বর্ষবিদায়, বর্ষবরণ, নবান্ন তাদের বড় উৎসব। প্রথম দুটি ইংরেজি মাস অনুসারে হয়। নবান্ন হয় জুমের ফসল ওঠার পরে।

ত্রো

- ✓ রাইকারাম : এটা কান ফোঁড়ানোর উৎসব। তিন বছর বয়সে এ কর্ম সম্পাদন করে শিশুকে জাতিতে ওঠানো হয়।
- ✓ ছিয়াছত-প্লাই বা গোহত্যা উৎসব : ডিসেম্বর থেকে ফেব্রুয়ারি মাসে জুমের ফসল ওঠানোর পর অবস্থাপন্ন ত্রো পরিবার এ উৎসব আয়োজন করে। এতে একটি গরুকে প্রতীকীভাবে হত্যা করা হয়। ত্রোদের আদিতে বিশ্বাস ছিল, গরু তাদের জন্য পাঠানো ধর্ম-লেখা কলাপাতাটি খেয়ে ফেলেছিল।
- ✓ চাম্পুয়া উৎসব : বনে গিয়ে কলাপাতা বা চাম্পুয়া কেটে আনার উৎসব। গোহত্যা উৎসবের বিশ্বাসের সঙ্গে এর মিল আছে।

লুসাই

- ✓ চাপচারকৃত : বসন্ত উৎসব। খেলাধুলা ও সাংস্কৃতিক উৎসব হয়।
- ✓ মীমকৃত : আগস্ট-সেপ্টেম্বর মাসে মৃত আত্মাদের স্মরণে পালন করা হয়।
- ✓ পলকৃত : শস্য কাটা উপলক্ষে এ উৎসব করা হয়।

রাখাইন

- ✓ সাংগ্রেং পোয়ে : বর্ষবরণ উৎসব। চাকমা, ত্রিপুরা ও মারমাদের বর্ষবরণের সমসাময়িক।

আদিবাসী-সংশ্লিষ্ট কিছু আইন

বাংলাদেশ

সংবিধান : স্বাতন্ত্র্য ও বিশেষ কোনো অধিকারের স্বীকৃতি নেই। তবে দুটি বিধানের পরোক্ষ প্রভাব পড়ে :

- ২৮ (১) অনুচ্ছেদ :

✓ ‘কেবল ধর্ম, গোষ্ঠী, বর্গ, নারী-পুরুষ ভেদ বা জন্মস্থানের কারণে কোনো নাগরিকের প্রতি রাষ্ট্র বৈষম্য প্রদর্শন করিবেন না।’

- ২৮ (৪) অনুচ্ছেদ :

✓ ‘নারী বা শিশুদের অনুকূলে কিংবা নাগরিকদের যেকোনো অনঘসর অংশের অঙ্গতির জন্য বিশেষ বিধান-প্রণয়ন হইতে এই অনুচ্ছেদের কোনো কিছুই রাষ্ট্রকে নিবৃত্ত করিবে না।’

অন্যান্য আইন : কিছু আইন/নীতিমালায় আদিবাসীদের উল্লেখ বা তাদের ওপর প্রভাব ফেলার মতো বিধান আছে। এর মধ্যে পড়ছে ভূমি এবং বন ও পরিবেশ-সংরক্ষণ বিভিন্ন আইন ও নীতিমালা; পার্বত্য চট্টগ্রামের জন্য প্রযোজ্য বিশেষ কিছু আইন; চা-শ্রমিকদের স্বার্থ-সংশ্লিষ্ট আইন। নিচে এমন কয়েকটি আইন/নীতিমালার উল্লেখ করছি।

ভূমি

- রাষ্ট্রীয় অধিকার ও প্রজাস্বত্ত্ব আইন ১৯৫০ (সূত্র : বঙ্গীয় প্রজাস্বত্ত্ব আইন ১৮৮৫) ধারা-১৭ :
আদিবাসীদের দ্বারা ভূমি হস্তান্তরে বিধিনিষেধ

বন ও পরিবেশ

বন ও পরিবেশ-সংরক্ষণ প্রাসঙ্গিক আইনকানুন/নীতিগুলো আদিবাসীদের বিশেষভাবে প্রভাবিত করে। কয়েকটির কথা বলা যায় :

- বন মহাপরিকল্পনা ১৯৯৩-২০১৪ :

- বন আইন ১৯২৭ :

✓ ধারা ৩-২০ আদিবাসীদের অধিকার স্বীকার করে

✓ ধারা ২৬-২ ও ২৮-এ বন ব্যবস্থাপনায় আদিবাসীদের সম্পৃক্ত করার সুযোগ আছে

- জাতীয় বন নীতি, ১৯৯৪, ব্যক্তিগত বন অধ্যাদেশ, ১৯৫৯,
- বন্য প্রাণী সংরক্ষণ, পরিবেশ সংরক্ষণ এবং পাহাড় কাটা-সংক্রান্ত আইনগুলো
- জাতীয় পরিবেশ ব্যবস্থাপনা কর্মপরিকল্পনা, ১৯৯৪

পার্বত্য চট্টগ্রাম

- ১৯০০ সালের পার্বত্য চট্টগ্রাম শাসন বিধি (চিটাগং হিল ট্র্যান্স ম্যানুয়াল নামে পরিচিত) – ভূমি ও বন ব্যবহারে আদিবাসীদের প্রথাগত এবং বিশেষ অধিকারের স্বীকৃতি আছে।
- পার্বত্য চট্টগ্রাম (ভূমি অধিগ্রহণ) রেগুলেশন, ১৯৫৮
- পার্বত্য চট্টগ্রাম উন্নয়ন বোর্ড অধ্যাদেশ, ১৯৭৬
- ভূমি রেকর্ড (পার্বত্য চট্টগ্রাম) অধ্যাদেশ, ১৯৮৪
- তিন পার্বত্য জেলা পরিষদ আইন (১৯৮৯) : স্থানীয় সরকার গঠনের উদ্যোগ
- পার্বত্য চট্টগ্রাম শান্তিচুক্তি, ১৯৯৭ : স্বায়ত্তশাসনের লক্ষ্যে সংগ্রামে রত পার্বত্য চট্টগ্রাম জনসংহতি সমিতি ও বাংলাদেশ সরকারের মধ্যে শান্তিচুক্তি স্বাক্ষরিত হয় ১৯৯৭ সালে। এর ফলে এ অঞ্চলকে উপজাতি-অধ্যুষিত হিসেবে বিচার করে এর বৈশিষ্ট্য সংরক্ষণ ও উন্নয়নের প্রয়োজনীয়তার স্বীকৃতি দেওয়া হয়। পরবর্তী সময়ে পার্বত্য চট্টগ্রাম মন্ত্রণালয় গঠিত হয়। স্থানীয় সরকার গঠন ও ভূমি সমস্যা সমাধানে কিছু আইন হয় :
 - ✓ পার্বত্য চট্টগ্রাম আঞ্চলিক পরিষদ আইন, ১৯৯৮
 - ✓ পার্বত্য চট্টগ্রাম ভূমি বিরোধ নিষ্পত্তি কমিশন আইন, ২০০১

আরও দেখুন :

http://www.satp.org/satporgtp/countries/bangladesh/document/actandordinances/chittagong_hill.htm

শ্রমিকস্বার্থ

বাংলাদেশ চা-শ্রমিক কল্যাণ ফাউন্ডেশন অর্ডিনেস, ১৯৮৬ (অর্ডিনেস নং LXII 1986)

অন্যান্য

দি ইনডিজেনাস কালচারাল বডি অ্যাস্ট, ২০০৯ (মন্ত্রিসভায় অনুমোদিত)

আন্তর্জাতিক আইন ও ঘোষণা

আন্তর্জাতিক শ্রম সংস্থা বা আইএলও ছাড়াও আরও কিছু সনদ ও ঘোষণা গুরুত্বপূর্ণ।

- ১৯৫৭ সালের আদিবাসী ও উপজাতি-সংক্রান্ত আইএলও সনদ বা কনভেনশন ১০৭
 - ✓ অনুচ্ছেদ ১০ ও ১১ : দীর্ঘদিনের ভোগদখলি সম্পত্তি ও জমির ওপর ব্যক্তির এবং যৌথ মালিকানার স্বীকৃতি।
 - ✓ অনুচ্ছেদ ১৩ : আদিবাসীদের ভূমি ব্যবহার ও মালিকানা হস্তান্তরের প্রথার প্রতি শুন্দার স্বীকৃতি।
 - ✓ বাংলাদেশ সরকার ১৯৭২ সালে এটা অনুসমর্থন করেছে।
- ১৯৮৯ সালের আদিবাসী ও উপজাতি সংক্রান্ত আইএলও কনভেনশন ১৬৯
 - ✓ অনুচ্ছেদ ১৪ : আদিবাসীদের দখলে থাকা জমির মালিকানা ও দখল অব্যাহত রাখা এবং যে জমিতে দখল নেই কিন্তু যেটা জীবিকা বা রীতিপ্রথার জন্য ব্যবহারে আছে তারও অধিকার সংরক্ষণের কথা বলা হয়েছে। দেশের সরকারকে এসব কার্যকর করার দায়িত্ব নিতে বলা হয়েছে।
- জীববৈচিত্র্য কনভেনশন
 - ✓ ৮(জে) : আদিবাসীদের প্রথাগত জ্ঞানকে শুন্দা ও সংরক্ষণ করার কথা বলা হয়েছে।
- রিও ঘোষণা এবং এজেন্টা-২১
 - ✓ ভূমি, প্রথাগত জ্ঞান ও টেকসই উন্নয়ন, সাংস্কৃতিক, সামাজিক, অর্থনৈতিক কল্যাণের কথা বলা হয়েছে।
- আদিবাসীদের অধিকারসংক্রান্ত জাতিসংঘের ঘোষণা ২০০৭
 - ✓ অনুচ্ছেদ ১০ : আদিবাসীদের তাদের ভূমি বা বসবাসের অঞ্চল থেকে উচ্ছেদ করা যাবে না; স্থানান্তর করতে হলে পূর্বসম্মতি এবং ন্যায্য ক্ষতিপূরণ দিতে হবে।

‘সংশ্লিষ্ট জনগোষ্ঠীর সদস্যদের ঐতিহ্যগতভাবে অধিকৃত ভূমির ওপর যৌথ কিংবা ব্যক্তিগত মালিকানার অধিকার স্বীকার করতে হবে।’

অনুচ্ছেদ ১১, আদিবাসী ও উপজাতি-সংক্রান্ত আইএলও কনভেনশন ১০৭

ওয়েবসাইটে ক্ষুদ্র জাতিসভা

ক. নিচের ওয়েবসাইটগুলোতে আদিবাসীদের অধিকার-সংশ্লিষ্ট বিভিন্ন সনদ, নথিপত্র, তথ্য-উপাত্ত পাবেন। এগুলো সবই আন্তর্জাতিক প্রেক্ষাপটের। এর কিছুতে আপনি বাংলাদেশের আদিবাসী জাতিদের প্রসঙ্গেও আলোচনা পেতে পারেন।

জাতিসংঘ ও সংশ্লিষ্ট সংস্থা

- UN Working Group on Indigenous Peoples (WGIP) 1982 -
<http://www.unhchr.ch/indigenous/mandate.htm>
<http://www.unhchr.ch/indigenous/main.html>
<http://www.unhchr.ch/indigenous/documents.htm#intdecade>
- Permanent Forum on Indigenous Issues, 2000-
<http://www.unhchr.ch/indigenous/forum.htm>
<http://www.unhchr.ch/indigenous/documents.htm#intdecade>
- UNESCO
http://portal.unesco.org/culture/admin/ev.php?URL_ID=2946&URL_DO=DO_TOPIC&URL_SECTION=201&reload=1064527586
http://portal.unesco.org/sc_nat/ev.php?URL_ID=1945&URL_DO=DO_TOPIC&URL_SECTION=201
<http://www.iaip.gn.apc.org/>
www.unesco.org/whc
- World Intellectual Property Organization (WIPO)
<http://www.unhchr.ch/html/racism/indileaflet12.doc>
<http://www.wipo.int/>
- United Nations Development Fund (UNDP)
<http://www.undp.org/>
<http://www.unhchr.ch/html/racism/indileaflet11.doc>
- International Labor Organisation

জাতিসংঘের আইনি দলিলপত্র

- United Nations Declarations on the Rights of the Indigenous Peoples –
[http://www.unhchr.ch/huridocda/huridoca.nsf/\(Symbol\)/E.CN.4.SUB.2.RES.1994.45.En?OpenDocument](http://www.unhchr.ch/huridocda/huridoca.nsf/(Symbol)/E.CN.4.SUB.2.RES.1994.45.En?OpenDocument)
- Universal Declaration of Human Rights, 1948 -
<http://www.unhchr.ch/udhr/lang/eng.htm>
- Indigenous and Tribal Populations Conventions, 1957 (No. 107 of ILO)
<http://www.ilo.org/ilolex/cgi-lex/convde.pl?C107>
- Indigenous and Tribal Populations Conventions, 1989 (No. 169 of ILO)
<http://www.ilo.org/ilolex/cgi-lex/convde.pl?C169>
- International Covenant on Civil and Political Rights (ICCPR), 1966
http://www.unhchr.ch/html/menu3/b/a_ccpr.htm
- International Covenant on Economic, Social and Cultural Rights (ICESCR), 1966
http://www.unhchr.ch/html/menu3/b/a_cescr.htm
- Rio Declaration on Environment and Development, 1992
<http://www.unep.org/Documents/Default.asp?DocumentID=78&ArticleID=1163>
- Vienna Declaration and Programme of Action, 1993
<http://www.unep.org/Documents/Default.asp?DocumentID=78&ArticleID=1163>
- Cairo Programme of Action, 1994
<http://www.un.org/ecosocdev/geninfo/populatin/icpd.htm>
- Copenhagen Declaration on Social Development, 2000
<http://www.un.org/esa/socdev/wssd/index.html>
- Fourth Conference on Women, Beijing Declaration, 1995
<http://www.un.org/womenwatch/daw/beijing/platform/declar.htm>
- The Habitat Agenda, 1996
http://www.unhabitat.org/declarations/habitat_agenda.asp
- Convention on the Rights of the Child, 1990
<http://www.unhchr.ch/html/menu3/b/k2crc.htm>

পরিপূরক অন্যান্য প্রতিক্রিয়াগুলো

- International Convention on the Elimination of all forms of Racial Discrimination, 1965
http://www.unhchr.ch/html/menu3/b/d_icerd.htm
- Convention on the Prevention and Punishment of the Crime of Genocide, 1948
http://www.unhchr.ch/html/menu3/b/p_genoci.htm
- Declaration on the Rights of Persons Belonging to National or Ethnic, Religious and Linguistic Minorities, 1992
http://www.unhchr.ch/html/menu3/b/d_minori.htm
<http://www.unhchr.ch/html/menu3/b/k2crc.htm>
- Nationality of Natural persons in relation to the Succession of States, 2000
http://www.un.org/law/ilc/reports/1999/english/chap4.htm#E_1
- Declaration on the Elimination of all forms of Intolerance and of Discrimination based on Religion or Belief, 1981
http://www.unhchr.ch/html/menu3/b/d_intole.htm

ওপরের ওয়েবসাইট-ঠিকানাগুলো নেওয়া হয়েছে হ্যান্ডবুক অব অ্যাডভোকেসি ফর ইনডিজেনাস পিপলস নামের একটি বই থেকে। এ বইটির প্রকাশক ব্রাসেলসভিন্সি সংস্থা হিউম্যান রাইটস উইদাউট ফ্রন্টিয়ার্স ইন্টারন্যাশনাল। বইটি বেরোয় ২০০৪ সালে।

খ. ওপরে উল্লেখ করা প্রকাশনাটি যেমন, আদিবাসী বিষয়ে অনেক ওয়েবসাইটই হয়তো ইতিবাচক প্রচারণা বা ক্যাম্পেইন/অ্যাডভোকেসি-ধর্মী। বাংলাদেশের আদিবাসীদের পরিস্থিতি নিয়ে দেখা হয়, এমন বেশ কিছু ওয়েবসাইট আপনি পেতে পারেন। বিভিন্ন ব্লগও আছে। তবে মনে রাখা দরকার, যেকোনো ওয়েবসাইটের নির্ভরযোগ্যতা বিচার করতে হবে। কারা সেটি পরিচালনা করছেন, তাদের পরিচিতি বা সংশ্লিষ্টতা কৌ-সেটা বুঝে দেখা দরকার। তারপর সেই উৎসের পরিচিতিসহ তাদের দেওয়া তথ্য ব্যবহার করা যায়। এ ছাড়া প্রণয়নকারী সংস্থার নিজস্ব ওয়েবসাইটে পাওয়া সনদ, আইন বা দলিল জাতীয় তথ্য বাদে, অন্য যেকোনো ওয়েবসাইটের সব তথ্য নিজে যাচাই করবেন এবং সত্যতা সম্পর্কে নিশ্চিত হয়ে নেবেন। মানবাধিকার বা অন্য ক্যাম্পেইনজাতীয় তথ্য এক পক্ষের বক্তব্য হিসেবে নিয়ে পাল্টাপাল্টি যাচাই করবেন। ব্লগের কোনো কথা কথনেই ‘তথ্য’ হিসেবে নেবেন না।

প্রাথমিক যোগাযোগের জন্য

এমআরডিআইয়ের উদ্যোগে ২০০৮ সালে টাঙ্গাইলের মধুপুর, মৌলভীবাজারের কমলগঞ্জ এবং রাঙামাটি জেলাশহরে তিনটি গোলটেবিল আলোচনা হয়। লক্ষ্য ছিল, আদিবাসী প্রতিনিধি এবং স্থানীয় সাংবাদিকদের মধ্যে আরও বেশি যোগাযোগ ও আদানপ্রদানের উপায় খুঁতিয়ে দেখা। এগুলোতে উপস্থিত ছিলেন এলাকার আদিবাসী সংস্থা-সংগঠনের প্রতিনিধিরা এবং জাতীয় ও স্থানীয় পত্রিকার সাংবাদিকেরা। এসব এলাকায় প্রাথমিক যোগাযোগের সূত্র হিসেবে এঁরা সহায়ক হতে পারেন। এঁদের নাম ও পরিচয় একে একে তুলে দিচ্ছি।

১. মধুপুর

সংবাদদাতা/প্রতিনিধি/প্রতিবেদক : মধুপুর ও টাঙ্গাইল

মো. হারুন অর রশিদ	মধুপুর প্রতিনিধি, যায়বায়দিন
নাজমুছ সাদাত নোমান	মধুপুর প্রতিনিধি, নয়া দিগন্ত
আনছার আলী	মধুপুর প্রতিনিধি, দৈনিক বাংলাবাজার পত্রিকা
আবদুল্লাহ আবু এহসান	মধুপুর প্রতিনিধি, দৈনিক ডেস্টিনি
মো. গোলাম ছামদানী	জেলা প্রতিনিধি, দ্য ইন্ডিপেন্ডেন্ট
আনোয়ার সাদাত ইমরান	জেলা প্রতিনিধি, সমকাল
মো. আমিনুল হক	নির্বাহী সম্পাদক, দৈনিক প্রগতির আলো, টাঙ্গাইল
এম এ রউফ	উপজেলা সংবাদদাতা, দৈনিক ইনকিলাব
জয়নাল আবেদিন	মধুপুর প্রতিনিধি, দৈনিক আমার দেশ
মুহাম্মদ হাবিবুর রহমান	গোপালপুর, মধুপুর, ধনবাড়ী প্রতিনিধি, দৈনিক ইন্ডিফাক
কামনাশীষ শেখর	মধুপুর প্রতিনিধি, সংবাদ
	টাঙ্গাইল প্রতিনিধি, প্রথম আলো

আদিবাসী প্রতিনিধি/সিবিও/এনজিও/গবেষক/অন্যান্য

মারিয়া চিরান	প্রধান শিক্ষিকা, করপোস প্রিস্টি হাইস্কুল, জলছত্র, মধুপুর
ইউজিন নকরেক	চেয়ারম্যান, ট্রাইবাল ওয়েল ফেয়ার অ্যাসোসিয়েশন, জলছত্র, মধুপুর, টাঙ্গাইল
অজয় এ মৃ	চেয়ারম্যান, জয়েনশাহী আদিবাসী পরিষদ, জলছত্র, মধুপুর, টাঙ্গাইল
সুলেখা ম্রং	নির্বাহী প্রধান, আচিক মিটিক সোসাইটি, পীরগাছা, মধুপুর, টাঙ্গাইল
রোজি ম্রং	আচিক মিটিক সোসাইটি, পীরগাছা, মধুপুর, টাঙ্গাইল
রূলা লাইলা	গারোবিষয়ক গবেষক, শিক্ষক, জেভার স্টাডিজ বিভাগ, ঢাকা বিশ্ববিদ্যালয়

২. রাঙামাটি

সংবাদদাতা/প্রতিনিধি/প্রতিবেদক : পার্বত্য চট্টগ্রাম

সুনীল কান্তি দে	পার্বত্য অঞ্চল প্রতিনিধি, সংবাদ
শৈলেন দে	রাঙামাটি প্রতিনিধি, ভোরের কাগজ ও দৈনিক আজাদী
শান্তিময় চাকমা	জেলা প্রতিনিধি, ডেইলি স্টার, রাঙামাটি
হরি কিশোর চাকমা	নিজস্ব প্রতিবেদক, প্রথম আলো, রাঙামাটি
এ কে এম মকছুদ আহমেদ	সম্পাদক, গিরিদর্পণ, রাঙামাটি
সাখাওয়াৎ হোসেন রূবেল	রাঙামাটি জেলা প্রতিনিধি, দৈনিক পূর্বকোণ
মোহাম্মদ আলী	রাঙামাটি জেলা প্রতিনিধি, দৈনিক জনকষ্ঠ
সত্রং চাকমা	স্টাফ রিপোর্টার, সমকাল, রাঙামাটি
সবুজ সিদ্ধিকী	ইনচার্জ, বাসস, আঞ্চলিক কার্যালয়, রাঙামাটি
শামীম রশীদ	দৈনিক পার্বত্য বার্তা, রাঙামাটি
পুলক চক্রবর্তী	রাঙামাটি প্রতিনিধি, এটিএন বাংলা
ফজলুর রহমান রাজন	প্রতিনিধি, মানবজমিন/আরটিভি, রাঙামাটি
নন্দন দেবনাথ	জেলা প্রতিনিধি, বাংলাভিশন

আদিবাসী প্রতিনিধি/সিবিও/এনজিও/গবেষক/অন্যান্য

মো. জান-ই-আলম	অতিরিক্ত প্রকল্প পরিচালক, ইনট্রিপ্রেটেড কমিউনিটি ডেভেলপমেন্ট প্রোগ্রাম (আইসিডিপি), পার্বত্য চট্টগ্রাম উন্নয়ন বোর্ড, রাঙামাটি
অরণেন্দু ত্রিপুরা	জনসংযোগ কর্মকর্তা, রাঙামাটি পার্বত্য জেলা পরিষদ
জনলাল চাকমা	প্রধান নির্বাহী, আদিবাসী উন্নয়ন কেন্দ্র (সিআইপিডি) টিএনটি রোড, রাঙামাটি
পলাশ খীসা	মাল্টি লিঙ্গেল অফিসার, স্ট্র্যাটেজিক অ্যাকশনস সোসাইটি (স্যাস) কল্যাণপুর, রাঙামাটি
তনয় দেওয়ান	উপদেষ্টা, হিলেহিলি, চম্পকনগর, বনরূপা, রাঙামাটি
জশেষ্বর চাকমা	নির্বাহী পরিচালক, কপো সেবা সংঘ, নর্থ কালিন্দীপুর, রাঙামাটি
ধীমান খীসা	ভাইস প্রেসিডেন্ট, রাঙামাটি কো-অপারেটিভ ল্যান্ড মর্টগেজ ব্যাংক লিমিটেড
মৎ খোয়াই চিং	নির্বাহী পরিচালক, গ্রীন হিল, চম্পকনগর, রাঙামাটি
বিপ্লব চাকমা	নির্বাহী পরিচালক, আসিকা মানবিক উন্নয়ন কেন্দ্র, কে কে রায় রোড স্টেডিয়াম এলাকা, রাঙামাটি
লাল ছোয়াক লিয়ানা পাংখোয়া	কর্মসূচি ব্যবস্থাপক, গ্রীন হিল, চম্পকনগর, রাঙামাটি

৩. কমলগঞ্জ

সংবাদদাতা/প্রতিনিধি/প্রতিবেদক : সিলেট, মৌলভীবাজার

চৌধুরী আবু সাঈদ ফুয়াদ	কুলাউড়া প্রতিনিধি, দৈনিক আমার দেশ ও বাংলা টিভি (যুক্তরাজ্য)
কায়সার রশীদ	বার্তা সম্পাদক, সাংগৃহিক ঠিকানা, প্রেসিডেন্ট, কুলাউড়া প্রেসক্লাব
আজিজুল ইসলাম	কুলাউড়া প্রতিনিধি, যুগান্তর
হাসানাত কামাল	মৌলভীবাজার জেলা প্রতিনিধি, সমকাল ও নিউ এজ
আহমেদ ফারুক মিহ্নাদ	শ্রীমঙ্গল প্রতিনিধি, যুগান্তর
আকমল হোসেন নিপু	মৌলভীবাজার প্রতিনিধি, প্রথম আলো
সংগ্রাম সিংহ	স্টাফ রিপোর্টার, যুগান্তর, সিলেট
আব্দুর রাজ্জাক রাজা	যুগান্তর, কমলগঞ্জ, মৌলভীবাজার
সাজেদুর রহমান সাজু	সম্পাদক, কমলগঞ্জ প্রেসক্লাব, মৌলভীবাজার
আনহার আহমেদ সমশাদ	মৌলভীবাজার জেলা প্রতিনিধি—চ্যানেল এস, সম্পাদক—দৈনিক সবুজ সিলেট নির্বাহী সম্পাদক—সাংগৃহিক দেশ পক্ষ
বিশ্বজ্যোতি চৌধুরী	শ্রীমঙ্গল প্রতিনিধি, প্রথম আলো
সুব্রত দেবরায় সঞ্জয়	দৈনিক সিলেটের ডাক—কমলগঞ্জ প্রতিনিধি ও সভাপতি—কমলগঞ্জ প্রেসক্লাব
বিকুল চক্রবর্তী	একুশে টেলিভিশন, দৈনিক ভোরের ডাক ও শ্যামল সিলেট প্রতিনিধি
এস এম উমেদ আলী	নির্বাহী সম্পাদক, সাংগৃহিক পাতাকুঁড়ির দেশ; দৈনিক ইনকিলাব, মৌলভীবাজার প্রতিনিধি, এনটিভি

আদিবাসী প্রতিনিধি/সিবিও/এনজিও/গবেষক/অন্যান্য

নমিতা নাইয়াং	মানবাধিকার কর্মী, আদিবাসী কর্মী
সৌদামিনী শৰ্মা	মানবাধিকার কর্মী, কমলগঞ্জ, মৌলভীবাজার
ভীমপল সিনহা	জেনারেল সেক্রেটারি, ইনডিজেনাস মনিপুরি ওয়েলফেয়ার ট্রাস্ট কমলগঞ্জ, মৌলভীবাজার
চিত্তরঞ্জন রাজবৎশী	লেকচারার, ইংরেজি বিভাগ, গোয়াইনঘাট ডিএন্সি কলেজ
আনন্দ মোহন সিনহা	কো-চেয়ারপারসন, বৃহত্তর সিলেট আদিবাসী ফোরাম
শিশির দিও	চেয়ারম্যান, আদিবাসী ওয়েল ফেয়ার এসোসিয়েশন, সুনামগঞ্জ জেলা
শ্রী গৌরাঙ্গ পাত্র	নির্বাহী প্রধান, পাত্র সম্প্রদায় কল্যাণ পরিষদ (পাসকপ) দলইপাড়া, খাদিমনগর, সিলেট
মনিভদ্র সিংহ	মণিপুরি প্রতিনিধি, গ্রাম, ছহেরজান, কামালগঞ্জ
সমরঞ্জিত সিংহ	জেনারেল সেক্রেটারি, বাংলাদেশ মনিপুরি সমাজকল্যান সমিতি কমলগঞ্জ, মৌলভীবাজার

তিনটি আদিবাসী অধ্যুষিত এলাকায় এমআরডিআই-এর স্থানীয় সমন্বয়কারী সাংবাদিকের নাম ও পরিচয় :

কামনাশীৰ শেখৰ

জেলা প্রতিনিধি, প্রথম আলো

২৮ জেনারেল লাইভ্রেরি মার্কেট, টাঙ্গাইল

সঞ্চাম সিংহ

সিনিয়র স্টাফ রিপোর্টার, যুগান্তর

৯/১০ নেহার মার্কেট, জিন্দাবাজার, সিলেট

সুনীল কাণ্ঠি দে

পার্বত্য অঞ্চল প্রতিনিধি, দৈনিক সংবাদ

রাঙামাটি প্রেসক্লাব, রিজার্ভ বাজার, রাঙামাটি

আদিবাসী প্রতিনিধি যাঁরা উক্ত এলাকায় প্রকল্প বাস্তবায়নে এবং বিভিন্ন প্রশিক্ষণে আলোচক হিসেবে উপস্থিত ছিলেন :

অজয় মু

সভাপতি, জয়েনশাহী আদিবাসী উন্নয়ন পরিষদ

জলছত্র, মধুপুর, টাঙ্গাইল

এন্ডু সলমার

অর্থ সম্পাদক, বাংলাদেশ আদিবাসী ফোরাম

তাহিরপুর, টেকেরঘাট, সুনামগঞ্জ

রবীন্দ্রনাথ সরেন

সাধারণ সম্পাদক, জাতীয় আদিবাসী পরিষদ

২২০ সাগরপাড়া, তাঁতঘর, ঘোড়ামারা, রাজশাহী

রামকান্ত সিংহ

পরিচালক, মণিপুরি ললিতকলা একাডেমি

কেরামতনগর, কমলগঞ্জ, মৌলভীবাজার

সঙ্গীব দ্রঃ

সভাপতি, জাতীয় আদিবাসী ফোরাম

বাড়ি : ৬২, প্রবাল হাউজিং, রিং রোড, শ্যামলী, ঢাকা

সহায়ক এন্ট্রপিজি

এই বইটি লিখতে গিয়ে যেসব বই/গবেষণাপত্র/নিবন্ধের সহায়তা নেওয়া হয়েছে নিচে তার তালিকা দেওয়া হলো। আদিবাসী-সংক্রান্ত বিভিন্ন বিষয়ে এসব বইপত্র প্রয়োজনীয় তথ্যসূত্র হতে পারে।

১. ‘বাংলাদেশের আদিবাসী গোষ্ঠীসমূহ’, প্রশান্ত ত্রিপুরা—অষ্টম অধ্যায়, সাংস্কৃতিক নৃবিজ্ঞান পরিচিতি; প্রকাশক : উন্মুক্ত বিশ্ববিদ্যালয়, গাজীপুর, ২০০১। প্রকাশের পর লেখাটি আরও কিছু সম্পাদনা করেছেন।
২. আন্তর্জাতিক আদিবাসী বর্ষ ও বাংলাদেশের আদিবাসী জনগণ, প্রশান্ত ত্রিপুরা—আন্তর্জাতিক বিশ্ব আদিবাসী বর্ষ উদ্যাপন কমিটি কর্তৃক আয়োজিত আলোচনা অনুষ্ঠানে পঠিত মূল প্রবন্ধ, ঢাকা, ১৯৯৩; ২০০৩ সালে হালনাগাদ করা
৩. ‘এথনিক কমিউনিটিস অব বাংলাদেশ’, কিরিয়াউল খালেক—প্রথম অধ্যায়, বাংলাদেশ ল্যান্ড ফরেস্ট অ্যান্ড ফরেস্ট পিপল, প্রকাশক : সোসাইটি ফর এনভায়রনমেন্ট অ্যান্ড হিউম্যান ডেভেলপমেন্ট (সেড), ঢাকা, ১৯৯৫
৪. আদিবাসী জনগোষ্ঠী, বাংলাদেশ সাংস্কৃতিক সমীক্ষামালা-৫, মেসবাহ কামাল, জাহিদুল ইসলাম ও সুগত চাকমা সম্পাদিত—প্রকাশক : বাংলাদেশ এশিয়াটিক সোসাইটি, ঢাকা, ২০০৭
৫. পপুলেশন সেনসাস ২০০১, ন্যাশনাল সিরিজ, ভলিউম-১ ও বিভিন্ন কমিউনিটি সিরিজ—প্রকাশক : বাংলাদেশ পরিসংখ্যান ব্যৱো, ঢাকা, ২০০৭
৬. বাংলাদেশের নৃতাত্ত্বিক জনগোষ্ঠী, রামকান্ত সিংহ—প্রকাশক : এ এইচ ডেভেলপমেন্ট পাবলিশিং হাউজ, ঢাকা, ২০০১
৭. সংহতি ২০০৬/সলিডারিটি ২০০৬, সঞ্জীব দ্রং সম্পাদিত—প্রকাশক : বাংলাদেশ আদিবাসী ফোরাম, ঢাকা, ২০০৬
৮. সিলেটের নিঃস্ব আদিবাসী পাত্র, রতন লাল চক্রবর্তী—প্রকাশক : মাওলা ব্রাদার্স, ঢাকা, ১৯৯৮
৯. বাংলাদেশের ক্ষুদ্র জাতিসভার সংস্কৃতি, ফিলিপ গাইন ও পার্থ শক্তর সাহা সম্পাদিত—প্রকাশক : সোসাইটি ফর এনভায়রনমেন্ট অ্যান্ড হিউম্যান ডেভেলপমেন্ট (সেড), ঢাকা, ২০০৭
১০. দি স্ট্রাং টাইমেন অব মধুপুর, রবিস বার্লিং—প্রকাশক : দি ইউনিভার্সিটি প্রেস লিমিটেড, ঢাকা, ১৯৯৭

১১. দি খাসিস অব বাংলাদেশ, ড. থমাস কস্টা ও অনিন্দিতা দত্ত—প্রকাশক : সোসাইটি ফর
এনভায়রনমেন্ট অ্যাভ হিউম্যান ডেভেলপমেন্ট (সেড), ঢাকা, ২০০৭
১২. বাংলাদেশের উপজাতিদের আইন, রামকান্ত সিংহ—প্রকাশক : এ এইচ ডেভেলপমেন্ট পাবলিশিং
হাউজ, ঢাকা, ২০০৩
১৩. ভূমি, বন ও প্রাকৃতিক সম্পদে আদিবাসীর অধিকার, বাহুনীন খান, বাংলাদেশ পরিবেশ আইনবিদ
সমিতি, বেলা—এমআরডিআই আয়োজিত সাংবাদিক প্রশিক্ষণ কর্মশালায় উপস্থাপিত তথ্যপত্র,
সাভার, ২০০৮
১৪. লিগাল ক্রেমওয়ার্ক অন প্রটেকশন অ্যাভ প্রমোশন অব ইনডিজিনাস পিপলস রাইটস : ইন্টারন্যাশনাল
অ্যাভ ন্যাশনাল পারস্প্রেকটিভ, আবদুল্লাহ আল ফারুক—এমআরডিআই আয়োজিত সাংবাদিক
প্রশিক্ষণ কর্মশালায় উপস্থাপিত তথ্যপত্র, সাভার, ২০০৮
১৫. সিচ্যোশন অব আদিবাসিজ : কেস স্টাডিজ ক্রম সিএইচটি অ্যাভ মধুপুর, সাদেকা হালিম—
এমআরডিআই আয়োজিত সাংবাদিক প্রশিক্ষণ কর্মশালায় উপস্থাপিত তথ্যপত্র, সাভার, ২০০৮
১৬. দি চিটাগং হিল ট্র্যাক্টস, বাংলাদেশ : জাস্টিস ডিনাইড, আমেনা মহসীন—এমআরডিআই আয়োজিত
সাংবাদিক প্রশিক্ষণ কর্মশালায় উপস্থাপিত তথ্যপত্র, সাভার, ২০০৮
১৭. 'চ্যালেঞ্জেস ফর জুরিডিকাল পুরালিজম অ্যাভ কাস্টমারি ল'জ অব ইনডিজিনাস পিপলস : দি কেস
অব দি চিটাগং হিল ট্র্যাক্টস, বাংলাদেশ', রাজা দেবাশীষ রায়—চন্দ্রা কে. রায় সম্পাদিত ডিফেন্ডিং
ডাইভাসিটি : কেস স্টাডিজ—প্রকাশক : সামি কাউন্সিল, সুইডিশ সেকশন, সুইডেন, ২০০৮
১৮. মাইগ্রেশন ল্যাভ অ্যালিয়েনেশন অ্যাভ এথনিক কনফিন্স্ট, স্বপন আদনান—প্রকাশক : রিসার্চ অ্যাভ
অ্যাভভাইজরি সার্ভিসেস, ঢাকা, ২০০৮
১৯. মেলভিন মেনচির'স নিউজ রিপোর্টি অ্যাভ রাইটিং, (সঙ্গম ও একাদশ সংস্করণ), মেলভিন
মেনচির—কলাখিয়া বিশ্ববিদ্যালয়—প্রকাশক : ম্যাকগ্রাহাম-হিল, নিউইয়র্ক, যুক্তরাষ্ট্র, ১৯৯৭ ও ২০০৮
২০. জনসংযোগ হ্যাভরুক, এম. ইমামুল হক—প্রকাশক : ম্যানেজমেন্ট অ্যাভ রিসোর্সেস ডেভেলপমেন্ট
ইনশিয়েটিভ (এমআরডিআই), ঢাকা, ২০০৭

দূরত্ব পারস্পরিক
ব্যাপার। দূরত্ব
তথা ঘাটতি ও
সমস্যাগুলো দূর
করার সঠিক
উপায় এবং
কৌশল ঠিক
করতে হবে।
পারস্পরিক আন্ত্র
ও বিশ্বাস এবং
সহায়তার ভিত্তি
তৈরি করা
জরুরি। ...